

quævis, vel insana hominum deliramenta,
nomen legis induerent.

Qui cum Platonicis, & Cartesianis, tum
MELANCHTONE, *Epit. Phil.mor.* p.102, &
ROB. SCHARROKIO, *de Off.I.N.c.* 1, n. 7,
ideas actuales innatas sumunt, ii, vana pie-
tatis specie, disciplinæ moralis fundamen-
tum locant in hypothesi admodum lubrica,
atque infirma, simulque viam solidiora in-
vestigandi principia præcludunt. Ast ex ne-
gatione talium idearum inferri nequit, ut
negandi quoque sint interni stimuli, qui sæ-
pe sine ratiocinio, ac instructione nos de offi-
cio admonent. Nec plus evincitur ex verbis
Apostoli: *Gentes*, ait, *quæ legem non ha-
bent -- ostendunt opus legis scriptum in cor-
dibus suis*, *Rom. II, 14, 15*. Hæc enim ipsa
metaphora, quæ in sacris litteris sæpe adhi-
betur de rebus plane non naturalibus & tan-
tum adsumtis, *Jer. XVII, 1, Proverb.
VII, 3*, satis indicat, leges non aetü sed fa-
cultate cordibus esse congenitas. Quid, quo i
idem D. PAULUS ipsam DEI existentian *ex
natura mundi*, adeoque ratione, primum,
intelligi tradit, *Rom. I, 19, sq.* Ad inspiratio-
nem specialem recurrent P. POIRETTUS de
Erud. Trip. L. I, part. I, §. 23, & nuper
ANS. DESING in *jur. nat. repurg.*, C. III.
Th. XV. Enimvero quotiescumque obveni-
rent hujusmodi notitiæ, illæ non amplius
essent naturales, de quibus tamen agimus;
dein si, ut plerumque fit, figura sunt cor-
ruptæ Phantasiæ, nonne ad hæc discernenda
opus erit ratione? *Vid. CICERO N. D.
II, 65.*

§. 107. Non igitur, qui ideas legum innatas, & specialem singulorum inspirationem explodunt, ideo naturalem agendi normam vel ab usu & adfuetudine, vel ab exemplo, traditione, judicio atque informatione aliorum, verbo, ab *Auctoritate* esse hauriendam putant. Sed potius congenitas agnoscunt facultates, quibus homo & inaudita investigare, & audita perpendere possit. Id quidem nemo iverit inficias perfectionem intellectus valde matuari a proba institutione; tanta vero hujus non est necessitas, ut ea destituti, quae naturaliter præcepta sint, vel vetita, suopte inquirere ingenio nequeant. Quid! persæpe illi, qui *semitam non sapiunt, aliis monstrant viam.* Unde fit, ut multi præjudicatis opinionibus depravati, parvulos naturæ igniculos restinguant, quibus si erumpere liceret, ipsa eos ad bene beatae que vivendum natura perduceret.

Publicæ tantum auctoritatationem subjecit HOBESIUS II, 1, XIV, 9, sed P. A. DESING., meliore licet consilio, etiam auctoritatem privatam parentum, doctorum, & bonorum virorum rationi præferri voluit; *Jur. N. rep. Th. 25.* Quidnam ergo eos facere oportet, qui vel ab aliorum commercio sunt sejuncti, vel falsas edocti doctrinas? An eum Druidibus *immolare humanas vietas?* CÆSAR. B. G. VI, 16; vel cum Phariseis *relinquere misericordiam & fidem?* *Math. XXIII. 23;* aut aliis ubique grassantibus

Alii ad
solam au-
torita-
tem re-
currunt.

vitiis indulgere? Sæpe enim, ut vere obseruat CICERO, cum parentibus redditi, demum magistris traditi sumus, tum ita variis imbui-mur erroribus, ut vanitati veritas, & opinione confirmata natura ipsa cedat; Tusc. III. §. I, cf. & N. D. I. 5. Quanto satius porro esset tunc propriam impendere rationem, quam ingenti illorum gregi adhærere, qui, ut ait LACTANTIUS, *in ea re, in qua vitæ ratio versatur, sapientiam sibi admunt, dum sine ullo judicio inventa majorum probant, & ab aliis pecudum more ducuntur*; Div. Inst. II. 7. At inquies divinam saltem sequantur traditionem & auctoritatem? Ita est. Sed revelatio nunquam repugnat rationi; dein illas tantummodo exquirimus leges, ad quas non docti sed facti, non instituti sed imbuti sumus; CICERO Mil. 4: *Fac autem hasce regulas nobis non posse innoscere sine revelatione, tunc nullæ existent leges naturales, nec veritati amplius congrueret, quod ait Apostolus Etiam gentes, quæ legem (revelatam) non habent, naturaliter ea, quæ legis sunt, faciunt: ejusmodi legem non habentes ipsi sibi sunt lex,* Rom. II. 14.

Nec rationabilem delevit Adamus labes, §. 108. Urgent auctoritatis fautores vi-tiatam ab originali peccato rationem, ejus-que lumen tam crassis tenebris esse cir-cumfusum, ut nec viri Græciæ, & Latii sapientes a turpissimis erroribus fuerint immunes, nec ceteris hominibus magis de ratione conveniat, quam de gustu. Ne-mini igitur ad penetranda naturalia vitæ officia suam sufficere intelligentiam posse.

Sed

Sed male DEI cauſam perorant, qui ita concludunt. Deprefla enim ratione, primo maximum evertunt veræ revelationis fundamen tum, nosque in fœdum pyrhōnismum dejiciunt; dein ostendunt in eo, quod hostes sacraruin literarum de veritate amplius convincere nequeant, illosque suo, ut ajunt, gladio jugulare. Postea aperte contradicunt Apostolo, qui gentes folius naturæ licet corruptæ viribus, & sine revelatione morum præcepta affecutas esse docet (§. 107, Sch.), denique liberum, quod tamen tueri volunt, sic deſtruūt arbitrium; niſi enim naturalis ratio boni malique nexum cum actionibus perspicere per ſe eſlet apta; neque voluntas in agendo vel omittendo naturali gauderet libertate (§. 44). Quare id omnino tenetduim; rectam rationem, quæ ſecum ipſa nunquam pugnat (§. 107), Adami labē quidem fuſſe debilitatam, attamen hominibus perfecto ſtatu utentibus (§. 55) tantam adhuc ejus lucem remansifſe, quantum intrinſecæ actionum bonitatis vel malitiæ perspicientia poſtulat (§. 103).

Inobedientia primorum parentum fauciavit humanam naturam, & quum exquisitissima ante adfuſſet boni malique notitia, nunc ea honniſi operoſo labore ſæpe comparari po teſt. Sed diſrumpantur licet, qui cum Au ctore *Dub. I. N. c. IV, §. 7, sq.* legem Naturæ ſola ratione cognosci poſſe negant; id

tamen nunquam persuadebunt hominibus fānæ mentis. Hæc enim lex , ut ait AMBROSIUS , non lectione aliqua , sed profuso quodam naturæ fonte expressa est. Et ideo legem justæ non esse positam , dixit D. PAULUS I. Tim. 1, 9. Ita sine revelatione hominis officia satis intellexerunt Melchisedeches , Jethro , Jobus , quorum unusquisque dicere poterat cum Psalmista : *Da mihi intellectum , (non auctoritatem) & scrutabor legem tuam;* Psal. 118, v. 34. Ast , inquies , errarunt sæpe homines ratione utentes , & in sententias iverunt diversissimas ? Quid tum ? An post revelationam pugnæ cessarunt atque errores ! vitium ergo id rationis non est , sed stultiæ eorum , qui rationem negligunt. Adjuvatur certe divina luce mentis obtutus , sed qui uititur conspicilio , cæcus non est ; nec qui naturalem ei tribuit videndi facultatem , contemnit conspicilii usum , quemadmodum adversarii putide vociferantur. Cf. quæ hac de re a me latius disputata sunt in *Novis literariis Germ. Vindob.* de anno 1759 , mense Mart. a pag. 161 , ad pag. 184.

Principiū
cognoscen-
di , qua
lons est ,
requisita.

§. 109. Pergimus ad principium cognoscendi obiective consideratum , quod communem fontem vocant , aut generale axioma , ex quo recta ratio DEI voluntatem naturaliter obligatoriam , adeoque omnes ac singulas naturales leges elicere , simulque discernere a positivis possit (§. 100, 101). Illud autem concessum est apud omnes , tum ex ipsius principii definitio- ne ac scopo clare patescit , nihil hujusmo- di

di nomen mereri , quod primo *verum* non fit , dein *perspicuum* , ac tamdem sufficiens apiumque , sive *adæquatum*. Igitur sit *verum* , ceteroquin ex eo pro veris , quas quærimus , falsæ & fictæ conclusiones directe promanabunt. Sit *perspicuum* sive *evidens* , cam enim ob caussam maxime comparatur , ut quilibet homo sanæ mentis illud sine difficultate assequi , & ad ceteras veritates eruendas tuto impendere valeat. Sit denique *adæquatum* , quod scilicet nec plura nec pauciora quam naturalia præcepta vel vetita contineat ; quia si adsumitur angustius , tunc non est principium ante definitum ; si autem latius , confunduntur naturæ scita cum iis , quæ tantum revelatione vel ab hominibus sunt posita. Contra *adæquatum* quod est , id non solum est *domesticum* sive *proprium* hujus disciplinæ , sed etiam suo modo *primum* atque *universale* , siquidem nullæ adesse debent leges naturales , quæ non ab eo defluant quasi capite , & non ad aliud , veluti species ad genus suum , referantur.

Si ab aliquo quæris , cur , exempli caussa , illicita sit sui ipsius occisio , tibi non satis faciet dicendo , quia id prohibet naturæ Author , sed novam statim institues quæstionem : unde illi innotescat hæc DEI voluntas ? Quod si reponat , ita dictare rationem , nondum acquiesces , scire enim voles , quoniam igitur ex principio recta ratio cognoscat illam DEI

voluntatem. Hujus vero principii characteres adnotavit ARISTOTELES I. *Anal. poster.* C. II: Oportet, inquit, scientiam demonstrativam esse ex veris & primis, & immediatis, & notioribus, & caussis conclusionis. Sic enim erunt principia domestica ejus, quod demonstratur. Et quamvis interpres in numerandis requisitis variare videantur, re ipsa tamen non dissentunt. Nam qui cum Thomasio I, VI, 4; & Heineccio I, 68, tres tantum ponunt principii characteres, ut sit *verum*, *evidens*, & *adæquatum*, illi sub *adæquato*, etiam *primum*, *universale*, *domesticum* seu *ratione innotescens*, & *determinatum* complectuntur.

Cur multis inutile, multis iustificabile sit **§. 110.** Sed tale aliquod, quale nunc descripsimus principium, aliis parum utile nedum necessarium, aliis autem profusum impossibile est visum. Ac de utilitate quidem inde orta dubitatio est, quod natura officiorum præcepta etiam sine hoc adparatu indocti intelligere, docti vero, acriter licet de principio inter se disputantes, ea demonstrare, atque in ipsis conclusionibus fere convenire soleant: quod admissa principii doctrina negligantur plures particulares regulæ in nullo ex hac tenus excogitatis fundamentis comprehensa, quod tamdem & reliquæ omnes disciplinæ inanibus hisce subtilitatibus sine ullo determinato supersedeant. Possibilitatem vero idonei principii quidam sic impugnant, ut dicant infinita actionum moralium genera uni propositioni subjici non

non posse, & ideo post tot improbos conatus a Philosophis prolatum esse nihil, ex quo omnium naturalium legum ratio sine ingenti contorsione elucescat.

Hæ sunt præcipuæ rationes, ob quas KULPISIUS Coll. Grot. Ex I. Th. 5; dein GRIBNERUS Pr. J. N. prol. C. IV; BARBEYRACIUS ad Puf. de O. H. & C. I, III, §. 13; EV. OTTO ibid. §. I; BURLAMAQUIUS XI, IV, 4, 5; & GLAFUSIUS I, III, 13, 14. principii sufficientis existentiam atque utilitatem negarunt. Putabant enim, si quis subtiliter judicare vellet, omnia principia gravi quodam defectu laborare. Contra AUCTOR Dub. J. N. G. V, §. 2, & 15. principii quidem utilitatem agnovit, illud enim simile facit margaritæ pretiosissimæ, quam qui invenit omnia vendit, ut illam acquirat; si quidem ut ab unitate ad multitudinem, a puncto ad lineas & circulos, a semine ad arborem fiat progressus; ita & principii extensio, & multiplicatione Jus oriri possit. Tot tamen excitat difficultates, ut ejus possibilitatem definire ausus non sit. Inde factum, ut post tot de principio certamina disciplinam nostram alii asperam nimis & salebrosam, alii etiam ridiculam invenerint.

§. III. Enim vero eam esse constat ratioñi naturam, ut nisi universalis aliqua propositio præmittatur, recta ratio peculiares eruere conclusiones non possit, quod quidem agnoscunt omnes modo laudati scriptores, sed id tantum contendunt

Probatur
illius ne-
cessitas.

ad

ad vitæ morumque ratiocinia non unam, sed plures generales propositiones pertinere. Atqui omnino falluntur. Quum enim hæ ipsæ generales veritates nos non ducant ad repugnantia (§. 72), adeoque vel reciproçari, vel vero eodem ordine aut simul, aut gradatim progredi debent; consequens est, ut illæ aliquo modo semper coagmententur, & in aliquem communem scopum veluti totidem lineæ in centrum suum desinant (§. 57, 59), ac porro ut proximum hujus scopi genus unicum disciplinæ nostræ fit principium. Neque exiguum esse hujus propositionis fundamentalis usum ii sunt experti, qui non modo difficiles quæstiones ad eam exigere, sed etiam aptius naturalium legum systema, hoc est, veritatum moralium inter se connexarum compagem, architectari & construere tentarunt.

Notæ sunt Logicorum Regulæ: *Ex meris particularibus nihil sequitur.* Et: *Quævis ratiocinatio redigi potest ad primam syllogismorum figuram.* Ergo & in proferendis naturæ legibus ratiocinationem a propositione universali quasi prima earum stirpe ordiri oportet. Sane id convenit cuique legi particuliari, tendere ad verum bonum (§. 80), adeoque ad perfectionem (§. 14), atque communem finem (§. 59). Non desunt itaque notiones universales & communia fundamenta, quibus æque nitatur nostra disciplina; undecumque illam species. Quare recte hac in re
ju-

judicavit HOBBESIUS de sua ætate: *Huic philosophiae parti idem contigisse, quod viis publicis, quibus omnes ingrediuntur, eantque prorsum, & retrorsum, alii animi causa inambulant, alii rixantur, sed nihil feritur.* Cujus rei ratio sit: quod *nemo* (aut saltem tunc pauci) *eorum, qui materiam hanc tractarunt, commodo usus fit docendi principio.* *De Civ. Epist. dedic.*

§. 112. Et ita evanescunt dubitationes, quæ de unico cognoscendi principio supra admotæ sunt. Quum enim demonstrata sit illius possiblitas, fieri nequit, ut, si id rite ac universaliter fuerit conceptum, particulares quædam morum regulæ in præteritis relinquantur. Indoctos quod attinet, habebunt ii quidem legum naturalium notitiam atque usum, artem non habebunt; docti vero, quando in conclusionibus consentiunt, principia non statuerunt discrepantia nisi verborum sano; quod si principiis re ipsa differentibus sunt usi, eorum dissensus etiam in conclusionibus perdurat. Nihil etiam evincit argumentum a reliquis disciplinis petatum, quippe quæ ab hac nostra sunt diversæ, ut proin non statim ab una ad alteram valeat complexio. Quamquam neque illæ suis carent rivis, qui ad unicum communem fontem, veluti Theologia positiva ad revelationem, Physica ad convenientiam cum viribus naturæ revocantur.

Si-

Sicuti in Logica ratiocinandi vis augetur exerçitatione , perficitur autem doctrina , ita naturæ leges sine disciplina cognosci quidem possunt , sed si hæc acceſſerit perspicciuntur penitus . Quapropter etim CICERO observavit , Juris civilis magnum usum esse apud plures , artem in uno Sulpicio , quod dīdicisset , habere regulam , qua vera & falsa judicarentur , & quæ quibus positis essent , quæque non essent consequentia . Brut. 45. Quid quod illi etiam , qui non unum , sed plura legum naturalium suprema capita statui volunt , tamen quasi sui immemores fatentur , ista arteſſimo inter se vinculo cohærere , & aquaque ratione ad promovendos creatoris fines concurrere , BARBEYRAC. ad Puf. de Off. I. C. 3 , §. 13 ; nec non vel ex natura rei & negotii , GLATEY. I , III , 18 ; vel ex natura hominis ejusque conditione derivari , BURLAMAQ. III , C. IV , §. 5. Quum igitur primam propositionem fundamentalēm in alias minus fundamentales scindi nemo negaverit ; quomodo sic a nobis dissentiant , non video .

Indicatur
Legum
naturæ
fons.

§. 113. Postquam principii unius universalis possibilitatem magnumque usum perspeximus , nullis est opus ambagibus , ut illud jam dudum inventum & facile cuique obvium esse ostendamus . Quum enim medium id esse debeat , per quod recta ratio divinæ voluntatis naturaliter obligatoriæ certior fieri posse (§. 19) , hanc voluntatem vero naturæ Auctor quatalis expressis verbis haud declaraverit , manifesto colligitur , eam non aliter nobis

patefieri, quam *rebus ipsis & factis.* Itaque ex his primum educere oportet, quodnam in homine creando propositum DEI fuerit, tum vero de regulis constabit, quibus humana vita attemperanda sit, ut ejusdem voluntati pareamus. Quamobrem ii optime sensisse mihi semper visi sunt, qui *finis rerum a DEO conditarum, quatenus ex ipsa earum essentia atque natura solo rationis lumine intelligi, atque actionibus nostris liberis applicari possunt, uberrimum esse omnis legis naturalis fontem statuerunt.*

Hocce cognoscendi principium non modo diserte commendarunt HEMMINGIUS de *Leg. Nat. in Praef.* & passim; VELTHUYSIUS de *princ. Just.* in *diss. T. II.* p. 962; PRITIUS *diss. de Princ. Jur. Nat.*; WAHLIUS *Acroam. Jurisp. Tab. V. §. 11;* KNOBLACH. *diss. de pr. Jur. Nat.*; HEINEC. *ad Puf. I, III,* §. 9, n. xi; TITIUS *ad Puf. Obs. 78;* LEHMANNUS *ad Puf. I, III, §. 10;* & HOLLMANN §. 44, 46, 48; sed etiam in quæstionibus specialibus ad illud sæpe provocare debuerunt omnes J. N. scriptores. Cf. D. THOMAS *in eth. lect. § I. 2. q. 94, art. 2;* H. GROTIUS, qui L. II, C. VII, §. 2, n. 1, *a fine in moralibus optimam esse probationem,* scripsit; CUMBERLANDUS II, 7; IV, 2; V, 1, 12; COCEJUS *diss. XII, §. 45,* ubi modum Leges N. ex finibus probandi optimum esse dicit & certissimum, & ex eo universum *Jus naturæ deduci posse;* AUCTOR DUB. j. N. c. V, 12; cui principium cum fine idem esse videtur; BURLAMAQUIUS l. V, 2, 3, 10,

II, II, 3, 6, 7, & IV, 5; & DARIESIUS §. 144, Cor. IV; & denique WOLFIUS *On-tol. lat.* §. 503. Nec alia fuit mens veterum, a quibus propterea tot disputationes de finibus bonorum institutæ sunt. Audiamus loco omnium CICERONEM de Finib. V, 6. *co-gnitis*, inquit, *rerum finibus*, cum intelligitur *quid sit* & *bonorum extremum*, & *malorum*, *inventa vitæ via est*, *conformatioque omnium officiorum*. Et paullo post: *In his quid sit extre-
mum & ultimum fons reperiendus est: quo invento omnis ab eo quasi capite de summo bono & malo disputatio ducitur*. Tum i. de L L. 5, *Discendum esse*, ait, *cujus muneris collendi efficiendique caussa noti*, & *in lucem editi simus*, *quæ sit conjunctio hominum*. *His enim explicatis fons legum & Juris inveniri potest*. Sunt non pauci, qui ex rerum finibus DEI probant existentiam, nos ex illa alibi sapientiam (§. 59), nunc voluntatem derivamus, convenienter dicto Apostoli: *Invisibilia ipsius a creatura mundi, per ea, quæ facta sunt, conspicuntur*. Rom. I, 20.

*Unde uni-
ca propo-
sitione funda-
mentalis.*

§. 114. Atque ab hoc fonte primum proficiscitur fundamentalis propositio seu generalis naturæ lex: *Quæcunque actiones nostræ liberæ cum finibus rerum a DEO creata-
rum sola ratione conspicuis necessario conne-
ctuntur*, illæ sunt ponendæ, & quæ ab his fi-
nibus desuetunt, omittendæ. Igitur priores præceptæ, posteriores prohibitæ vocantur (§. 76). Quod si dentur actiones ad fines hosce adsequendos quidem idoneæ, sed non ita necessariæ, ut non aliæ reperian-
tur,

tur, quibus idem finis æque bene obtine-
ri possit, illæ ad *permisas* pertinent (§. 78).
Quum autem id , cuius cognitio ab altero
derivatur, primum non sit principium
(§. 109), consequens est, ut hæc lex na-
turæ fundamentalis, quæ ipsa ex rerum
finibus per earum essentiam & naturam
determinatis hauritur, supremum disci-
plinæ nostræ fontem non constituat.

Jam observavit SCHIERSHMIDIUS §. 172.
*Legem naturalem supremam ipsum Juris natu-
ralis generalissime sumpti principium esse non
posse, licet sit principium principio J. N. proxi-
mum.* Hinc omnes naturæ leges, neque legi
fundamentali excepta, sunt conclusiones, quæ
vel immediate ex fonte, vel mediate ex legi-
bus magis fundamentalibus sequuntur. Ita
quidem ut fons, vel lex generalis ponatur in
propositione syllogismi *majore*; actio, de
qua est quæstio, in *minore*; bonitas vel mali-
tia actionis, & hinc naturale præceptum vel
vetitum, in *conclusione*; v. c. *Quidquid cum
finibus divinæ voluntatis necessario connecti-
tur, est præceptum; sed eibum sumere necessa-
rio cum iisdem connectitur; ergo.* Contra:
*Quidquid DEI finibus repugnat, illud est ve-
titum, sed nimius potus, vaga venus iisdem
repugnat; ergo.* Et hoc modo sicuti radii
omnes in circulo a centro ducuntur, atque
in illud redeunt, ita vivendi regulæ ex ho-
minis scopo & fine patefiunt, atque ad eum-
dem contendunt. Adposite POETA:

*Vina sitim sedant, natis venus alma creandis
Servit, finem horum transiliisse nocet.*

Dein tres
partiales
proma-
nant.

§. 115. Quandoquidem hominum existentia , & facultatum ipsis tributarum usus, fines sunt intermedii (§. 58), qui ad manifestandas DEI perfectiones , & gloriam ejus illustrandam utpote ad extremum finem referuntur (§. 58) , clara utique est sapientissimi opificis intentio , ut nos finibus hisce , ad quos natura tendimus (§. 22 , 49 , 59 , Sch. 102) , convenienter vivere , & porro nosmet ipsos æque ac alios non solum conservare , sed etiam usu facultatum nostrarum nos invicem perficere debeamus . Actiones hominum liberæ , quæ gloriæ DEI amplificandæ inserviunt , *Cultum* seu amorem DEI , quæ nosmet ipsos perficiunt , *Philautiam* seu amorem sui , quæ aliis civibus perfectiō nem adferunt , *socialitatem* seu amorem proximi constituunt . Itaque tenemus causam , cur omnia hominum officia ad tria hæc capita reduci , & inde veluti a propositionibus secundum quid fundamentalibus repeti passim soleant .

Tria porro sunt objecta , in quibus naturales leges versantur , DEUS , nosmet ipsis , atque alii homines . Addunt quidam Angelos & bruta , sed illos ratione non cognoscimus , hæc vero cum obligationis moralis , tum Juris veri nominis sunt expertia . *Nihil* , ait CICERO , *hominis Juris cum bestiis III. Fin. 20.* Quod autem intuitu brutorum , & reliquarum rerum facimus , ea ex tribus prioribus

bus officiis satis explicantur. Atque cum his principiis summa est ethnicorum scriptorum cum sacro Codice harmonia. *Justitiam adferre observat CICERO*, cum cognitum habeas, quod sit summi Rectoris & domini numen, quod consilium, quæ voluntas, cuius ad naturam apta ratio vera illa & summa lex a Philosophis dicitur, Fin. IV. 5. Porro Philosophia nos primum ad deorum cultum, deinde ad ius hominum, quod situm est in generis humani societate, tum ad modestiam, magnitudinemque animi erudivit; *Tusc. I. 26.* Idemque alibi docet: *Necessarium esse ut sapiens nihil se se plus quam alterum diligat.* Tum nos natura propensos esse ad diligendos homines, quod fundatum Juris sit, de LL. I, 12, & 15. Cf. & LL. 23. Id ipsum fortiter inculcat illa sacrarum litterarum loca: *Estate perfecti, sicuti & Pater vester cœlestis perfectus est.* *Math. V, 48.* Super omnia caritatem habete, quod est vinculum perfectionis. *Coloss. III, 14.* *Diliges Dominum DEUM tuum - - - Hoc est maximum & primum mandatum.* Secundum autem simile est huic: *Diliges proximum tuum sicut te ipsum:* In his duobus mandatis universa lex pendet. *Math. XXII, v. 37, sq.* Omnia, quæcumque vultis, ut faciant vobis homines, & vos facile illis. *Math. VII, 12.* Cum altera respondet facilis, & dudum celebrata regula: *Quod tibi fieri non vis, alteri ne feceris.*

§. 116. Juvat modo omnes quos supra (§. 109) descripsimus principii cognoscendi characteres cum fonte nostro comparare, ut inde adpareat nos genuinam

Est principium nostrum verum, evidens, & adæquatum.
le-

legum naturalium stirpem detexisse. Quid autem esse verius potest, quam divini Creatoris fines sola rerum natura conspici, quos utique negari ausit nemo (§. 58, 59), aut repugnantiæ arguere (§. 29). Quid *evidentius* homini sana ratione utenti, licet alias rudissimo, quam finibus hisce convenienter esse vivendum, qui in naturali DEI cultu, & porro in sui atque aliorum perfectione, seu felicitate positi sunt (§. 115). Quid denique magis *adæquatum*, quam illud, quod naturalia officia omnia erga DEUM, seipsum, & alios complectitur (§. cit.), cunctas vero ratione non cognitas leges & mere positivas excludit (§. 113). Si igitur est adæquatum, quin *primum* fit, *universale* & *domesticum*, nequit dubitari (§. 109).

Qui veritatem principii nostri impugnare nequeunt, in illo tamen desiderant evidenciam, quod nec fines naturæ omnes cogniti sint, nec ex illis leges quævis particulares uno quasi intuitu perspici, aut immediate saltem deduci possint. GLAF. I, III, 56-60. Ast satis est nos eos fines cognoscere, e quibus omnes naturæ leges mediate saltem præmanant. Falluntur enim, qui tantum alicuius principii poscunt evidenciam, ut eo auditio statim ac sine ulteriori ratiocinio se se ultro offerant reliquæ conclusiones. V. GULDING II, 11, *sq.* Hoc enim modo neque principiis metaphysicis contradictionis, aut rationis sufficientis evidencia tribui posset.

V. LEHM. ad Puf. I, III, 10; & SCHIRSCH. §. 170, Sch. II. Pendent & in catena anni- li omnes a primo, et si hunc immediate haud ttingant. Sunt alii, qui principium nostrum adæquatum esse negant, quod commune sit rebus creatis omnibus, & legibus civilibus, HEIN. J. N. I. §. 77, Sch. Sed salva res est; illos enim fines determinavimus, quos recta ratio ex ipsa rerum natura colligere & actionibus liberis applicare potest. Urgeat nunc GLAFEY. I, III, §. 18, ex finibus rerum non intelligi hanc propositionem: *Nemo obligatur ad impossibile*: Primo enim non est hæc lex, sed legis negatio, dein aliquem ad actionem impossibilem cogere manifestis utique voluntatis divinæ finibus repugnat.

§. 117. Quicumque usum suarum facul- Ab eo
tatum ad naturæ fines collineat, is I. multi ver-
actiones liberas determinat per easdem ra- bis rece-
tiones finales, per quas determinantur na- dunt, non
turales (§. 58); II. vivit secundum natu- re.
ram (§. 102, 103); III. &c, ut alii loqui
malunt, veritatem realem sequitur (§. 29);
IV. mundi totius ordini se se accommodat
(§. 92); ac V. perfectionibus rerum con-
venienter operatur (§. 14); itaque VI.
bonum facit, & malum evitat (§. 60,
§. 15); & sic VII. quæ obligationi ex
ipsa essentia fluenti consentanea sunt, ca-
pessit, dissentanea declinat (§. 61, §. 62).
Porro VIII. DEI attributa imitatur (§. 59);
IX. tamquam creatura Creatori se confor-
mat (§. 94); X. DEUM, se ipsum, alias-
que

que ordinate amat (§. 115); & XI. in universum officia relationibus dimetitur (§. cit.); atque hoc modo XII. cum omnibus id, quod eisdem debetur, tribuit, tum XIII. voluptatem veram atque durabilem, sive felicitatem consecatur (§. 25, 79, 95). Hæ totidem sunt propositiones generalissimæ & fundamentales a variis nostræ disciplinæ cultoribus in medium prolatæ, quas, quoniam omnes patefacta & explicata sententia ad eundem exitum veniunt, atque inter se reciprocantur, facile intellectu est, verbis tantum & non re dissidere:

Primam principii formulam adornavit CHR^o. WOLFFIUS in omnibus suis operibus moralibus & præcipue Inst. §. 7, 11, 43, 44. Dein KOELERUS §. 340 - 42, multique recentiores. Secunda utebantur Stoici, qui finem bonorum existere dicebant, secundum naturam vivere, id est, vivere ex hominis natura undique perfecta & nihil requirente. CICER. Fin. V, 9. Quibus GUIL. GROTIUS I, 9, pluresque alii inhæserunt. Tertia est WOLLASTONI in del. Rel. Nat., & ASHLEY SYCKES in Exam. Princ. Rel. Nat. Quarta BODINI diff. de Jure mundi §. 6. Quinta DAKIESII Obs. f. N. XXXIII, §. 1, sqq. Sexta D. THOMÆ I, 2, Q. XCIV. Art. 2. Septimam promiscue amplexi sunt non modo scholastici Doctores, v. SOTO de J. & J. Lib. I, Q. 5, Art. 4; SUAREZ de LL. II, c. 7, n. 5; sed ipse etiam HUG. GROTIUS de J. B. & P. I, C. 1, §. 10, & 12; & SCHIERSCHMID

DIUS §. 168, 170, 172. Octavam docueret
MELANCHTHON *El. eth. doct. L. II*; & SAM.
RACHELIUS *in J. N.* & *J. diff. I*, §. 30;
OSIANDER *in Typ. leg. N.*; JÆGER. *Tr. de L.*
L. Q. 6, n. 9; ROEHRENSEE *de fund. J. N.*
§. 7. Nona est ZENTGRAVII *de Or. Jur.*
Nat. Art. 5, & 9; & FERBERI *in Phil. J.*
N. c. 1, §. 74. Decimam post BEN. WIN-
KLERUM III, 1; HUG. *de ROY diff. de eo quod*
justum, Tit. III, §. 5; HEDINGERUM *Con-*
spect. Nat. Jurisp. Q. 2, §. 13; JOH. GUIL.
JANUM *diff. Jud. Erudit. de pr. J. Nat.*;
aliosque plures eleganter illustravit J. G.
HEINECCIUS *I*, §. 79, 93. Undecimam to-
tidem verbis tradidit EPICTETUS *Ench. 37*;
& dein NIC. PRAGEMANNUS *diff. de Pr. J.*
N. §. 32, sqq. Duodecimam evolverunt SAM.
STRIMESIUS *diff. de pr. in mor.*; JOH. SENS-
TIUS *in Sched. J. Nat. sect. 3*, §. 4; &
huper SAM. COCEJUS *diff. XII. ad Grot.*
§. 50, 53. Decima tertia tandem placuit
THOMASIO I, VI, 21, 24; JOH. W. a LITH.
diff. de prim. pr. L. N. §. 13. Fluunt autem
omnes hæ propositiones ex fonte nostro, &
quoniam voce discrepant, sententiis con-
gruunt, invicem quoque sibi substitui pos-
sunt. Illud tamen prætermitti nequit, eos,
qui amorem vel perfectionem, vel DEI vo-
luntatem pro principio statuunt indetermi-
nate, leges naturales confundere cum positi-
vis; qui vero ad DEI recurrunt attributa,
multis particularibus quæstionibus difficulter
se se expedire. Ita edere, bibere, obedire
parentibus, referre gratiam benefactori, le-
ges sunt naturales; ast magna contorsione
opus est, ut istæ ad imaginem divinarum

perfectionum referantur. Cf. PUFFENDORF,
Spec. Contr. C. IV.

Multi ve-
ro princi-
pio utun-
tur inad-
sequato &
partiali.

§. 118. Non eadem est sequentium pro-
positionum ratio: I. Conserva te ipsum: II.
utilitatibus tuis in hac vita consulas: III.
vive socialiter: IV. benevolentiam om-
nium erga omnes, quæ proclivitas est alios
perficiendi, enixe promoteas: V. in hu-
mani generis durationem totis incumbas
viribus: VI. nihil denique agas, quod
perfectiones aliorum, sive pacem exter-
nam turbet. Etsi enim fundamenta hæc
vera sint atque domestica (§. 115), ta-
men priora duo solummodo officia erga se
ipsum, tertium, quartum, & quintum non-
nisi officia erga alios tam affirmativa
quam negativa, sextum officia erga alios
negativa tantum complectuntur compre-
hensione sua; igitur principia Juris natu-
ralis non sunt universalia & absolute pri-
ma, sed secundum quid fundamentalia,
& certo officiorum generi accommodata
(§ cit.); si enim hæc supremæ essent le-
ges, tunc in statu collisionis, quæcumque
officia erga DEUM iis, quæ homini deben-
tur, officiis cederent, in his vero aut pro-
pria conservatio perfectioni totius universi
(n. I. & II.), aut levia cuiusvis commo-
da propriæ conservationi essent præferen-
da (n. III. sqq.), quod tamen regulis su-
pra stabilitatis, & infra magis elucidandis
omnino repugnat (§. 88, 115).

Nunc primam, nunc secundam propositionem promiscue adhibuerunt Epicurei, quibus *Utilitas justi prope mater & æqui est*; HORAT. I. Sat. III, v. 98; v. CICER. Off. III, §. 5, *sqq.* Hisce adsentiti sunt HOBESIUS l. 7, & 10. II. 2; SCHÄRROCKIUS de Off. C. I, §. 3; PROELEUS in notis Germanicis ad Puf. L. 1, c. 3, §. 9; RECHENBERGERUS Diff. de prin. cogn. Lips. 1746. Enim vero falsum prorsus est principium ab utilitate petitum, si haec definias, quod sit, *Aptitudo præstundi nobis aliquem usum in genere, seu dependentiam actualitatis rei ejusdem alterius ab ipsa.* Tunc enim facultas physica perperam confunderetur cum morali (§. 83); v. WOLFF. Ph. Pr. I, §. 262, & 265. Ast si usum dicas dependentiam actualitatis rei cuiusdam alterius, quæ mala non est ab eadem; WOLFF. Th. N. I. §. 646; tunc principium verum quidem erit, sed inadæquatum. Tertiam multi jam e veteribus statuerunt; CICER. I. Off. 16; quos secuti sunt PUFFENDORFIUS J. n. & g. II, III, §. 10, sq. §. 15, §. 19; NIC. HERTIUS diff. de Sozial. prim. J. N. pr.; SIBRANDUS de Pr. J. N. aliique; imo H. GROTIUS ipse J. B. & P. prol. §. 8; qui tamen non docuit socialitatem esse omnium officiorum caput, sed eorum tantum, quæ aliis debentur (§. 117, n. VII). Quarta est CUMBERLANDI l. 4. Quinta STRUBII in libro, cui titulus: *Recherche nouvelle de l'origine du droit de la nature.* Tandem sextum propugnarunt EPH. GERHARDUS de J. N. L. I. C. 9, §. 19; GUNDLINGIUS J. N. ac G. C. II, §. 18; & GEORG. BEYER, de Jur. div. c. 9. §. 22.

Quæ aliae
sunt appa-
rentis in-
ter docto-
res diffen-
sus cauf-
ſie.

§. 119. Jam vero præcipuae patent cauſae tot diſſenſionum, quæ de primo Legum naturalium fonte inter plerosque Doctores fūt exortæ. Ideo enim alii I. in DEI effentia ac proprietatibus: alii II. in ejusdem voluntate naturaliter obligatoria: alii III. in recta ratione tale principium inveniſſe ſibi viſi fūt, quod illi principium poffibilitatis (§. 99), iſti principium existentiæ (§. 100), hi principium cognitionis ſubjective acceptum (§. 102) animo cogitarunt. Ex ceteris autem, qui- bus de principio congoſcendi objective ſompto, ſeu de propositione fundamen- tali, fuit ſermo, quidam IV. integrum disciplinæ noſtræ ambitum, quidam V. unum ſolummodo vel alterum illius caput (§. 115) pertractant. Re igitur ipſa ſibi haud obloquuntur.

In primam ſententiam non pancei iverunt Scholastici, quos nominat THOMASIUſ in *Jurispr. Div. C. IV, 20, seqq.*, qui tamen magnopere in eo fallitur, quod putat, hancce conformitatem cum effentia divina originem debere philoſophiæ gentili; illam enim tam rea ratione (§. 99), quam Evangelio fulciri, ex loco Matthæi V, 48, ſupra dilucide oſtenſum eſt (§. 115, Sch.). Pro altera ſen- tentia pugnarunt olim COCCEII Pater & fi- lius in *Disquis. & Traetat. de Pr. J. N.* Tertia AZORIUM Inst. Mor. T. I, L. VI, C. I, habuit advo- catum; qui vero ad IV. & V. clafsem ſpectent, id paullo ante (§. 117, sq.) vidimus.

§. 120.

§. 120. Verum a disciplinæ nostræ via plane aberrant, qui fundamentalium le-hum loco sequentes propositiones sugge-runt. I. Fac id, quod natura omnia ani-malia docuit: II. studeas generationi: III. nosce te ipsum; quippe quæ recensi-tis supra idonei principii characteribus haud sunt insignes. Nec magis ad huncce accedunt scopum, qui naturæ leges vel IV. statui integritatis & reliquiis imaginis divinæ, vel V. septem præceptis, quæ Noacho data esse putant Ebraei, vel VI. decalogi tabulis, vel VII. doctrinæ Evan-gelicæ, vel VIII. communi morationum gentium consensui tamquam unico funda-mento superstruere conantur. Quemadmo-dum enim singula hæc principia non ab huinana ratione, sed a revelatione, & au-toritate proficiscuntur; ita nec Noachi præcepta a falsitatis luspicione adhuc li-berari potuerunt, nec consensus gentium sufficieni evidentia ac veritate se com-mendat (§. 90). Pestilens vero & ab-surda est ea opinio, quæ IX. determinat *Ius naturæ cuiuscumque hominis ex sola ejus-dem cupiditate atque potentia* (§. 83).

Primum fundamentum defendisse visi sunt ARISTOTELES de Art. Rh, I, c. 13; & ULPIANUS L. 1, §. 3, D. de J. & J. quod dein nostra ætate magis elaborarunt CAR. FERD. HOMMELIUS in Propos. de novo Syst. J. N. & G. Lips. 1747. Et ex illo JOH.

JAC.

JAC. SCHMAUSIUS in *Novo Syst. J. N. Gotting.* 1754. Sed illud supra satis refutavimus; quia non ineſt in primis naturæ conciliatiobus honesta actio, consequens enim eſt, & post eritur; CICER. *Fin. III*, 6. Secundum eſt HAUSCHILDI in *Nova basi J. N. Dresdæ* 1738. Tertium JOH. GOTT. ROSÆ in *diss. de cognitione sui, J. N. prin. Jenæ* 1718. Quartum VAL. ALBERTI in *Comp. J. N. Lips.* 1676. Quintum SELDENI in *J. N. & G. juxta discip. Ebræor. L. I, C. 10.* Sextum HEMMINGII in *Apodiſt. Metb. I. N.*; & JO. OLDENDORFII in *Isagog. J. N.* Septimum GRATIANI in *distinſt. I. pr. & PRASCHII in Design. J. N. ex discipl. Christ.*; quod tamē si admiseris, aut duo priora, sequetur Adamum multosque ejus posteros principio cognoscendi caruisse. Octavum legitur apud CICERONEM: *Omni autem in re, inquit, consensio omnium gentium lex naturæ putanda eſt. Tusc. I, 13;* atque hæc probandi ratio etiam Grotio, prol. §. 40, & I, I. §. 12, 1, reliquis popularior eſt viſa, ut ab eo quod posterius eſt, quid Jure Nat. obtineat, colligatur. Nono adhæſit SPINOSA in *Tract. polit. C. XVI*, doceus *J. N. nihil nisi quod nemo cupit, & nemo potest, prohibere.* Sed, dum hoc modo potentiam physicam cum morali commiscuit, secundari omnino negavit.

Ad legum
natura-
lium pro-
prietates
pertinet
I. earum
perſpicui-
as.

§. 121. Ex datis antea principiis, du-
cuntur Legum naturalium proprietates.
Ita quoniam earum indicia existunt in na-
tura rerum (§. 113), atque innatis cui-
que ſtimulis (§. 102), pleniffima autem
cognitio adhibita attentione & intelligen-
tia.

tia a nobis met ipsis comparari potest (§. 103); nemo iverit inficias, plana esse, liquida, & sufficienter promulgata naturalia morum præcepta (§. 73), superabili porro ignorantia illos omnes labore, in quorum potestate possum sit, ut ratione utantur (§. 71, Sch.). Neque artificiosa ad id requiritur argumentorum concatenatio, siquidem generalibus legum capitibus etiam abjectioris ingenii homines adsentientur statim (§. 116): quæ vero inde fluunt remotiores conclusiones tunc saltem illis innotescunt, si agere parati ad res circumstantes animum advertere, has cum aliis similibus sive præteritis sive futuris conferre, atque ad nota jam principia reducere volunt. Sæpe tamen *Faſti*, hoc est, rerum singularium, quæ sub genere lege determinato comprehensæ sunt, inficitia hujusmodi est, ut neque ab acutioribus depelli queat ob involuntarium experientiæ defectum (§. 105).

Nunc intelligimus illorum sententias, qui leges naturæ sine auctoritate disci posse negant, nec tamen invincibilem admittunt illarum ignorantiam, habito usu rationis, esse hujusmodi, ut una ab altera necessario destruatur. Cf. DESING *Jus N. C.* III, Th. 21, & Th. 24, n. 2, juncto C. VII, Th. 2. Sed ais: Medicinæ & matheſeos regulas sola quidem ratione reperiri, nec tamen dici natura notas; igitur & morum præcepta eo tantum sensu patere, quo, ut loquitur HORBESIUS

de Civ. G. XIV, §. 19, Archimedes inuenit ratione naturali, quam proportionem habeat sphæra ad Cylindram. Quid enim secus oporteret dare operam descendis rebus aliunde manifestis? Nam vero curam morborum & quantitatis dimensiones tota vita prætermittere homo sanus suique compos potest, ab omni actione morali abstinere non potest: haec igitur regnæ semper necessariæ sunt, non illæ, ad quas porro neque inclinationibus congenitis ita stimulamur. Consentunt PSALMISTA: *Præceptum*, ait, *Domini lucidum illuminans oculos*: *Ps. XVIII, v. 19*; & SENECA: *Natura*; inquit, *quidquid nos meliores beatosque facturum est, aut in aperto, aut in proximo posuit*; *de Benef. VII, C. 1*; Cf. *Sapient. Cap. VI, v. 3*. Ideo autem discimus has leges, quia, *ars tamen dux certior, quam natura*; CICER. *Fin. IV, 4*; & quia, *Quæ bona sunt fieri meliora possunt doctrina*; *idem Orat. I, 25*; præcipue vero ut, quod alias in infinita dispescitur, in una cognitione positum sit.

II. Certitu-
do mathe-
matica.

§. 122. Utrum vero legum naturalium, maxime earum, quæ operosiore ratiocinio nituntur, tanta certitudo sit, quanta propositiones mathematicas commendat, id nonnulli in disceptationem vocarunt. Sed quum de propositionibus mathematicis certa & necessaria veritas ideo enuncietur, quod a principiis evidenteribus apta concludendi ratione derivantur, hæc ipsa autem principiorum necessitas & evidencia neque in nostra defit disciplina (§. 116), satis

lquet, in moralibus non minus, quam in mathematicis veritatibus absolutam perfectamque certitudinem inveniri posse, dummodo nihil sumptum sit, quod nostrum non rapiat assensum, nihilque in argumentandi modo a legitimis de non strationum regulis discedatur. Quare, quæ objici solent ambiguitates, illæ non a legis incerto, sed vel a non usu intellectus, vel a facti quæstione (§. 121) nascuntur.

Parem esse in doctrina morali, ac in mathematicis disciplinis certitudinem negavit ARISTOTELES *Eth. ad Nic.*, I. c. 1, eumque secutus est H. GROTIUS triplicem ob causam. I. *Quia Matheſis a materia omni formas separat*: II. *quia formæ ipſæ tales plerumque sunt*, ut nihil habeant interjectum, sicut inter rectum & curvum nihil est medii; III. *quia in moralibus circumstantiæ etiam minimæ variant materiam*; *de J. B. & P. II, XXIII, §. 1.* Sed nulla in his appetet differentiæ ratio. Primo enim profitetur ipſe GROTIUS: *Sicut mathematici figuras a corporibus semotas considerant*, ita se in Jure tractando ab omni singulari abduxisse animum; *Prol. §. 38.* Deinde actiones liberas singulares, quæ mediae sint inter bonas & malas, jam supra exemplimus (§. 64); postremo nihil attinet, legum materiam a minimis circumstantiis variari; siquidem minima accessio, vel decessio quantitatem quoque mutat, at nihilo minus firmæ manent matheſeos regulæ, illisque quævis species applicantur. Neque enim

cer-

certitudo a qualitate objecti, sed ab evidentiâ principiorum & legitima concludendi methodo pendet, quæ duo adjumenta habet & morum disciplina, ut non magis certum sit totum majus esse sua parte, quam creaturam creatori obsequi debere. Illud tamen præclare admonitum est a LOKIO. Mathesin in eo præstare visam esse morali doctrinæ, quod illa ideas quantitatis constantibus signis veluti numeris, figurisque adjuvaret; hæc autem vocibus tantum uteretur ambiguis, quæque nunc ideam simplicem, nunc compositam, nunc a priore plane diversam enuntiarent; dandam itaque operam, ut, definita semel vocabuli potestate, hoc ad alias notiones significandas numquam trahatur; *de Intell. Hum. IV, C. II, §. 9, sq. & C. III, 18, sqq.* Sed nec veritates mathematicæ affectibus, & sensuum illecebris obscurantur, sicut veritates morales,

III, Im-
mutabili-
tas.

§. 123. In eo autem naturæ leges a reliquis omnibus maxime discernuntur, quod sint immutabiles. Hæ enim solæ in ipsa hominis rerumque essentia vel absolute, vel cum certis adjunctis consideratae rationem habent (§. 89, §. 99), & simul actionum convenientiam, vel disconvenientiam exprimunt cum perfectissima DEI essentia atque natura (§. 117). Quum igitur divini numinis attributa rerumve ab eo conditarum essentias alicui mutationi subiectere (§. 99, Sch.), aut ab actionis notione vel simplici, vel hypothe-

theticus effectus, ob quos bona dicitur vel mala, separare, involvat repugnantiam (§. 61); consequens est, ut etiam naturalia Jura eadem semper manere debeant atque immutabilia, nec juberi aut permitti unquam possit, quod illis est prohibatum; nec, quod iisdem praeceptum est, vetari.

Fingas possibilem esse naturalium legum mutationem; tunc, DEUM negare, licitum, ejusdem vero gloriam illustrare, illicitum fieri posset, quod non minus absurdum est, quam si a triangulo tres lineas auferri posse putes. Sicut autem DEI attributa non ex ipsius voluntate, sed ex essentia concipimus; ita ex hac, & non ex voluntate juris naturalis immutabilitas est eruenda. Dantur enim leges, quas DEUS non voluit nisi pro tempore, & quae porro sine mutatione divinæ voluntatis cessant; cujus rei exemplo sunt leges Ebræorum ceremoniales & forenses. Quare nihil evincit COCCÆJUS *ad Grot. diff. I, sqq.*, quum negata interna actionum moralitate, inde tamen naturæ leges immutabiles esse contendit, *quia DEUS illas semel voluit*. Quandoquidem illa vera est atque unica ratio, quia in ipsa rerum hominisque natura innuntuntur. Adposite CICERO: *Huic legi nec abrogari fas est, neque derogari ex hac aliquid licet, neque tota abrogari potest. Nec vero aut per senatum, aut per populum solvi hac lege possumus*; apud Lactant. *Inst. Div. VI, c. 8.*

Quam qui-
dam im-
pugnant
sine caus-
e

§. 124. Illud equidem negari nequit, sæpe imaginem quamdam mutationis fallere minus attentos posse, quum nimirum leges, quæ nonnisi pro certis circumstan- tiis latæ sunt, cessante eo rerum statu amplius non apparent. Re vera tamen nulla fit ipsarum legum mutatio, quippe quæ posita nova hacce peristasi nunquam antea existiterunt (§. 87); & quæ e contrario, priore specie iterum obveniente, idem semper servant robur. Nec propterea quidquam negatur de DEI omnipotentia; hæc enim vis est omnia agendi possibilia, seu quæ salvis divinis perfectionibus intel- ligi possunt; ob id ipsum igitur, quod DEUS fit omnipotens, nihil de eo enuntian- dum est, quod infinitæ illius essentiæ re- pugnaret (§. 121). At inquis: homines sæpe juri sibi competenti renuntiare? Utique renuntiant, non tamen juri stricte tali, quod a determinata lege pendet, sed juri tantum permissivo. Denique nec in statu collisionis alterutra mutatur lex, ve- rum casu atque eventu impossibilis fit utriusque custodia (§. 88).

Decalogi præcepta per DEI omnipotentiam esse mutabilia opinatus est OCKAMUS apud Suarezium de LL. II, p. 15, n. 3. Perpe- ram; siquidem in ente infinito non ea vis concipitur, qua aliquid simul sit, & non sit, nec porro, qua id, quod essentialiter a per- fectissima recedit natura, ut ad eamdem etiam

occident , obtineatur. Verum juvabit hæc exemplis magis illustrare. Lex est naturalis , *agrotis opem ferre* ; quod si omnes bona videntur valetudine , ideo nulla sit legis mutatio , sed desinunt solum materia & circumstantiæ , quibus lex est circumscripta. Proin lex , *non occides* , variationem excludit , quamvis in statu collisionis ad propriam vitam defendendam fiat exceptio ab una lege , ut conservetur altera (§. 88 , sch.) Quia in re non de voce tantum disputamus , an scilicet talis actio *homicidium* sit dicenda , ut facit THOMASIUS J. D. L. I. c. 2 , *sqq.* nec enim tot habemus vocabula , quot sunt adjuncta , quæ ipsam actionis essentiam efficiunt diversam ; sed id unice quærimus , an tunc vitam alicui adimere lege naturali vetitum fuerit , & hoc infra negabimus. Denique , quod ait ULPIANUS , jus positivum neque in totum a naturali recedere , nec per omnia ei servire ; sed nun addere aliquid , nunc detrahere , L. 6 , D. de f. & f. , illud ad jus naturale permisivum pertinet , seu libertatem moralem.

§. 125. Quidquid immutabile est , idem & necessarium esse oportet , siquidem , quod ei oppositum est , repugnat (§. 37). Itaque ex naturalium legum immutabilitate illarum quoque necessitas concluditur. Quamquam enim existere vel non existere fortuitum erat rebus creatis omnibus (§. 5) , hominis tamen rerumque essentia , qua veluti fundamento nituntur naturæ leges (§. 99) , fortuita non est , sed necessaria ; ceteroquin , idem esse & non esse .

esse, foret statuendum. Neque hisce obstat, obligationis naturalis vitm non modo ex simplici actionis notione, sed ab externis simul fortuitisque adjunctis saepe proficiendi (§. 60). Inde enim tantum consequitur, ut legis necessitas alia absolute sit & simplex, alia tantum hypothetica; scilicet quoties eadem adsunt adjunctiones, necesse est illis easdem quoque leges indissolubili nexu cohærere.

Figuram triangulam tria habere latera absolute necessarium est, quia illa abesse omnino repugnat. Latera vero omnia trianguli esse aequalia necesse est tantum sub conditione si fuerit aequilaterum; nam salva manet trianguli essentia, et si aequicrurum sit, vel scalenum. Pari ratione lex, gloriā DEI non obscures, absolute necessaria est, quia a nulla penitus conditione pendet: lex vero, *educa prolem*, necessaria est hypothetice, si problem suscepis. Unde sit, ut conditionis quidem existentia sit fortuita, non autem legis. Contra, quoniam ex natura ultimae voluntatis, utrum coram quinque, sex, aut septem testibus ea declaranda sit, nec absolute nec conditionate erui potest, lex, quae iubet septem testes adhiberi, arbitraria est, atque contingens. Legum naturalium necessitatem optime perspexit CICERO: *Quod si tanta, inquit, potestas est stultorum sententiis, atque jussis, ut eorum suffragiis natura vertatur: cur non sanciunt, ut, quae mala pernicioseaque sunt, habeantur pro bonis, & salutibus;* de LL. I, 16.

§. 126. Mirari jam non licet , naturæ *Æternitatis*
 præscriptiones a sanioribus Philosophis ^{tas.}
æternas etiam nominari ; quod qui faciunt ,
 non id quidem sibi propositum habent ,
 ut doceant earum promulgationem divino
 numini esse coævam ; quis enim nescit ,
 hanc primum cum humano genere pro-
 ditam fuisse ? Sed ostendere volunt natu-
 rales leges ad DEI essentiam expressas esse
 atque naturam , easque ad æternæ & im-
 mutabilis veritatis enuntiata pertinere .
 Fuit sane in mente DEI ab omni æterni-
 tate boni malique distinctio , neque is ve-
 ritates morales , ex propria & hominum
 essentia fluentes , alio sibi repræsentare
 poterat modo , quam quo nunc sunt ,
 quum e contrario , quin diversa existere
 possit legum positivarum repræsentatio ,
 nulla adpareat repugnantia .

Etiamsi quadratum existat in tempore , ta-
 men veritas illa mathematica , *Angulos qua-
 drati omnes esse rectos* , quia necessaria est ,
 atque immutabilis , æterna etiam dicitur ;
 quid ergo vetat veritati morali , cui par-
 competit necessitas & immutabilitas , æter-
 nitatem quoque tribuere , licet temporaria in
 nobis sit ejusdem cognitio ? Sane providen-
 tiā , quæ cura est DEI pro creaturis , ne-
 mo negaverit esse æternam , quamvis actua-
 lis mundi gubernatio cœperit in tempore .
 Neque dicas cum BURLAMAQUIO II , V , §.
 11 , etiam leges positivas DEO fuisse ab
 æterno notas ; nam , quum necessariæ ha-

non sint , sed fortuitæ , atque a liberrimo
DEI decreto pendeant , haud opus est , eas
concipere ut principio carentes ac fine. *Hunc*,
inquit CICERO , *video fuisse sapientissimorum*
fententiam , *legem neque hominum ingenio ex-*
cogitatam , *nec scitum aliquid esse populorum* ,
sed æternum quiddam , *quod universum mun-*
dum regeret - - - - *cujus vis non modo senior*
est quam ætas populorum , *& civitatum* , *sed*
æqualis illius cælum atque terram tuentis &
regentis DEI - - - - *Quæ non tum denique in-*
cipit lex esse cum scripta est , *sed tum cum orta*
est. *Orta autem simul est cum mente divina* ;
de LL. II , 4. Consentunt sacræ litteræ :
In æternum omnia judicia justitiae tue :
Psalm. 118, v. 160.

VI. Mate-
tria, quam
tractant,
intrinseca
moralitas.

§. 127. Ut bonitas vel malitia actio-
num generatim in internam vel externam
abit (§. 67) , ita moralitas , quæ bonita-
tem vel malitiam speciatim moralem desi-
gnat (§. 62) , siquidem in ipsa actionis
liberæ essentia rationem sufficientem ha-
bet , interna , si vero ab arbitrio entis ali-
cujus intelligentis proficiscitur , externa
nominatur. Itaque quatenus hominis at-
que actionum humanarum existentia a li-
berrima DEI voluntate pendebat (§. 100) ,
ea etiam ex parte illarum moralitas exter-
na est sive subjectiva ; quia vero DEUS nec
id , quod infinitæ suæ essentiæ necessario
erat conveniens , prohibere , nec , quod
eodem repugnabat , præcipere poterat (§.
123) , & ob hanc ipsam caussam notas ac

mutationes essentiales, propter quas omnes actiones nostræ liberæ bonæ dicuntur vel malæ , ab iis sejungere , non magis subiectum erat libero dei arbitrio & omnipotentiae , quam rerum evertere proprietates atque essentias (§. cit.), eatenus istis actionibus intrinsecam seu objectivam moralitatem denegare foret perabsurdum. Ex his vero palam fit , objectum proprium , in quo leges naturales versantur , in internâ moralitate reperiri.

Si quis ab altero rationem postulat , cur v. c. vetita sit hypocrisis , & ferat responsum , quia DEUS eam non vult , nondum acquiescit , sed scire adhuc cupiet hujus ipsius voluntatis causam , & tunc demum interrogare desinet , ubi intellexerit , fictam pietatem divini numinis essentiæ repugnare ; liceat igitur ad mentis nostræ exilitatem verba accommodare. Actionum bonitas vel malitia radicalis , fundamentalis seu inchoata adest in signo antecedente omnem leget ; quamvis illæ plenam , formalem , seu consummatam moralitatem in signo præceptum , vel vetitum consequente accipient. Quare actiones nostræ liberæ non ideo tantum bonæ sunt quia præceptæ , malæ quia prohibitæ , sed illas DEUS quia bonas præcipere , & quia malas prohibere voluit. Neque enim , ait CICERO , esse mens divina sine ratione potest , neque ratio divina non hanc vim in rectis pravisque sanciendis habere , de LL. II , 4. Igitur qui in ipsa materia , quam lex tractat , rationem esse negant , sed totam re-

petunt a legislatoris voluntate , ii affirmant pugnantia ; cunctas scilicet leges esse positivas (§. 89), nullam naturalem (§. 93) , & quia quod actioni est extrinsecum , id etiam contingens est & mutationi obnoxium , nullam immutabilem (§. 123) , atque adeo arbitrarias esse rerum omnium essentias (§. 99). Longe aliter idem CICERO : *Quod laudabile bonum est , in se habeat , quod laudetur necesse est ; ipsum enim bonum non est opinionibus , sed natura , de LL. 17.* Atque id aper- te a Psalmista confirmatur , *Judicia , inquit , Domini vera justificata IN SEMETIPSIS. Ps. LVIII , 10.*

Cui ad-
ver-
sario-
rum argu-
menta
nullo mo-
do refra-
gantur.

§. 128. Nec est quod objiciant adversa-
rii , peccare hominem varios actus exer-
centem , qui sine ullo malo a brutis pa-
trantur ; nullam porro in ipsa actione tur-
pitudinem inesse ante legem positam , &
ideo in orbem vitiosum circumagi schola-
sticos , quod nunc actionem bonam , quæ
legi congruat , malam , quæ legi refrage-
tur ; nunc vero lege præceptam , quæ bo-
na , prohibitam , quæ mala sit , definiant:
immo admissa posteriore hac explicatione
statui ab iis principium extrinsecum DEO
prius aut coæternum , quod ipse in af-
signandis rerum formis sequi necesse ha-
buerit. Primo enim dispar admodum est
hominum , & brutorum natura : fiunt
quidem in his motus physici & animales ,
liberi autem non fiunt , de quorum tamen
proprietate modo unice quærimus : dein

cum

cum bona dicitur actio ; quæ legi consen-
tanca est , mala , quæ a lege recedit ; id
non illum sensum habet ; quasi actionum
humanarum essentiae a libera , & tempo-
raria naturalis legis manifestatione omnem
suam bonitatem vel malitiam hauserint ;
sed quod lex naturæ præcipiens non aliud,
quam quod in se bonum , prohibitoria ni-
hil , nisi quod in se malum est , enuntiet
(§. 82 , Sch. , §. 127 , Sch.) , ultima autem
boni hujus vel mali ratio a confessione
ducitur , vel dissentione actionis cum di-
vina essentia atque natura (§. 99 , §. 125 ,
Sch.) , quam libertati & voluntati præire
animo concipimus . Falsum igitur est hu-
manas actiones non subjici deo , sed alteri
externæ caussæ .

Hæc præcipua sunt fundamenta , quibus usi
sunt Pufendorffius , Coccejus & eorum asse-
clæ , ut doctrinam Grotii & Scholasticorum ,
veluti monstruosam convellerent , sed irrito ,
tuti patet , conattu . Quis enim ignorat ,
aliam esse actionis physicæ , aliam liberae
essentiam , & hinc diversas quoque earum
mutationes , sive conjectaria esse debere .
Nonne actionem bonam , quatenus a liber-
tate proficiscitur , spes , voluptas , animi
quies , malam vero metus , pœnitentia , tæ-
dium mentisque perturbatio comitantur (§.
94) ? Quæ conjectaria , quoniam a solo mo-
tu phisico fluere nequeunt , ad bonitatem
vel malitiam moralem tantum pertinent .
Nec quod secundo loco objectum est de lego

bonum efficiente vel malum , majoris est ponderis ; est enim lex naturalis homini , quod naviganti pixis nautica , ambæ viam rectam ostendunt quidem , non autem faciunt . Accedit eo , quod quamvis regula instrumentum sit ad lineas rectas facile scribendas comparatum ; inde tamen non sequatur , ut nulla antea fuerit linea recta , quam aliquod euthygrammum existeret . Denique , qui bonum vel malum cogitat ante omnem legem , tam parum D^EO principium statuit coeternum , quam qui duo & tria docet esse æqualia quinque , ante liberum D^EI decretum ; una enim veritas æque necessaria est ac altera . Cæterum putat CAR. GOT^T. MULERUS Ph. Pr. Un. §. 27 , a Pufendorfio non negari intrinsecam moralitatem , sed extrinsecam tantum dethonstrari . Quod sane foret verisimilius , nisi falsam & ineptam vocasset Grotii sententiam Er. Scand. V , 7 , & hoc nomine tam acrem atque acerbam dicam scripsisset in scholasticos Doctores .

VII Conceptus pro parte possibilis abstrahendo a prima rerum causa.

§. 129. Quamquam omnium possibilium fons atque origo a D^EO repeti debet , ut nec rerum essentiæ & naturæ , nec quæ de iis traduntur disciplinæ , possibiles essent , nisi idem existeret (§. 99) , tamen nulla dubitatio est , quin cœlum , terram , semetipos , aliasque creaturas intueri , ac quibus hæc omnia utantur mechanicis regulis , investigare ac concipere queant homines , et si non cogitent de suprema quadam causa (§. cit. & §. 28) . Eadem igitur ratione , ii , qui in ignoran-

tia

tia vel errore versantur summi numinis, aut ab illo abstrahunt, nihilominus obligationem aliquam & legem moralem tam erga se ipsos, quam erga alios intelligere apti sunt, si modo in proprias facultates, nec non in actionum liberarum naturam inquirere, tum quænam cum durabili voluptate, animi acumine & oblectatione, sanitatem, spe, benevolentia aliorum, quænam contra cum tædio, ægritudine, imbecillitate, tristi recordatione, metu, egestate, morbis mutuisque odiis necessario connexæ sint, perspicere atque experi-ri velint. Unde fit, ut firma semper adsint & perpetua quædam vincula, quibus insipientes, licet frenum mordeant, etiam in mortali hac vita compescantur.

Id est, quod etiam contendit HUGO GROTIUS de I. B. & P. in prol. §. XI, cum ait: *Et hæc quidem, quæ jam diximus (de societatis custodia), locum aliquem haberent, etiam si daremus, quod sine summo scelere dari nequit, non esse DEUM, aut non curari ab eo negotia humana. Quæ verba coccejus ad hunc locum, aliquique commentatores inepte cavillantur, & parum acute. Non enim Grotius DEI essentiam, aut voluntatem a legibus naturæ excludit (§. 100, Sch.); sed fingere aliquid voluit docendi caussa; ut si quis daret, hoc est, diceret, non esse DEUM, aut nullam curam habere pro creaturis; propterea non putaret, se omnes morum regulas pedibus impune conculcare pos-*

posse, Quia sicut in matheſi, physica, medicina leges mechanicæ noſcuntur ex contemplatione naturæ; ita ex eodem fonte leges quasdam morales haurire licet, quemadmodum id Sinesium atque Spinozæ exemplo confirmari ſolet. *Urgent rustice ſane*, ut verba CICERONIS mea faciam; *negant enim posſe* (concipi naturales leges ſine naturæ au-
toſore) & in eo perſtant. *Hoc verbum quid va-*
leat, non vident. Cum enim querimus ſi poſſint
(ſe subtrahere DEO), quid facturi ſint ?
Non querimus poſſintne (ſe subtrahere), ſed
tamquam tormenta quædam adhibemus, ut ſi
reſponderint ſe impunitate proposita facturos,
quod expediat, facinorosos ſe eſſe fateantur. Si
negent, omnia turpia PER SEIPSA fugienda
eſſe concedant. *Off. III, 9.*

Quidquid alii oblo-
quantur. §. 130. Occurramus modo eorum ar-
gumentis, qui averfa cogitatione a DEO,
nullam proſlus obligationi naturali locum
fore putant. Abelle enim ajunt, qui ur-
geat legis cuſtodiam, & non obedientes
cogat. Hinc morum præcepta conſilia
potius eſſe quam leges, quæ nullæ ſint
ſanctionis defectu; denique omnes a ctio-
nes nostras tunc a ſola determinari utilita-
te, cui tamen quilibet facile renuntiare
poſſit. Sed jam alibi vidimus, etiam ab
externis DEI & hominum legibus abelle
coaſtioneſ physicam (§. 99, Sch.), bo-
na autem ipſa vel mala cum actionibus
noſtris neceſſario copulata (§. 125)
agendi vel non agendi neceſſitatē mora-
lem

Iem imponere , & legem (§. 71 , Sch.)
a consilio plane diversam (§. 75 , Sch.).
Nec minus ostensum est a nobis , obliga-
tionem nullo modo cum vera utilitate pū-
gnare (§. 188 , Sch.), quicunque enim
huic renuntiat , aut præmii jacturam pati-
tur , aut pœnæ sensum nequit effugere.
Qui vero naturales hasce consecutiones
præmiorum vel pœnarum numero ex-
imunt ; næ illi verborum quærunt non re-
rum discrimina , & humanæ sanctioñis
idea conturbati in vocum controversiam
delabuntur.

Primum naturalis legis fundamentum in
agnitione summi numinis possum esse , ne-
mo magis inculcavit quam LEIBNITIUS in
Ep. Cens. ad Puf. §. VI ; at ipse fatetur ta-
men , dari aliquem infimum Juris naturæ
gradum , qui etiam apud atheum valere possit.
l.c. Quo circa probe observatum est a SENE-
CA , malitiam ipsam maximam partem veneni
sui bibere ; Ep. 81. Contra magnum præmium
esse felicis animi immotam tranquillitatem ; de
Ira II , C. 13. Idem suggerunt plura sacri
codicis loca , quando nos docent ; Legum
custodiam longitudinem dierum , & annos vi-
tae , & pacem apponere ; Prov. III , 1. Qui
vero sibi invidet nihil esse illo nequius , &
hanc redditionem esse malitia illius ; Eccl.
XIV , 6. Quemadmodum igitur pœna gladii
in homicidas statuta vera pœna est , quia le-
gis contemptorem morte destruit immatura ;
ita etiam illa mors erit vera pœna , quæ luxum
con-

consequitur , aut intemperantiam , aut iram ,
aut alios vehementiores affectus . Semper
enim , ut ait CICERO , *illum ulcisen tur mores*
sui ; ad Attic. IX , Ep. 12. Dices fortasse :
placere agenti has consecutiones , & porro
poenas non esse ! Quid enim si tædio vitæ
quis delinquat , ut occidatur ? Quid si eo ve-
nerit dementiae , ut damnatione se delectari ef-
ficiat ? Malum tamquam motivum vel in hac ,
vel in futura vita cum actione libera conjun-
ctum , et si quis sibi ut bonum repræsentat ,
non minus erit poena , quam circulus est ro-
tundus , licet alicui flulto quadratus videatur .

Plena ta-
men ea-
rum san-
ctio non
habetur
sine vita
futura.

§. 131. Ast illi quoque immane quan-
tum falluntur , qui in hisce actionum
consectariis integrum quærunt naturalium
legum sanctionem , remota consideratiope
vitæ futuræ . Nec enim interna præmia
vel poenæ omnem probitatis aut malitiæ
gradum adæquant . Immo non ita raro of-
ficii sui memores ferrea premit vitæ fors ,
ii vero secunda obveniunt , qui nullum
habent cum ratione commercium (§. 94) ,
ac proin a divinis perfectionibus alienum
esset , obedientes cum refractariis confun-
dere & cunctos pari modo dimetiri (§.
cit.) . Ex quo intelligitur , deficientem in
hac vita bene vel male factorum compen-
sationem nos post mortem præstolari
oportere . Id ipsum arguet simplex & in-
dividua mentis natura , & ad novas sem-
per acquirendas perfectiones capacitas ,
quæ dotes frustra a deo nobis essent tribu-
tæ ,

tæ , si animus a corpore separatus funditus interiret. Certe tunc manca admodum forent divinæ voluntatis præcepta , nullumque tam magnum excogitari officium posset , cui durationem propriæ existentiæ quisquam teneretur postferre.

Pugnat secum ipso Pufendorffius , cum legem naturæ concipi posse negat sine DEO , qui sua providentia omnia moderetur & aliquid boni vel mali in nos velit , & possit conferre ; *Off. H. & C. Lib. I , c. IV, §. 4;* & finem tamen nostræ disciplinæ attingitu hujus vitæ circumscribit. *Praefat. §. VI.* Quæ enim tunc speranda præmia , vel quæ metuendæ forent poenæ ? Certe externa fortuitaque commoda aut calamitates generatim hoc reduci nequeunt ; siquidem malis bene , & bonis male esse saepius experimur. Ita profere omnia successerunt Sullæ , qui patriam sere evertit , & innumeros concives suos crudelissime trucidavit. Quocirca Pufendorffium merito notavit LEIBNITIUS *Ep. Cens. ad Puf. §. 6.* ostendens , futuræ vitæ curam cum providentia divina esse inseparabiliter connexam , quam qui omittit , scientiam pulcherrima sui parte multet , & non pauca hujus quoque vitæ officia tollat : *Dempto* , inquit CICERO , *augurio futurorum* , quis tam amens esset , qui semper in laboribus & periculis viveret ? *I. Tusc. 15.* Nec satis est , ut putat BARBEYRACIUS *ad Puf. l. c. ad DEI voluntatem provocare* ; quin potius omnes obligationis naturalis incidit nervos , qui necessitatem moralem fingit ea agendi , quæ nos

nos destruant sine alia majoris boni futurè retributione (§. 21, Sch. 4, §. 71), atque hoc sensu scripsit APOSTOLUS: *Si in hac vita tantum in Christo sperantes sumus, misericordiores sumus omnibus hominibus*, I. Corinth. XV, 19. Ind fit, ut connato quisque agatur sensu, & desiderio alterius vitæ (§. 19, Sch.), & ut communis insit gentibus persuasio animam cum corpore non deleri. Cujus persuasionis quum summa sit necessitas, ne homines ab officio tam facile removeantur; quidnam cogitari posset DEO injuriosius, quam eum ad fines suæ voluntatis asequendos illusione indigere? Sed rei huic toti revelatio plenam affudit lucem; Math. X, 28, & XXII, 31. Quapropter imperfectum adornant legis naturalis systema, qui vel solam naturam considerant sine DEO (§. 7, & §. 129), aut qui ad solum DEI se referunt arbitrium prætermissa natura (§. 129).

VIII. Uni-
versalitas.

§. 132. Illud porro naturæ legibus præter ceteras præcipuum est, ut pateant quam latissime. Nam quum eadem ab humana essentia atque natura vel simpliciter, vel cum certis quibusdam circumstantiis considerata, suam proxime trahant originem (§. 100), sequitur, ut omnes homines rationis participes legibus iis simpliciter subjecti sint, quæ absolute necessariæ sunt; quarum vero necessitas tantum hypothetica est, omnes homines, qui in eadem conditione ac statu versantur (§. 60, §. 125), sed & ad quasvis actiones

actiones nostras liberas pertinent leges naturales, si quidem nulla excogitari hujusmodi actio potest sine aliqua intrinseca bonitate vel malitia morali, in qua etiam naturalia vincula & normae suum habent fundatum (§. 93). Quæ igitur, neglectis animi motibus, de actionibus tantum externis instituitur tractatio, illa omnes disciplinæ nostræ partes complexu suo haud continet.

Hinc est, quod leges naturales dicuntur uniformes, adæquatae & tam subjective quam objective universales; *Jus commune hominum*, L. 6. pr. de J. & J.; *Jus & fas gentium*, L. 9, ead. Nec enim, ut ait CICERO, erit alia lex Romæ, alia Athenis, alia nunc, alia posthac, sed omnes gentes & omni tempore una lex, & sempiterna, & immutabilis continebit, apud Lat. Etant. Inst. Div. VIII, c. 6. Leges humanæ ita scribi non possunt, ut omnes casus comprehendant, sed de eo feruntur quod plerumque fit, L. 7, sqq. de LL. Ast lex naturalis ad quasvis etiam rarissimas species pertinet: nam nulla vitæ pars, neque publicis, neque privatis, neque forensibus, neque domesticis in rebus, neque si tecum agas quid, neque si cum altero contrahas, carere officio potest; CICER. Offic. I, 2. Quare si ars nostra in toto suo ambitu tradi velit, Compositum *Jus*, fusque animi sanctique recessus, Pers. Sat. II, v. 73, ab ea nequeunt separari. V. L. I. §. I. D. de J. & J.

IX. Sanctitas atque X. Facilitas.

§. 133. *Sanctum* id dicitur, quod a violatione modo quodam præstantiore defensum, atque munitum est; facile autem, cuius efficiendi quum fortia sint momenta & caussæ, ab eo tamen nullis tam gravibus impedimentis revocamur; jam vero una ex parte leges naturales adeo pœnis sunt munitæ, ut quoniam hæ nullo tempore, nulloque loco a quopiam evitari possunt, inobedientes in statum veri tædii (§. 81 Sch., n. 5, & §. 25), sive in infelicitatem incidere oporteat: altera autem ex parte, sensus internus, rationis lumen totaque nostra ac rerum natura nos perpetuo invitant ad earum cultum, quem qui adhibent, statum gaudii durabilis, sive illam, quæ hic esse potest, felicitatem attingunt (§. 80 Sch., §. 25). Hæc quum ita sint, dubitari profecto nequit, quin in legibus naturæ & summa sanctitas, & maxima facilitas cluceat.

Non igitur audiendi sunt, qui legum semitam per se arduam, & quasi imperviam esse volunt, quæ quidem aperta est & simplex & directa, ast *ex cupiditatibus*, ut præclare observat CICERO, *odia*, *dissidia*, *discordiae*, *seditiones*, *bella* nascuntur, nec hæ se se foris solum jaçtant - - - sed intus etiam in animis inclusæ inter se dissident atque discordant. Ex quo vitam amarissimam necesse est effici: ut sapiens solum nature finibus contentus sine ægritudine possit, & sine metu vivere; de Fin. Bon. I, 13. Hoc idem nos docet divinæ veritatis

ef-

effatum: *Jugum meum suave est, & onus meum leve*; *Math. XI*, 30. Unde quæ sœpe se se offert in via recta difficultas, ea naturalis non est, sed adventitia. Legis naturalis sanctitatem quod attinet, illam breviter enuntiat Psalmista, *Psalm. XVIII*, 8: *Lex Domini immaculata (nullam ferens violationem impunne) convertens animas*; quippe quæ actiones nostras omnes, etiam interiores dirigit.

§. 134. Accedant modo legum natura- Refelluntur hostes nostræ discipline.
lum inficiatores, & dicant: I. Jurâ sibi homines invenisse pro utilitate; adeoque II. illa pro morum & temporum vicibus sœpe apud eosdem immutari, III. Tantum cuique juris esse, quantum potentiae, cui resisti nequeat, IV. nec quempiam à propria obligari posse ratione, quo nomine V. non veniant nisi præconceptæ singularium opiniones, & raro inter se congruentes. Clamitent alii VI. post Adami lapsum defecisse rationis lumen, & hinc VII. non paucas gentes summa legum, quæ naturalibus accensentur, ignorantia laborare: igitur Jus naturale esse nullum. Enimvero hæc omnia satis supra sunt exempla. Nonne ad veram atque durabilem utilitatem nos natura ipsa dicit (§. 118 Sch., §. 133), cujus leges, uti numquam mutantur (§. 65, §. 123, sq.), ita falsum est a physica potentia illas accipere mensuram (§. 83, §. 118 Sch.). Porro obligatio naturalis solum efficitur ratione ob-

objectiva (§. 93), quam ratio subiectiva tunc demum declarat, cum recta est atque a præjudiciis vacua (§. 103, sq.). Denique nec Adami peccato ab alienata fuit penitus humana mens (§. 108); qui vero objiciuntur populorum errores, ex abuso intellectus, & vincibili attentionis defectu proveniunt (§. 121).


Septem hæc sunt oppugnationum genera, quæ morum regulis ratione tantum cognitis illata sunt. Ac primum quidem & secundum CARNEADES apud Lactant. I. D. V. 16; tertium HOBESIUS de Civ. I. §. 14; quartum RACHELIUS in prol. ad Off. Cicer.; quintum MACHIAVELLUS Disp. I. 1. c. 1; sextum HOMBERG. Diff. de Leg. æter.; septimum AuctoR Dub. J. N. Præf. §. 17. & C. IV. §. 32. sqq. præcipue adornarunt, quasi verum esset illud Poetæ:

Nec natura potest justè secernere iniquum.
HORAT. I. Sat. III, v. 113.

Sed facile ex positis antea principiis propulsantur. Quamquam enim nos sæpe transversum agat falsa ac vere imitatrix voluptas; cuius blanditiis corrupti, quæ natura bona sunt, quia dulcedine hac & scabie earent, non cernimus satis, CICERO de LL. 17; quam parum tamen certæ esse desinunt aliarum artium regulæ, quod non raro ab iis artifices deflectant, tamen parum communes hominum leges propter perversam multorum indolem negitari possunt. Quæ autem ratio non comita-

tem, non benignitatem, non gratum animum, & beneficij memorem diligit? Quæ superbos, quæ maleficos, quæ crueles, quæ ingratos non aspernatur, non odit? CICER. de LL. I, II.

LOI TE, EUGENIUS MUNIMUS EUGENIUS
MUNIMENTA, XFLV. HABEAT QDVO
MUNIMENTA MUNIMENTA





CAPUT QUARTUM.

D E

JURIBUS HOMINUM UNIVERSALIBUS , ET EO ,
QUOD INDE FLUIT , ACTIONUM
MORALIUM DISCRIMINE .

- | | |
|---|---|
| 135. Existunt naturalia hominum jura. | 151. Jus defensionis. |
| 136. Connata est universalia. | 152. Jus violentiae. |
| 137. Quae sunt aequalia. | 153. Quid a lesioni tantum ducitur. |
| 138. Sine prærogativa. | 154. Non vero ex nuda obligatione erga se. |
| 139. Ex quibus configatur status hominum moralis. | 155. Quæ obligatio est jus perfectum , vel imperfектum. |
| 140. Naturaliter aequalis. | 156. Unde ducatur duplex illius juris forma. |
| 141. Imperium quid? | 157. Et quibus enuntiatis continetur. |
| 142. Inter homines naturaliter exultat. | 158. Jus commune est proprium. |
| 143. Suum hominis definitur. | 159. Pax est bellum definitur. |
| 144. Ejus partes. | 160. Status naturæ est status pacis. |
| 145. Alienum meum non est. | 161. Justum est honestum latissime. |
| 146. Læsio quid. | 162. Pium , tum justum , et honestum minus late. |
| 147. Tum injuria est infortunium. | 163. Justum , aequum , honestum est decorum strictissime. |
| 148. Jus hominis connatum se conservandi. | 164. |
| 149. Et hinc parandi res necessarias. | |
| 150. Tum jus securitatis. | |

164. *Virtus*, & *vitium*
quid.
165. *Quæ varia utriusque
genera.*
166. *Justitia universalis*,
& *particularis.*
167. *Expletrix & attribua
trix.*
168. *Personæ, & actionis.*
169. *Quisque præsumendus
est justus.*



I. *Affectionis dilectionis* quæ dicitur
sunt pax et amor, sicut vestrum inter se, in
omni paternitate. *Sicut illa*, *et sic omnes*
in mundo habent pacem, sed non
tunc habent eam, quia non sunt in
mondo. *Si ergo* dicitur, *qui non*
est in mundo, *non videt* filium
deum. *Qui vero* videt *filium*, *est* in
mondo. *Si ergo* dicitur, *qui non*
videt filium, *non est* in *mondo*. *Si ergo*
videt filium, *est* in *mondo*. *Si ergo*
videt filium, *est* in *mondo*. *Si ergo*
videt filium, *est* in *mondo*.

§. 135.

Existunt
naturalia
hominum
jura.

IN notione cuiuslibet obligationis , & legis jus aliquod inesse , seu facultatem moralem supra (§. 85) demonstravimus ; cognita posso legum naturalium existentia , insanum foret jura naturalia , quæ cum illis induculo cohærent nexu , in dubium revocare : igitur sicuti omnes homines , quod lege naturali præceptum faciendi , & quod vetitum est omittendi , jura habent stricte talia ; ita , quæ eadem lege permittuntur (§. 114 , §. 63) , singuli ex sua voluntate determinandi libertatem moralem a natura acceperunt , *sive Jus permissivum* (§. 84) .

I. Adpetentia effrænata ejus , quod libet , sine boni veri , aut veri mali discrimine , est *licentia* , SALLUST. fr. 14 , a libertate morali probe secernenda (§. 83) . II. Nunc definitio libertatis data a Florentino in *L. 4. D. de stat. hom.* , quod sit : *Naturalis facultas ejus , quod cuique facere libet , nisi siquid vi , aut jure prohibetur : intelligi , & explicari potest*. Patet enim primo , eam esse a natura , dein non nisi ad actiones physice , & moraliter possibiles porrigi , denique non esse sermonem de libertate mentis , seu interna (§. 44) , sed de alia , quæ externa nuncupatur. Ceterum per vim non jus auferri , sed juris exercitium , infra latius ostendetur.

III,

III. Jura stricte talia pendent ab obligatio-
ne , vim igitur suam non exerunt in iis , qui
nondum compotes sunt usus rationis (§.
72); ast jura permisiva etiam de infantibus ,
ac dementibus quodammodo enuntiari pos-
sunt (§. 55) . V. L.7. D. de stat. hom., L.3.
§. 2 , D. de injur.

§. 136. Sunt vero tam obligationes , Connata
& univer-
salia.
quam jura naturalia , vel *absoluta & connata* , si ex natura ipsa humana generatum
accepta ducantur ; vel *hypothetica , contra-
cta* , atque adsumpta , si simul ab alia pecu-
liari affectione , aut quodam interveniente
facto pendeant (§. 10 , 132) . Priora ,
quum in homines statim cadant , quia
sunt homines , simpliciter *universalia esse*
intelligantur ; ast posteriora , quoniam
non a communi humanitate , sed ab alia
simul ulteriore ratione veniunt , quodam
sensu vocantur *singularia* (§. 76) .

I. Sunt qui cum Ictis Romanis facultatem
agendi , quod bonum est , seu Jus naturale
aliud faciunt *commune brutis* , si rationem
sufficientem habet in parte hominis animali ;
aliud hominis *proprium* , si ex natura ratio-
nali ducatur (§. 105 , §. 70) ; WOLF. *hor.
subces. 1731, trim. vern. n. 2* ; DARIES *Obs.
III* , §. 1-6. Sed hi ipsi jus tunc per figuram
& improprie accipi fatentur : & ideo GRO-
TIUS hocce discrimen *usum vix ullum ha-
bere tradit de J. B. & P. I, I, 11.* Scilicet
inde saltem verus scopus , ad quem natura
determinavit appetitum , qui in brutis non

ita corruptus est, uberius explanatur; KEUPA
FEL Exerc. ad GROT. §. 14. II. Jura natu-
ralia hypothetica ea ratione tanten sunt uni-
versalia, quod cuilibet homini sub eadem
conditione spectato competant. III. Ponas
jura, quibus quis propter hoc ipsum non
fruitur, quod homo est sub certa saltem
conditione consideratus, & illa erunt merae
positiva. Cf. MATTH. XVIII, 18.

*Quæ sunt
æqualia.*

§. 137. Posita eadem ratione sufficiens
eamdem existere consecutionem necesse
est; quum igitur in communi hominis
essentia, atque natura, quæ in omnibus
eadem est (§. 11), idonea & sufficiens
jurium connatorum ratio reperiatur (§.
135), fatis inde liquet: jura connata tam
strictè talia, quam permissiva in quolibet
homine eadem esse debere, & proin nemi-
ni absolute spectato majorem, vel mino-
rem jurium numerum, aut gradum com-
petere posse, verum ista in singulis ejus-
dem esse qualitatis & quantitatis, atque
ad eo tamquam prorsus similia & æqualia
& inter se congrua recte cogitari.

* Nimírum rei determinatio, seu nota, per
quam ea a reliquis distinguitur, si quidem
verbis satis intelligi, seu distincte cognosci
potest sine alio adsumpto, *Qualitas*: si non
potest, *Quantitas* nominatur. Porro ab iisdem
qualitatibus *Similitudo*, ab iisdem
quantitatibus *Æqualitas*, ex coniunctione
vero earumdem qualitatum, & quantitatum

Con-

Congruentia arcessitur ; BAUMGART. metaph. §. 69, sqq. ; DARIES L. J. un. §. 9, Sch. II.
 Quare non satis accuratus est KOELERUS , dum putat inter homines similitudinem unice respici , non quantum , & fingi æqualitatem , quod ignoretur inæqualitas , Exerc. §. 8 , 90 ; veram enim æqualitatem de iis posse cogitari , ex data hujus definitione elucet.

§. 138. *Prærogativam vocant Jus unius Sine præ-
 precipuum , seu quo quis præ aliis pari ce-
 teroquin jure utentibus gaudet ; Præceden-
 tia vero dicitur , Jus prioritatis in ordine a
 pluribus simul observando : quum in com-
 muni natura nulla occurrat jurium , &
 obligationum diversitas ; sed quod uni
 competit , idem ipsum & alteri compete-
 re necesse fit (§. 137) , id quisque faciē
 in animum inducet suum , inter homines
 qua homines & prærogativam , & præce-
 dentiam exulare.*

* Ita sumitur prærogativa in L. II. D. *de
 adm. & per. tut.* , tuin in L. ult. §. 25 , D. *de
 mun. & hon.* ac passim. Quare si ex duobus
 fratribus alter de binis portionibus cetero-
 quin æqualibus unam possit eligere , habet
 prærogativam , quod si etiam primus ei lo-
 cus in patris comitatu adsignetur , præce-
 dentiam obtinet. Nec dicas cum DARIESIO
*L. J. un. §. 956** , eam esse loci , non juris
 prærogativam ; qui enim priorem locum pe-
 tere , & tenere potest lege non repugnante ,
 eum etiam jure prioris loci gaudere manife-
 stum est (§. 84).

Ex quibus
confatur
status ho-
minum
moralis.

§. 139. Satum hominum moralem ex determinationibus, quae ad eorum libertatem referuntur, existere supra vidimus (§. 55), atqui non modo jura nostra omnia harum determinationum numero sunt comprehensa (§. 84), sed nec ulla reperiri hujusmodi determinatio potest, cum qua non aliquod quodammodo cohaereret jus, seu facultas moralis, quod bonum erat scilicet agendi, & aspernandi contrarium (§. 60, §. 85); igitur haud inepta est altera status moralis definitio, quod is sit: *Complexus jurium, quibus homines actu sunt instruti.*

Status moralis generatim in §. 55 fuit definitus, hic vero notio illius datur strictior, & propria magis nostræ disciplinæ; ideo in L. 1. D. de Cap. min. capit. deminutio idem est, ac status permutatio, & qui nullum jus habet, statum habere negatur; L. 3. §. f., & L. 4. D. eod. II. Quoniam jus est qualitas, seu attributum personæ (§. 84), etiam homo tunc tantum personæ venit nomine, si cum suis iuribus consideretur; cf. HEIN. El. Inst. Jur. Civ. LXXV; his itaque de multis etiam persona evanescit; cf. Titt. Instit. de jure person., & D. de stat. hom.

Naturali-
ter aqua-
lis.

§. 140. Ex data modo status moralis definitione, & ex eo, quod paulo ante est ostensum, iura primigenia in omnibus hominibus prorsus æqualia reperiri (§. 135),
ma-

manifesto coligitur, non errare illos, qui tradunt, homines absolute & ab origine spectatos, in *statu omnimodæ æqualitatis vivere*, in quo nec, quod uni vetitum, alteri permisum, nec, quod uni permisum est, reliquis prohibitum, aut præceptum dici possit: quæ enim hodie existunt innumeræ dissimilitudines, & inæqualitates, eæ vel hypotheticæ sunt, & adicitiæ, vel tantum physicæ.

I. Verissimum itaque est in *statu naturali*, quod quis jure ab altero sibi fieri, vel non fieri petit, & idem ab ipso alios sibi faciendum, vel non faciendum jure postulare. II. Insanum ita fuit Hobbesii ratiocinium, scribentis de *Cive I*, §. 3: *Æquales sunt, qui æqualia contra se invicem possunt, at qui maxima possunt nimirum occidere, æqualia possunt. Sunt igitur omnes homines naturæ inter se æquales.* Primo enim falsum est pares esse omnium ad se invicem occidendum vires: deinde, si pares essent, æqualitas quidem existeret physica, sed non moralis; tum vero plurimis belluis non modo essemus æquales, sed multis quoque inferiores; denique fateatur Hobbesius inæqualitatem, quæ nunc est, lege positiva introductam esse *l. c.*; non ergo æqualitas fuit in occidendi potentia, quippe quæ etiam hodie perdurat. III. Reætius Icti Romani, *Quod jus naturæ attinet, omnes homines esse æquales*, pronuntiarunt; *L. 32, D. de R. J. Quod Jure naturali omnes liberi nascerentur, & uno naturali nomine homines adpellarentur; L. 4, D. de J.*

& *J.* Cujus rei non is est sensus , quod iisdem partibus essentialibus constemus , mente scilicet & corpore , uti putat HEINEC. *El. J. N.* II , 5 ; sed quod iisdem prædicti simus juribus. Et ita quoque accipiendum illud Plauti : *Tam ego homo sum , quam tu : Asin.* II , sc. IV , v. 82. Evidem a nativitate , sexu , & ætate diversa profluere possunt jura (§. 55) , ast tunc non tam communis natura , quam peculiares affectiones respiciuntur. Sed nec indolis & ingenii varietas dictis refragatur , ea enim ad humanam essentiam non pertinet , sed ad characteres internos mutabiles , vel etiam ad determinationes exter nas (§. 51) .

Imperium quid? §. 141. Jus actiones liberas Entis intelligentis pro suo arbitrio ad certum quemdam finem determinandi , Potestas , aut Imperium nuncupatur. Contra obligatio hujusmodi actiones voluntati illius , qui imperio pollet , attemperandi Subjectionem constituit. Ex quo quinam Imperantis , seu superioris ; quinam Subiecti , seu inferioris veniat nomine , facile colligitur.

Id in communi hominum natura positum est , atque infixum , ut quisque actiones suas ad nutum divinæ voluntatis componere tecatur (§. 114) ; omnes igitur eatenus in naturali , ac necessaria subjectione vivimus , atque a communi Dei superioris nostri imperio , & potestate omnino pendemus. Latiore significatione , & de rebus inanimatis enuntiavit CICERO Imperium , sine quo , inquit ,

quit, nec hominum universum genusflare, nec rerum natura omnis, nec ipse mundus potest. Nam & hic DEO paret, & huic obediunt maria terræque, & hominum vita, iussis supremæ legis obtemperat; de LL. III, 1. Ceterum sicut divinæ non conveniret sapientiæ aliquid imperare sine ullo fine (§. 58), ita nec homines aliquod imperium adeptos a præstitutis finibus discedere posse, clarius infra patebit.

§. 142. Quandoquidem naturaliter ea-
dem omnium est libertas moralis (§. 137), nullus humano imperio, ac subjectioni in eo statu esse locus potest, quo enim jure unus alteri, ut aliquid faceret, vel non facheret, imperare vellet, eodem jure hic vicissim illius posset actiones moderari, & ab eodem petere, ut suum se in agendo judicium sequi patiatur; nisi igitur quis jura fingere cupiat repugnantia, & omni effectu vacua, is admittere debet, quemlibet hominem, durante naturali statu, etiam jure libertatis a subjectione, seu independentiæ, quam vocant, *ab cuiusvis alterius hominis arbitrio gaudere*.

Inter ho-
mines na-
turaliter
exulata

I. Igitur in statu naturali quilibet homo imperium, & potestatem in se ipsum habet (v. §. 50, Sch.); & suum in agendo sequi judicium potest. II. Libertas a subjectione, seu imperio, in arctiori significatione accipitur, quam libertas externa supra generaliter (§. 135) definita; et si enim quis suo fa-

facto certis renuntiaret juribus permissivis, dummodo alterius non fiat subditus, vivere tamen dicitur in statu libertatis. III. Immo vero etsi quælibet prærogativa aliquam inducat inæqualitatem (§. 138), tamen, nisi prærogativa sit imperium, & libertatem a subjectione tollat, non videtur naturali æqualitati, strictius scilicet sumptæ, derogare; & porro ii dicuntur æquales, quorum alter ab alterius potestate, & imperio liber est. IV. Ceterum quamvis status naturalis sit status libertatis, non tamen vicissim omnis status libertatis est etiam mere naturalis, salva enim libertate multa accedere possunt jura adventitia.

Suum hominis definitur.

§. 143. Bona, perfectiones, atque adeo jura omnia, quæ in relatione ad quamdam personam determinata sunt, vel, ut alii loqui malunt, quibus eadem jamjam instruta est, *Suum ipsius* constituunt; quia vero perfectionum & jurium genera alia data sunt a natura, alia facto primum comparantur (§. 14, §. 136), etiam *Suum in connatum & adquisitum* recte distribui-
tur, & inde quid & quotuplex fit *meum, tuum, nostrum, vestrum, alienum*, facile est intellectu. *Suum autem a Dignitate* oportet discernere ac *merito*, quod scilicet in aliquo determinatum non est, sed eidem congruum esse judicatur.

* I. Quid *Suum* sit, multi per partes enu-
merare inaluerunt, quam definire. Sed ple-
nam

nam ejus vocis notionem efformarunt KOELE-RUS *Exercit.* §. 147; tum SCHIERSCH-MIDIUS El. J. N. §. 244; & DARIESIUS I. J. Un. §. 277, & 327, quos sumus secuti. II. Quoniam ex eo, quod fieri aliquid & esse potest, non recte concluditur id etiam esse; ideo, quæ ratione existentiæ in aliquo determinata non sunt, et si determinari, seu adquiri possint, nomine Sui non veniunt. V. L. 5, & L. 213, D. V. S. III. Quare SUUM proprie hic non vocatur id, quo quis dignus est; sed *Dignitas æia & meritum*, quod scilicet *congruum & conveniens* esse consetur aliqui personæ, L. 16, §. f. *de Castr. pecul.*; L. 22, §. 1. D. *Inoff. test.*; L. 2. D. *de his, qui in testam. del.*; QUINTILIAN, *Decl.* 329. Et si meritum bonum BAUMGARTEN nominet SUUM, scilicet ethicum; Eth. Phil. §. 316.

§. 144. Ex his autem perspicuum est, ^{Eius pars.} corpus, membra, sanitatem (§. 12, 13), ^{tes.} dein animam, & singulas ejus facultates (§. 16, sqq.), tum æqualitatem (§. 140), & libertatem ab aliorum hominum imperio (§. 142), ceteraque cum his conexa jura ad suum cuiusvis naturale pertinere; quibus modis autem homines aliquid, quod in eorum essentia & natura sufficientem rationem non habet, tamen suum facere, & novas perfectiones adquirere possint, infra ostendetur.

I. Etiam GROTIUS, suum quod sit, exemplis declaravit: *Natura, inquit, hominis suum est vita, . . . corpus, membra, fama, honor,*

mer, actiones propriæ: L. II. de J. B. & P. c. 17, §. 2. Ex quo patet naturaliter quælibet hominem esse sui juris, L. 50, pr. D. de leg. 3; non autem juris alieni, L. 1. D. de his, qui sui vel al. II. Nostrum definitivum DARIESIUS: Jam quod obligationi nostræ convenienter, seu quod pro arbitrio nostro ad nostram dirigere possimus felicitatem, jam vero id, quod statum, in quo sumus constituit, Obs. LIV. §. 1, & 15, scilicet prior definitio est nominalis, altera realis.

Alienum
meum
non est.

§. 145. Illud porro est manifestissimum, quod totum alienum est, illud ipsum esse meum, seu quod totum meum est, pariter esse alienum nullo modo posse: si enim contradictionem vocamus, idem de eadem re affirmare simul & negare: quoniam, qui aliquid penitus alienum asserit, eo ipso suum non esse fatetur; certe si suum id tamen esse sibi persuaderet, incidet in repugnantia: nihil igitur est, cur de veritate hujus fundamenti dubitemus, quo sublato, etiam libertas hominum moralis antea stabilita plane corrueret.

Nemo certe potest, quod alienum esse credit, eodem tempore & respectu, etiam credere, alienum non esse: *Contra naturam quippe est*, observante ULPIANO, ut cum ego aliquid teneam, tu quoque tenere videaris; L. 3, §. 5, de retin. vel omit. poss. Evidem nullam difficultatem habet totum aliquid partim tuum, & partim meum esse; ast idem tuum

tum esse penitus & adhuc meum , profectio
est absurdum. V. L. 5 , §. f. D. Comod.

§. 146. Innumeræ sunt causæ , quæ ,
quod nostrum est , deminuere , corrumpe-
re atque destruere possunt , atque hæ nobis
nocere , nos turbare , violare , & lædere ge-
neratim dicuntur , illa autem noxa , tur-
batio , & violatio , quæ ab homine in alie-
num involante proficiscitur , proprie *Læsio*
nuncupatur ; ad quam porro significatio-
nem spectat vulgata læsionis definitio ,
quod sit *Aetio* , quæ suo alterius repugnat .

I. Igitur non tantum homo sibi nocere , se-
lædere , v. L. 9. D. de J. & F. J. , vitam
destruere , dein affectibus turbari posse intel-
ligitur , sed etiam animalia , immo & tem-
pestates , quod nostrum est corrumpere ac vio-
lare sunt idonea. II. Præter eam grammati-
cam læsionis significationem est & alia mo-
ralis latissime patens , qua quælibet legis
transgressio per læsionem indicatur. V. KOE-
LER. Exerc. §. 764; DARIES I. I. U. § 322.
& Obs. LIV , §. 4, quo sensu etiam suum ali-
cujus ethicum (§. 143 , sch. III.) lædi po-
test. III. Communiter vero læsio accipitur
pro juris alieni violatione : & hinc PUFEN-
DORFFIO lædere est : *Noxam inferre* , de Off.
I. c. VI , §. 2 ; KOELERO : *Turbare alterum*
in eo quod ejus est , Exerc. , §. 767 ; WOLFFIO:
Agere id quo alter vel status ejus externus redi-
ditur imperfectior , J. N. Tom. I. §. 669 ;
HEINECCIO: *Alterum reddere infeliciorem* , J.
N. I. §. 210 , & sic de reliquis. IV. Cete-
rum

rum quia, qui jure suo utitur, ideo non involat in alienum, patet veritas regulæ, neminem inferre læsionem nisi, qui id fecit, quod facere jus non habet; L. 151 de R. J.

Tum in-
juria &
infortu-
nium.

§. 147. Et quoniam jus alterius vel ut simplex facultas moralis, vel ut hujus facultatis exercitium, & usus considerari potest, consequens est, ut duo etiam sint summa genera læsionum; vel enim suum alteri subtrahitur, vel ponitur impedimentum, ne quis jure suo utatur; quorum utrumque, si a libero ejus, qui læsit, arbitrio pendeat, *Læsio moralis* strictius, seu *Injuria* generaliter nuncupatur; secus est tantum *Infortunium*, *Læsio physica*.

Etiam injuria vocabulum est maxime πολεμίας, primo enim denotat id omne, quod non jure fit; L. 1. D. de *Inj.* & fam. libel. & cates nus quodvis peccatum injuria est (§. 82); dein quod fit contra jus alterius ex quocumque vincibili intellectus vel voluntatis defecetu (§. 83). V. L. 5, §. 1, D. ad L. Aq.; CICER. Off. I. 7, & 8; GROT. J. B. & P. II, XVII, §. 3. Porro sumitur pro violatione alieni a sciente facta, GROT. l. c. III, XI, §. 4, n. 2. *sqq.*; & denique pro certa tantum violationis forma, de qua infra. V. L. 1. D. de *Injur.* Quod vero HOBBESIUS injuriam tantum dixit violationem ejus, quod alter suo facto adquisivit, plane absurdum est; ita enim vel suum connatum dari aliquod inficiatur, vel negat ejus læsionem fieri posse; de Civ. C. III, §. 3, 4, 7. *Injuria*

vero, ut scribit MENANDER, illud distat in fortunio: *Hoc casus illam quod voluntas efficit,* apud Stobeum tit. VII. Cf. GROT. II, XXI, §. 5.

§. 148. Quum cuilibet homini eæ a natura impositæ sint partes, ut se se conservare (§. 22), existere quam diutissime (§. 58), ac statum suum perficere teneatur (§. 115), hic autem intermedius fatum hominis finis sine variis subfidiis nequeat obtineri, luce profecto clarius est, jus in sui conservationem, ac perfectiōnem inter jura hominum connata esse referendum (§. 134), atque adeo facultatem moralem nobis ad ea cuncta esse tributam, sine quibus huic obligationi ac officio non posset satisfieri (§. 57), unde nova jura primigenia, scilicet *Jus rerum, Jus securitatis, Jus defensionis, Jus violentiæ Et belli* denique promanant.

Jus se conservandi cum ex stimulis naturalibus, tum ex rectæ rationis usu adeo luculenter hauritur, ut nemo sanus illud in dubium revocare unquam ausus sit. Præclare CICERO: *Omne animal se ipsum diligit, ac simul, ut ortum est, id agit, ut se conservet, quod hic ei primus ad omnem vitam tuendam appetitus a natura datur, se ut conservet;* Fin. V. 9; sed quia in statu collisionis finis intermedius fini ultimo cedere debet (§. 88), hoc etiam jus aliquando desinere, suo loco patebit.

Et hinc
parandi
res neces-
farias.

§. 149. Venit autem hic *Rei nomine omne ens a persona distinctum*, quod nobis præstare usum potest, seu quod homini conservando, atque perficiendo est idoneum: quoniam in omnium oculos incurrit, quemlibet nostrum rebus variis veluti cibo, potu, vestimentis ad vitam tolerandam indigere, perspicuum simul est, nea mini jus acquirendi & adhibendi res ad sui conservationem necessarias posse dengari; hoc enim sublato, etiam obligatio fe conservandi irrita fieret inanisque (§. 80).

Consentit definitio a *Icto CAJO* data: ei enim res est: *Omne id, quod habile est, ut possit alicujus suum esse: Instit. Lib. II, tit. I. §. I, cf. & L. 23, D. de V. S.* Quo sensu res non modo a persona distinguitur, sed etiam a *pecunia*, cuius adpellatione *ea tantum, que re ipsa sunt in bonis nostris*, continetur, *L. 5, D. de V. S.* Jus rerum connatum eleganter quoque expressit *CICERO*: *Principio generi animalium omni est a natura tributum, ut se vitam, corpusque tueatur -- omniaque, quæcumque ad vivendum sunt necessaria, acquirat, & paret, ut pastum, ut latibula, ut alia ejusdem generis; Off. I. 4.*

Tum jus
securita-
tis.

§. 150. *Securitas generatim dicitur Status, in quo nullum malum imminens licet prævidere; Jus autem securitatis adpellant, jus non patiendi, ut ab altero fibi noceatur. Fingas non licere homini malum,*
quod

quod fibi importatur, declinare, & a se avertere, & tunc vel is jure se conservandi carebit, vel ad legis custodiam haud erit opus oblata impedimenta removere; quorum utrumque cum sit absurdum (§. 148, & §. 80), statuendum omnino est, quemlibet hominem, cui conservationem sui natura commendat, etiam jure connotato securitatis gaudere.

Hanc connatam hominibus facultatem satis etiam indicat internus sensus (§. 22), quo simul atque natum est animal, alienatur ab interitu, iisque rebus, quæ interitum videantur adferre; CICER. Fin. III, 5. Et quia securitati opponitur *Periculum*, hoc est, status, in quo mala imminent, quod vel *Internum* est, sive animi, vel *Externum*, sive corporis, &c cæterarum rerum; evidens est jure suo facere homines, qui periculis internis & externis se subtrahere conantur (§. 84, sch.).

§. 151. Qui jus habet non patiendi, ut ab altero fibi noceatur, eidem jus ad actiones, quibus vim, injuriam, & omne, quod obfuturum est, præcaveat, competere necesse est (§. 57); quum vero *Aetus*, quo quis obnittitur *lesioni*, seu mala intentanti resistit, *Defensio* nominetur; planum est, cuilibet homini congenitum quoque esse jus defensionis, quod ad omnia facta, sine quibus nullus foret hujus usus, porrigitur (148).

Q

Nec

Nec pugnat jus defensionis cum alterius libertate, sed illius actiones cohibet, ne in licentiam evagentur (§. 135); scilicet, ut eleganter observat CICERO, *Hoc ratio doctis, & necessitas barbaris, & mos gentibus, & feris natura ipsa præscripsit, ut omnem semper vim, quacumque ope possent, a corpore, a capite, a vita sua propulsarent: pro Mil. XI.*

Jus vio-
lentiæ.

§. 152. Hoc autem probato consequens est, ut si quis eo rerum redactus sit, ut imminens sibi ab altero malum alia vi nequeat declinare, quam si vim eidem adferat, & itidem mala importet, jure quoque gaudeat, quo vim vi repellere, ac læsionem intentanti tot corporis, ac rerum detrimenta & imperfectiones inferre licet, quot sufficient ad hoc, ut læsio etiam physice fiat impossibilis, & ab illa abstineatur; atque istud est, quod vocant, *Jus violentiæ, seu Jus cogendi strictissime sumptum.*

Cogimus alterum latissime, seu secundum quid, quacumque representatione mali (§. 76, Sch.); minus late vero, si absolutam ei & physicam necessitatim imponimus, quamvis nullam propterea imperfectionem ipse patiatur, veluti quando furiosus compedibus obstringitur; & demum strictissime, si simul malis physicis ipsum afficimus, & in bonum nostrum eum imperfectiorem reddimus, quæ significatio hujus est loci; ACHE-
NWAL. *Prol. J. N. §. 89, sq.; quorsum per-*
ti-

tinet illud Ulpiani: *Vim vi repellere licere*
Cajus scribit: Jus natura comparatur; L. i,
§. 27, D. de vi & vi arm. Ceterum per se
 patet, sermonem hic esse de statu potissimum
 naturali, & in quo violentia remedium neces-
 sarium sit, nec hujus juris usus majori qua-
 dam obligatione cohibeatur (§. 88).

§. 153. Quoniam jus alteri vim inferen-
 di descendit ex jure defensionis (§. 152),
 quæ non intelligitur nisi præconcepta ali-
 quæ læsione (§. 151), is verò, qui suum
 tenet, alterum turbare non videtur
 (§. 146, Sch. iv), aperte concluditur, ut
 jus cogendi in eos nequaquam fese exserat,
 qui, dum alterius perfectiones non augent,
 nihil tamen faciunt, per quod ipsius per-
 fectionibus detrahatur. Ponas vero facul-
 tam tibi competere vi alterum adigendi,
 ut simpliciter suum quod est deminuat,
 & ita te reddit perfectiorem, tunc suum
 & tuum voces erunt inanes, & naturalis
 libertas evanescet (§. 154, 142).

Quod à
læsione
tantum
ducitur.

Tunc sane Naturæ Auctor DEUS jura ho-
 minibus dedisset repugnantia; quo enim ju-
 re tu me cogeres, ut te perficiam, pari jure
 te cogere possem, ut mihi haic perfectio-
 nem impertiaris, & a coactione abstineas
 (§. 142); quid quod tunc vix cibum sume-
 re, somnum capere, res sibi necessarias pa-
 rare, nunquam denique nihil agere liceret:
Ast liber esse non videtur, qui non aliquando
nihil agit; CICERO Orat. II, c. 6; quare no-

cere alteri , & eidem non prodeesse probe se-
cernenda sunt , V. L. 6 D. Quæ infr. cred.

Non vero ex nuda obligatio-
ne erga se. §. 154. Non igitur illorum subscribi-
mus sententiae , qui jus violentiae , seu jus
cogendi strictissime sumptum (§. 152) ,
etiam in eos , qui plane nihil nocent , ex
nuda obligatione erga se ipsum deduci
posse arbitrantur ; vel enim juris nostri
impedimentum ab eo venit , qui illud po-
nere jus non habet , & jam læsio est , quæ
jus cogendi producit (§. 147) ; vel vero ,
qui caussa est impedimenti , jus suum usur-
pat , & in hac specie jus nostrum non ma-
jorem efficaciam habere potest , quam vis
physica , quæ per æqualem vim physicam
retunditur (§. 146 , Sch. IV).

Observarat jam BARBEYRAC. , & dein MAS-
COV. ad Pufend. L. III, C. V, §. 1, not. 1,
*Jus unius aliquando inutile fieri per conflictum
juris alii personæ competentis ; nec minus
agnovit DARIES. Obs. XXXVII , §. 12, Jus
in regno morali idem esse , quod in regno phy-
sico est vis ; atque si vis una v. c. ut quatuor
agat in vim alteram etiam ut quatuor seu
æqualem , hæc statu suo depelli non potest
(§. 32 , sch.) ; pari igitur dicendum modo ,
jus illud esse inefficax , cui æquale jus alte-
rius resistat. Quid quod & illud principium:
*Nullam facultatem moralem alteri mala infe-
rendi sine turbatione concipi posse: ipsem*
DARIESIUS stabilivit I. J. U. §. 360. Etsi dein
KOELERUM fecutus Exerc. §. 1230 , sqq. jus
co-*

cogendi, etiam si nulla subsit læsio, *ex necessitate remediorum ad finem*, & *ex juris explicatione* derivarit, *Obs. xxxvii*, §. 5, sqq. & *Obs. lv*, §. 13. Enimvero naturaliter aequalia omnium hominum jura sunt, & eadem se suaque conservandi obligationes; unde consequitur jus cogere volentis nullum aut inefficax esse oportere, si is, qui cogi deberet, eodem ipse jure utatur: quamobrem fame alias perituro haud licebit, ut se alat, hominem alterum innocentem jugulare. Exemplis autem a DRIESIO II. cc. in contrariam adductis respondebimus suo loco.

§. 155. Jus quod nobis respectu aliorum hominum competit, si in eo, quod nostrum est, rationem habet, *Jus perfectum*, seu *Facultas* stricte nominatur, ast si ex merito tantum descendat, & dignitate, dicitur *Aptitudo*, seu *Jus imperfectum*. Itaque verissimum est, facultati in naturalibus actum, aptitudini potentiam respondere; illa enim in bonis versatur, quæ ratione existentiæ in nobis sunt determinata; hæc autem in iis se se exserit, ad quæ agenda, vel habenda apti duntaxat & digni sumus (§. 132).

Veram esse hanc & realem juris perfecti, & imperfecti definitionem uberius ex sequentibus patebit. Nunc vero intelligimus, cur uti *Suum*, *Facultas*, *Jus perfectum*, ita *Aptitudo*, *Meritum*, *Jus imperfectum* H. GROTIUS sint synonima; de *J. B.* & *P. Prol.*

§.

§. 9, & L. I, c. 1, §. 4. 5. & 7: quorum sum etiam pertinent, quae scribit PUFENDORFFIUS J. N. & G. I, VII, §. 7: *Perfectum jus idem ac jus suum esse: tum perfecte deberi, quæ ad esse; imperfecte, quæ ad bene esse faciunt.* Nec moramur illos, qui cum COCCEJO, in notis ad GROT. II. cc., nullum jus imperfectum volunt agnoscere: cum enim quævis *Facultas moralis*, quod bonum est, agendi sit jus (§. 84), qui ex merito jus oriri negant, inanem committunt logomachiam. II. Sed aptitudo, quam v. c. Caius habet ad eleemosinam, si generatim & in se spectetur, sua Caji est, nec a quoquam violanda, atque eatenus jus perfectum constituit; cf. WOLF. Ph. Pr. I, §. 237, Sch. Quatenus vero id, quod Cajo convenit, nondum ad suum illius pertinet, immo talis aptitudo ratione certæ alicujus personæ effectum consequi forte nunquam potest, ideo jus illud dicitur imperfectum. III. Cum data juris divisio ad alios referatur, perspicuum est primo, jus absolutum & simplex, quod sine relatione ad alios nobis competit, nec perfectum esse, 'nec imperfectum: dein jus aliquod, v. c. se conservandi, jam *simpliciter*, jam *relative* ad alios considerari posse. IV. Jus absolutum vocat DARIESIUS, quod *ex tali obligatione venit, qua strictus est is, cui jus illud competit: jus relativum, quod ex tali obligatione, qua alter nobis obstrictus est, dependet,* Obs. XXXVII, §. 2: *dein perfectum idem significare putat, quod sufficiens; & imperfectum, quod insufficiens, eo nimirum sensu, quo ratio in sufficientem & insufficientem dividatur;* L. c. §. 9. *Enimvero uti jus, quod*

ex obligatione oritur erga se ipsum , ad alios
sæpe referri debet (*Cor. III*) ; ita esse ali-
quid nostrum , & facultatem stricte talem in
id competere posse , seu jus perfectum , quin
tamen jus illud sufficiens sit atque efficax , in
progressu constabit ; cf. §. 3. *Inst. de Except.*

§. 156. Quoniam vero illum tantum
cogere nobis licet , qui in id , quod no-
strum est , aliqua ratione involat (§. 154) ,
ceteroquin vero nativæ cujusvis libertati
relinquendum est , ut circumspiciat , an
idonea nos perficiendi occasio (§. 153)
ei præbeatur , ideo jus perfectum & effi-
cax definiunt communiter : *Quod conjun-*
cum est cum jure hominem alterum cogendi ,
si obligationi sue satisfacere nolit : jus autem
inefficax & imperfectum : Cui jus coactio-
nem externam adhibendi minime cohæret . Ex
quibus quasnam leges & obligations per-
fectas faciant , quasnam imperfectas , sa-
tis liquet.

Unde du-
catur du-
plex illius
juris for-
ma.

I. Hasce juris perfecti & imperfecti definitio-
nes nominales usurparunt PUFENDORFFIUS
J. N. & G. I. VI. 7 ; tum WOLFFIUS *Ph.*
Pr. I. §. 237 ; DARIESTUS *I. J. U. §. 253* ,
& alii passim. Atque in eum sensum qua-
drat , quod ait Ictus PAULUS : *Quædam esse*
voluntatis & officii magis , quam necessitatis
& obligationis , L. 17 , §. 3 , D. Commod. ;
& quod scribit MACROBIUS , *Som. Scip. in*
Fin. , leges imperfectas esse , in quibus nulla
deviantibus pœna sancitur. II. Enimvero ,
omne jus imperfectum qua tale jus cogendi

excludere , dein in omni jure perfecto jus cogendi subaudiri , & per se inesse , facile largimur ; quum tamen jam animadvertisit GROTIUS *J. B. & P. L. II, XVIII*, §. 10, & suo loco ostendendum sit , posse aliquando jus cogendi , vel , si ita loqui mavis , hujus juris exercitium a jure perfecto separari , non sine causa vulgatas juris perfecti , & imperfecti definitiones deseruimus. Immo vero jam ipse WOLFFIUS adnotarat : *Ubi explicatum fuerit , quid sit suum , juris perfecti , & imperfecti differentiam manifestiore fore , Ph. Pr. I, §. 237 , sch.* ; etiā dein suum per id , *in quo homini cuidam soli jus perfectum competit* , declararit *J. N. Tom. I, §. 121.* Certe jura libertatis & æqualitatis connata sunt , & perfecta ; jus attamen cogendi , vel ejus usus , non nisi in statu adscititio læsionis obtinet (§. 153).

Et quibus
enunciatis
continea-
tur.

§. 157. Quod si rationes attentius quis subducere velit , nullo negotio perspiciet , leges & obligationes perfectas oīnnes ex suo alterius profluere , & in hacce propositione contineri : *Neminem lædas* : vel , *Sinito suum cuique* : contra leges & obligations imperfectas ex aliorum merito progigni , & dignitate , ac in illo inesse enunciato : *Studeas prodeſſe aliis , & eorum utilitatibus servire* : quorum alterum nuda cessatione a læsione , alterum non nisi actione quadam positiva efficitur ; itaque prius etiam vi naturaliter extorqueri , posterius vero consiliis & adhortationibus

(§.

(§. 75) impetrari tantum potest (§. 153 & 81, sch. IV).

Ex his autem concludimus, I. suum aliquius & jus perfectum sine jure cogendi cogitari aliquando posse (§. 156, sch.), ast jus cogendi sine juris perfecti, hoc est sui, violatione repugnare (§. 154); quorsum pertinet elegans locus Icti Pauli: *Nemo, ait, cogitare potest, ut vicino profit, sed ne noceat, aut interpellat facientem, quod jure facere possit;* L. 2, §. 5, D. de Aq. & aq. pl. II. Si jus aliquod cogendi absolutum sine jure perfecto & relativo effingas cum DARIESIO (cf. §. 155, sch. IV), tunc jus defensionis contra furiosum aggressorem, quod non ex hujus obligatione, sed ex obligatione cuiusvis erga se ipsum ducitur (§. 148, §. 151), et si id sine relatione ad alium nequeat cogitari, tamen nec jus relativum esset, nec perfectum, quod sane, & ab usu loquendi, & ab ipsa vulgata juris perfecti definitione (§. 156) abhorret. Immo vero sunt iura non pauca, quæ non ex aliqua obligatione, sed ex obligationis negatione promanant (§. 84). III. Sed nec ideo quis jure perfecto gaudet, quia alter ei perfecte obligatur, uti DARIESIO visum est, Obs. XXXVII, §. 3, sed jus perfectum, quod est, obligationem etiam alterius efficacem & perfectam producit. Nec dicas, jus cogendi etiam illum, qui non laedit, sæpe venire ex juris explectione, & ex finis necessitate, quæ jus ad media necessaria complectatur; siquidem illud inde conficies absurdum, ut aptitudo, & meritum facultatem cogendi involvant, si

non

non aliter jus explere , & finem , quo quis dignus est , adsequi liceret. Sed nec ulla subest ad finem obtinendum necessitas moralis , si remedia juri , quod alter conservare potest , adversentur (153, sch).

Jus commune & proprium.

§. 158. *Jus commune* dicitur , quod omnibus competit , & a quo proin nemo arceri potest ; *Jus proprium* vero est , quod unus aut plures conjunctim ita habent , ut ceteri omnes ab eo possint excludi : quoniam jura connata eadem sunt in quolibet homine , non autem jura adquisita (§. 136) ; patet , illa juribus communibus , hæc vero juribus propriis esse accentenda. Ceterum uti jus , quod pluribus conjunctim proprium est , illud inter ipsos commune nominatur ; ita etiam jura nativa & communia , sicut in singulis hominibus determinata spectentur , natu-ram juris proprii induunt.

I. Igitur non modo vita , corpus , membra , sed etiam jura libertatis & æqualitatis in statu naturali absoluto cuiusvis personæ singulare propria sunt , reliqui enim omnes , si in eadem invadant , vi arceri possunt. II. Suum definiverunt nonnulli : *id a quo alter excludi potest* ; CANTZIUS Disc. mor. §. 1826 , & ACHENW. J. N. edit. IV, §. 53 ; vel *ad quod quis habet jus proprium* , KEUEFEL Exerc. ad Grot. §. 142. Enim vero non ideo nostrum aliquid vocamus , quod alios inde depellere possumus , sed quia id nostrum est ,

est, ideo reliquos jure excludimus (§. 151).

§. 159. Is hominum status, qui ab ^{Pax & bel-}
omni aliorum violentia & coactione va-^{lum definitur.}
cuus est, *Pax* vocatur: huic opponitur
Bellum, seu *status ille*, *in quo homines co-*
natum efficacem produnt mala aliis inferendi
per vim. Quare cui alterum actu cogere,
& quod suum est vi tueri, ac persequi
licet, eidem etiam jus belli competere
non potest dubitari.

I. Eadem reperitur belli notio apud Cicero-
nem, dum ait: *Duo esse genera decertandi*,
alterum per disceptationem, *alterum per vim*;
Off. I, 11. Certatio vero, uti & disceptatio,
non solum ipsum pugnae & contradictionis
actum designant, sed totum tempus, quo
ita dissidetur; cf. SERVIUS ad *Virg. Aeneid. I*,
v. 545, & VIII, v. 547. Quare GROTIUS il-
lam definitionem ita explicavit, ut bellum di-
ceret: *Statum per vim certantium*, *qua tales*
sunt; J. B. & P. I, 1, §. 2. Nec obstat, esse
& certamina ludrica, ludosque equestris;
hæc enim belli sunt tantum imagines atque
ludibria. II. Displacet hæc definitio illis,
qui bella geri tantum putant a superioris po-
testate; BYNKERSH. *Quæst. J. P. I*, 1; &
HEIN. J. N. II, §. 191. Enimvero ea hic
adhibenda erat latissima significatio, quæ
omnia belli genera contineret; jam enim,
quid bellum sit, quæritur, non a quo &
quonam jure suscipiatur. Consentit usus lo-
quendi & origo vocis; cf. GROT. *l. c.*,
MENAG. *Amœn. voc. Bona*. III. Quoniam

mala alteri efficaciter inferri possunt sine vi , immo & blanditiis , v. L. I , §. 3 , D. de Serv. corrupt. , quæ non veniunt belli nomine , ideo definitio a KOELERO , Exer. §. 806 , & dein a DRIESIO I. J. U. §. 358 data , in qua nulla fit mentio violentiæ , magis determinari debuit . Vid. PUFEN. J. N. & G. I , I , 8. IV. Evidem BYNKERSOH. I. c. non modo vim , sed etiam ingenium , artem , consilium ad bellum pertinere tradit , quod utique verum est , sed hæc etiam eo tendunt , ut vis comparetur , aut fiat , aut arceatur , aut eludatur .

Status na-
turiæ est
status pa-
cis.

§. 160. Etsi vero jus defensionis & jus belli ad jura connata pertineant: quum tam non prius illa exercere liceat , quam erumpente læsione (§. 153) , quæ finibus creatoris ratione sola cognitis , atque adeo humanæ naturæ & felicitati utique est adversa (§. 148) ; consequens est , statum hominis naturalem absolutum esse statum pacis (§. 159) ; contra statum belli esse tantum hypotheticum , quippe qui superveniente primum illico quodam facto consurgit . Quid , quod bellum subsidium est , quo uti licet ad declinandas læsiones ; patet igitur ad eum scopum nos natura impelli , ut pace fruamur .

Falsam porro esse intelligimus HOBESII , & THOMASII doctrinam , quo alteri *Status naturæ statut belli* , de Civ. IX , 3 , XIII , 7 ; alteri plus saltem de statu belli partici-
pa-

pare visus est, Fund. J. N. III, III,
 §. 55; nisi cum GUNDLINGIO J. N. C. 3,
 §. 19, de statu naturali hypothetico intelli-
 gantur, & improprius sumpto, in quo cum
 nullum sit imperium (§. 142), læsionem vi
 & armis arcere saepius oportet. Sane ipse-
 met HOBBESIUS bellum definit: *Tempus il-
 lud, in quo voluntas certandi per vim verbis,
 factisque declaratur, de Civ. C. I, §. 11;*
 quo satis clare innuit, statum belli non esse
 originarium, sed per declarationem adsumi.
 Immo vero is diserte docuit, *belli calamita-
 tes & pericula natura omnes fugere, de Civ:
 Epist. Dedic.*; & hinc primam nature legem
 esse: *Quærendam esse pacem, ubi haberi
 potest; ubi non potest, querenda esse belli
 auxilia, de Div. II, §. 2.* Inde igitur re-
 petenda est tamen apertæ contradictionis cau-
 fa, primo quod pravos multorum affectus
 (§. 53) subjecerit in locum communis na-
 turæ; IDEM de Civ. C. 1, §. 3. seqq.; dein
 quod ex obligatione se conservandi jus belli
 etiam in non lædentes derivarit, *I. c. I,
 §. 7, seqq.*, quod tamen supra (§. 154) satis
 explofimus.

§. 161. Omne id, quod jure suscipi- *Inustum &*
honestum
 tur, seu quod legi & juri non repugnat, *latissime.*
Inustum est latissime: id ipsum dicitur *Ho-*
nustum, quatenus ad voluntatem agentis
 refertur, ac porro omnium approbationem
 demeretur. *Justo inustum, honesto inho-*
nustum, seu turpe, sunt contraria; itaque
Inustum est, quidquid juri ac legi non con-
 gruit;

gruit; *In honestum*, quod cum agentem moraliter reddat imperfectiorem (§. 62), nullius approbatione dignum esse potest.

I. A jure pro lege accepto id, quod rectum est, justum latius dici GROTIUS observavit, *J. B. & P. I, I, §. 9*; quod ipsum jam docuerat ARISTOTELES *Eth. V, c. 3*: οὐδέποτε ἀδικος ἡν, νόμους εἰς δίκαιος. Quoniam is, qui contra legem admittit, est *injustus*; *justus* est, qui legem servat. Unde *Justi*, id est legitimi, liberi in XII. Tabulis, *Tab. IV*; *Justæ nuptiæ*, pr. *Inst. de nupt.*; contra *Injusta uxor*, *L. 13. D. ad L. Jul. de adult.*; *Inustum testamentum*, *Tit. Dig. de injust. rupt.*, nominantur. Cf. & DARIES. *Obs. XXXVIII, §. 2, seqq.* II. *Honestum* vocat CICERO, *Quod per se ipsum possit jure laudari*, *Fin. II, 14, seqq.*; & *quod vere dicimus*, *etiam si a nullo laudetur*, *natura esse laudabile*, *Off. I, 4*: quem amplissimum sensum retinuerunt GROT. *I. B. & P. I, II, §. I, n. 2*; WOLFFIUS *Ph. Pr. I, §. 171*; DARIESIUS *I. J. U. §. 158*; BURLAMAQUIUS *El. J. N. II, c. VIII, §. 31*; aliique, quibus honestum est, *Quidquid legi naturali convenienter fit*, cui CICERO *inhonestum*, *pravum, fœdum, flagitiosum* opposuit; *Fin. III, 4*.

Pium, tum
justum, &
honestum
minus la-
te.

§. 162. Quoniam vero legum & officiorum genera tribus summis capitibus, nimirum DEI cultu, philautia, & socialitate constant (§. 115), singula quoque pro-

propriis nominibus oportuit insigniri : hinc quod officiis erga DEUM convenit , *Pium* , quod officiis erga se ipsum , *bonum* , quod officiis erga alios , *justum* sensu minus lato adpellari confueverunt ; quorum contraria , scilicet *impium* , *inbonum* , & *injustum* facile tacentibus nobis intelligentur.

I. Quamvis generaliter *pium* vocetur officium , quod patriæ , parentibus , ceterisque conjunctis , immo & personis misericordibus præstatur ; *L. 2. de Inoff. Test.* , *L. 23 D. de his* , qui not. inf. , *L. 35. C. de Epis. & Cler.* , & CICERO de Invent. II , §. 22 , & 53 ; proprie tamen adhibetur ea vox ad officia , quæ Deo debentur , declaranda , *Vid. CICERO pro Dom. xli* , & *N. D. II* , 61 , eoque sensu jam recepta est in nostra disciplina ; WOLF. *J. N. T. I. §. 1127* ; BURLAMAQ. *El. J. N. I* , c. XI . §. 10 , HEINEC. *El. J. N. I* , §. 128 ; DRIES. *I. J. un. §. 173*. II. Arctior honesti significatio satis colligitur cum ex CICERONE , qui saepius illud ab justo ratione quadam distinxit ; cf. *Fin. II* , 16 ; tum vero ex *L. 60 Dig.* , & §. *Inst. de J. & J.* , ubi cum tria tradantur juris præcepta , *honeste vivere* , *alterum non ladere* , & *suum cuique tribuere* . horum primum ad nos pertinere optimi quibus interpretes observarunt ; cf. HOTTONIANUS , BROEUS , *Ant. MATTHÆI ad §. 3. cit.* ; & ideo in *L. 144* , & *L. 179 D. de Reg. Jur.* , *non omne* , *quod licet* , (seu quod justum est) *honestum esse* pronunciatur : atque hunc

hunc posteriorem sensum THOMASIUS Fundam. I, C. VI, §. 40; SCHIERSCHMID. El. J. N. §. 198; BAUMGARTEN Eth. Ph. §. 300, aliique plures sunt secuti. Quod si honestum in hac strictiore significatione sumptum mavis cum BARBEYRAC. ad Pufendorf. J. N. & G. I, VII, 7; & BURLAMAQUO I, XI, 10, temperatum dicere, aut moderatum, de voce non disputabo. III. Denique quando CIC., Fin. V, 23, tum GROTIUS l. c. I, I, §. 3, justum vocant, quod naturae societatis ratione utentium congruit, satis ostenderunt officia omnia erga alios illa voce designari. Hæc tria officiorum genera distinxit etiam Divinus SALVATOR, erudiens nos per Apostolum, ἡτοι ταφεστος και δικαιος και ευθεως ζητουμεν ει τα νη αιων: Ut sobrie, seu honeste, & juste, & pie vivamus in hoc saeuio: ad Titum II, 12.

Justum,
æquum,
honestum
& deco-
rum stri-
ctissime.

§. 163. Sed tam officia erga nosmetipsos, quam officia erga alios bifariam considerari possunt; ac illa quidem prout a statu nostro, vel interno, vel externo, hæc vero quatenus a jure alterius aut perfecto, aut imperfecto ducuntur. Ideo in arctissima significatione honestum dicitur, quod statum nostrum internum perficit; decorum, quod statui nostro externo consentaneum est, & hinc ab aliis sensi percipi, gratumque judicari potest; justum quod suum alterius non violat; æquum denique, quod aliorum meritis congruit atque dignitati: & jam in honestum, inde-

corum,

corum, *injustum*, *iniquum* strictissime quid sit, planum erit definire.

I. Evidem *decorum* latius sumptum, seu generale, ab honesto, recto, & laudabili nequit separari, CICERO *I. Off.* 27, 28; immo hæc vocabula idem censentur declarare, CICERO *Fin. III*, 4. *Decorum* tamen, speciale oculis judicari, idem *Nat. D. II.* 38; & porro in omnibus factis & dictis, in corporis motu & statu, binc & in formositate, ordine, ornatu ad actionem apto cerni dicitur, quo probemur iis quibuscum & apud quos vivamus, idem *Off. I.* 35; atque huic decori notioi WOLFFIUS *Ph. Pr. I.* §. 194; ERNESTI *Init. Doctr. sol. III*, §. 175, sqq; tum BAUMGARTEN *Eth. Phil.* §. 380; immo & DARIESIUS *I. J. U.*, §. 157, inhaeserunt. Quare nulla usus loquendi habita ratio est a THOMASIO *Fund. I. C. VI*, §. 41, & SCHIERCSHMIDIO *I. r. §. 198*, qui officia erga alios imperfecta ad *decorum* retulere. Ceterum *decorum* dupli ex fonte derivatur: aliud enim *naturale* est, quod in ipsa rerum natura rationem habet, v. c. erectum habere vultum, nec fuco illitum; aliud *arbitrarium*, quod pendet ab hominum opinione, veluti barbam radere, caput detegere salutandi caussa, commode saltare; cf. CORNEL. NEP. *Præf.* Eadem est ratio indecori. II. Quoniam igitur honestum externum decori venit nomine, supereft, ut honestum strictissime ad officia erga nos interna referamus, non vero ad officia erga alios imperfecta, ut HEINECCIO visum est; *El. J. N. I*, §. 118. Potest nimirum homo decorus

esse , quamvis dishonestus sit , ac turpis , qualem describit HORATIUS: *Introrsum turpe , speciosum pelle decora* ; I , Epist. 16 , v. 45. III. Tertiam & propriam *justi* definitionem suggerit CICERO , dum ait , id esse , nemini nocere , I. Off. 7; non appetere alienum , qui enim id faciunt , proprie sunt *injusti* , *Tusc. Disp.* III. 17 : cf. & GROT. J. B. & P. I, l. 5; PUFFENDORF. de O. H. & C. I, C. 2 , §. 12. IV. Non minor inconstantia est vocis *æqui* ; jam enim accipitur (a) generatim pro omni justo , & bono etiati positivo , L. I. D. de J. & J; jam (b) vero pro eo , quod juris naturalis proprium est , CICERO Top. V , & VII , L. 2 , §. 5 , D. de Aq. & Aq. Pluv. ; jamque signatim (γ) pro eo , quod præstare aliis obligatur , sed solum imperfecte , CICERO Orat. Partit. XXXVII , Fin. II , 18 ; GROTIUS de Æquit. Indulg. C. I , §. 2. Nos tertiam tenuimus significationem , quam WOLFFIUS Ph. Pr. I , §. 240 , & DARIESIUS I. J. Un. §. 155; NETTELBLAT , Synt. J. Un. I , §. 87 , aliique sunt amplexi : scilicet uti decorum est honestum externum , ita æquum est justum internum , quod vi & bello nequit extorqueri.

Virtus &
vitium
quid.

§. 164. Certa agendi facilitas ac promptitudo habitum constituit : hic , si in legibus custodiendis adquiritur , Virtus ; si autem in iisdem violandis , Vitiositas nuncupatur ; quem vero tam legum custodia , quam violatio ab aliquo intellectus & voluntatis actu proficiuntur (§. 82) ,

con-

consequens est, ut nuda omnique mentis habilitate destituta actionum externalium convenientia, vel inconvenientia cum lege nec virtutis nec vitiositatis nomen mereatur.

I. In definienda virtute, & vitiositate satis consentiunt scriptores; cf. WOLF, *Pb. Pr.* §. 421, & *J. N. T.* I, §. 277; DARIENSIUS I. J. U. §. 148. Nec alia mens fuit CICERONIS, cui *Virtus est consentiens cum ratione & perpetua constantia*, *Parad.* III; *Constans & perpetua vitae ratio*, *de LL.* I, 17. Vitiositas vero habitus aut affectio in tota vita inconstans, & a se ipso dissentiens, *Tusculan.* IV, 13, & 15. Et quoniam leges vel naturales sunt vel positivæ, hæ porro vel divinæ vel humanæ (§. 89), etiam virtutem in *Philosophicam*, *Civilem*, & *christianam* abire recte ab aliis observatum est II. Actio igitur materialiter bona & justa esse potest in sensu stricto, et si formaliter sit mala, in honesta, & injusta latiore significatione (§. 62, & §. 63); quod & pulchre distinxit Phileimon apud STOBÆUM serm. IX, justum vocans:

*Non quisquis illa quolibet præstat modo,
Sed qui dolosi nescius fuci, integra
Probitate justus esse, non credi studet.*

§. 165. Quoniam multiplex habituum agendi, & legum naturalium consideratio est, ideo tam virtutes philosophicæ, quam vitia in varias formas dipescuntur.

Quæ variaz
utriusque
genera.

Uti enim habitus , qui in edendis actionibus vel piis , vel honestis , vel decoris , vel justis , vel æquis comparantur , singulari pietatis , honestatis , decentiae , justitiae , aut æquitatis veniunt nomine , ita quæ his virtutibus opposita sunt vitia , scilicet *impietas* , *inhonestas* , *impudentia* , *injustitia* , *iniquitas* , cernuntur in habitibus contrariis ; quum tamen justi & honesti , dein injusti & inhonesti jam amplior , jamque arctior sit significatio (§. 161) , manifestum est , etiam justitiam , & honestatem , tum injustitiam , & inhonestatem , nunc magis , nunc minus late patere .

I. Quamquam CICERO omnia officia erga alios , immo & officia erga Deum aliquando justitiae subjiceret , *Partit.* XXII ; & ideo eam definiret , quod sit *Habitus animi jus suum cuique tribuens & dignitatem* , *Heren.* III , 2 ; *Inv.* II , 53 ; ubi tamen proprias singulis virtutibus assignat functiones , *Pieta-tem in Numinis cultu* , *N. D.* I , 41 ; II , 61 , & *Off.* II , 3 ; *Justitiam vero in tribuendo suum cuique collocavit* , *Fin.* V , 23 ; hujusque primum manus fecit , ne cuius quis noceat , *Off.* I , 7 ; tum *justitiae partes esse* dixit , non violare homines , verecundiam non offendere , in quo maxime perspiciatur vis decori , *I. Off.* 28 . Quapropter etiam GROTIUS *J. B.* & *P. Prol.* §. 8 , *Injustitiam non aliam naturam habere* scribit , quam alii usurpationem contra , *Justitiam totam in alieni abstinentia positam esse* , *I. c. §. 44* ; atque in id veteres , &

& recentiores omnes conspirant. Cf. KOE-
LER. Ex. §. 797 ; Coccejus *Diff. ad*
Grot. XII , §. 53. II. Æquitas quoque
sæpe pro ipsa justitia usurpatur a CICERO-
NE ad *Heren.* III , 2 ; quando vero duplex
ejus dicitur vis , cuius altera *justi ratione de-*
fendatur , altera ad gratiam & beneficium per-
tineat , IDEM Partit. XXXVII , abunde in-
nuitur æquitatem quidem cum justitia esse
conjunctam , utramque tamen proprium
suum munus tueri : quod ipsum ex CICERO-
NE *Off. I , 7 , 14 , & 16 ,* nec non ex L. I ,
§. 5 , *D. de aq. & Aq. pl.* adparat. Ceterum
in tanta loquendi inconstantia oportebat om-
nino firmas dari vocabulorum notiones (§.
112 , sch.) , uti & *Cel.* WOLFFIUS verissime
adnotavit ; *Ph. Pr. I , §. 160.*

§. 166. His ita expositis non abs re erit
varia , quæ faciunt , justitiæ genera bre-
viter indicare : ac primo quidem eam *Uni-*
versalem esse , vel *Particularem* dicunt. Il-
lam esse ajunt , quæ virtutes omnes vel
simpliciter , vel saltem ad aliorum perfe-
ctionem indefinite relatas complectatur ;
huic autem subjiciunt actiones , quæ juri
alicujus definito & peculiari , & porro
servandæ inter homines æqualitati con-
gruant. Deinde particularem justitiam vo-
cant *Distributivam* , quæ in rebus secun-
dum quid communibus (§. 158) di-
videndis versetur proportione geometrica ;
& *Commutativam* , quæ ad res proprias in
alterum proportione arithmeticâ , adeo-
que

L

Justitia
universalis
& particu-
laris.

que sine læsione transferendas pertineat. Denique justitiam in persolvendis præmiis. Remuneratoriam, in pœnis infligendis *Ulricem*, seu vindicativam nuncupant.

I. Justitiam simpliciter universalem definit ARISTOTELES, *Virtutem faciendi*, quod lex facere jubet, prorsusque cuncta, que ex virtutibus ducuntur, *Magn. mor. I*, c. 34; & ideo alibi *justum* vocat, qui legibus pareat, & *injustum*, qui contra legem committit, *V. Nicom. 2.* Quorsum & locus MACROB. *Som. Scip. I*, 8, pertinet: ast de Justitia universalis secundum quid locutus est Philosophus, *V. Nicom. 3*, dum ait: *Hæc igitur justitia virtus est, illa quidem perfecta, non tamen simpliciter atque absolute, sed si ad alterum referatur.* Alii priorem, alii posteriorem sensum sunt amplexi, cf. GUNER. ad *Daries. §. 332*, n. 3: ast ita facile conciliari possunt. II. Contra justitia particularis ARISTOTELI est distincta virtus, & a ceteris omnibus diversa, ob quam quis plus non sumit, aut vindicat, quam oportet & æquilitatem servat, *Nicom. V. 4*, & *Mag. mor. I*, 34; cui opponitur *injuria*, & *cupiditas habendi plus suo*, It. cc., illaque versari dicuntur *in honore, aut pecunia, aut salute, aut si quo uno nomine hæc omnia complecti posset, in eo scilicet quod nostrum supra nuncupavimus* (*§. 143, 144*); nam justitia in non accipiendo alieno colloquatur, & a liberalitate secessit, *Nicom. IV*, C. 1; quo etiam PUFFENDORFII de O.H. & C.I, C.2, §. 14; & TERVERI, CHAR. MICHAELIS ad h. l.; tum DARIESII I. J. U. §. 233 & alios.

aliorumque est sententia, Ceterum carpitur a multis hæc distributio, quod particularis justitia in universali jam contineatur: ast hi animadvertere poterant, non proprie sic dividit justitiam, sed vocabuli ambigui variam significationem explanari. III. Particularis justitiæ unam speciem dixit ARISTOTELIS, quæ sit *in distributione rerum communium*, alteram quæ *in rebus communicandis vim corrugandi & emendandi habeat non modo inter volentes ed, setiam inter invitatos*, Nicom. V., c. 5, & c. 7. Et quum Relatio, quam habent duo numeri inter se comparati, a Mathematicis dicatur *Ratis*, & quidem geometrica, si per divisionem, arithmeticæ si per subtractionem ea inveniatur; proportio autem geometrica sit *Similitudo duarum rationum geometricarum*, veluti 6. 2 :: 12. 4, & proportio arithmeticæ sit *Similitudo duarum rationum arithmeticarum*, veluti 7. 2 :: 5. & 8. 3 :: 5, non inepte docuit Philosophus, priorem proportionem in justitia distributiva, posteriorem in commutativa observari, Nicom. V, c. 7. Hinc si A unum, B duo, C tria contulerint, & 24 adipiscantur, illi 4, isti 8, huic 12 debentur. Fingas vero Cajum quinque Titio abstulisse; jam primo totidem subtrahere, & ea addere secundo opportebit. IV. Denique justitiam remunctoriam & vindicativam KOELERUS Ex. §. 1446, & DARIESIUS I. f. un. §. 235, aliquique adornarunt, quibus præsertim quoad alterum membrum jam GROT. II, XX, 1, n. 2; & PUFFENDORFIUS I, VII, 10, 13, VIII, III, §. 3, præverunt. Prioris justitiæ exemplum adsignat ipse ARISTOTELIS.

LES, *Mag. mor. l. 34*, in distributione præmiorum, & in certaminibus athletarum: exempla vero posterioris ex §. 77, sch., interim erui possunt.

Expletrix, & attributrix, §. 167. Etsi vero hæc justitiæ distributio per se non fit absurdia, ea tamem miris ambagibus involuta fuit & logomachiis: quare præstat modo illam divisionem, quæ a jure illius, cui aliquid tribuitur, descendit, cum Grotio usurpare: si nimicum juri alterius perfecto respondet, & hinc suum & facultatem respicit, justitia est *Expletrix*; si vero respondet juri alterius imperfecto, adeoque meritum tantum respicit, & dignitatem, justitia est *Attributrix*. Nec ullum reperire est justitiæ munus, quod non uno, aut altero. hujus divisionis membro contineatur; ceterum abunde patet solum justitiam explicarem proprie & stricte justitiæ nomine venire.

I. Inde autem ortæ sunt ambages, quod justitiæ distributivæ & commutativæ notiones, propter adducta a Philosopho, *Nicom. V. 5*, particularia exempla confusæ, nec satis universales visæ sunt: quare interpretes non pauci justitiam *distributivam*, *distributivam*, non in re secundum quid communi dividenda, sed in præmiis tantum, vel poenis assignandis versari, perperam sibi persuaserant; cf. GROT. J. B. & P. I. 1, 8, & ibi *Heinecc.* Contra justitiam *commoditatem* vocarunt commu-

tativam nimis arcto vocabulo, cum potius *Emendatrix*, vel *Correctrix* ad mentem ARISTOTELIS fuisset dicenda, ut omnem justitiae formam hoc genere comprehensam exhaustiret; cf. GROT. l. c. Dein obscuris utebantur proportionum definitionibus; arithmeticam enim plerique per *respectum rei ad rem*, & geometricam per *respectum rei ad personam* declarabant. V. NOODT. *ad Pand.* L. I, 1. Ac illam quidem ad facultatem, hanc ad meritum unice pertinere arbitrati sunt, aliter ac sensit Philosophus, qui etiam in jure perfecto, veluti in *pecuniae communis distributione eadem ratione*, scilicet geometrica, utendum esse dixit, quam habent inter se res eae, quae ab uno quoque in medium allatae sunt; Nicom. V, 7. Denique determinationem ejus, quod pluribus jure perso^{lo} tribuendum est, multi cum ipso distributionis actu confundebant; et si enim determinatio ejus, quod cuique ex re communi debetur, fiat ratione geometrica, tamen certum est, in ipsa retributione rationem arithmeticam esse observandam. Cf. WOLF. *Hor. subs. l. c.*, An. 1729; *Trim. vern.* IV, II, §. II. Igitur alteram illam justitiae divisionem a veteribus confuse indicatam (§. 165, sch.) primus exposuit GROT. J. B. & P. I, §. 8, quae, quidquid *coccejo* videatur, nullum jus imperfectum agnoscenti, in *Comment. ad GROT. l. c.* (§. 155, sch.), eximium tamen usum habet in nostra disciplina: ast minus recte autem vir ille summus justitiam attributricem distributivae, & expletricem commutativae respondere; uti enim utraque justitiae par-

particularis forma in expletrice continetur : ita distributiva plures semper ad rem communem concurrentes supponit ; contra attributrix etiam intuitu unius tantum exerceri potest. Id etiam movit PUFFENDORF. J. N. & G. I., VII., 8; tum DARIESIUM. I. J. U. §. 232, aliosque, ut iustitiæ universali attributricem, & particulari expletricem substituerent. Et ita quæ contra Aristotelicam proportionis doctrinam GROTIUS, & COCCEJUS, l. c. n. 2, & 3, tum HOBBE SIUS de Civ. III., 6, Gerh. NOODT ad Pand. I., I., Tit. I., aliquæ excogitarunt, facile corruunt omnia.

Personæ,
& actionis.

§. 168. Porro iustitiam aliam personæ, seu internam, aliam actionis, seu externam, faciunt : priorem per habitum animi suum cuique tribuendi, posteriorem per nudam actionis cum lege convenientiam definiunt. Enimvero, etsi hæc formam habet iustitiæ, & similitudinem, vera tamen iustitia non est (§. 164); quod talis autem esse judicetur, inde evenit, quia homo aliorum hominum mentes nequit penitus introspicere (§. 18). Ceterum duplex hæc personæ & actionis consideratio non tam iustitiæ propria est, quam reliquis etiam virtutibus communis, siquidem actiones piæ, honestæ & æquæ nunc a proposito voluntatis, nunc ab alia quoque causa proficiisci possunt (§. 164).

Recte porro distinxit ARISTOTELES, V.
Etb.

Eth. 10, § 11, *injuste agere, & agere quod injustum est*; CICERO autem *hoc ipsum dixit ita justum esse, quod recte fit, si est voluntarium*, *Off. I, 9, & III, 17*; *actio scilicet bonitatem materialem, seu physicam habere potest, et si bonitate formalis, seu morali destituatur juxta illud HORATII:*
„Oderunt peccare boni virtutis amore: „Tu nihil admittes in te formidine pœnæ: „I, Ep. XVI, v. 52: atque hac de causa HOBESIUS justitiam personæ a justitia actionis, & hominem justum ab infonte, de Civ. III, 5, tum COCEJUS jus a virtute, Diff. proœm. ad Grot. X, 15, denique justitiam internam ab externa separarunt; vid. HEIN. El. J. N. II, §. 150. Quo sensu tamen justitia attributrix, quæ proprie interna audit, justitia actionis tantum atque externa esse potest; nec enim ea divisio propria est justitiae stricte talis, sed etiam reliquis virtutibus communis (§. 134). II. Jam vero intelligimus, cur definitio *justitiae* data ab UPLIANO in *L. 10, pr. D. de J. & J.*, quod sit *Conſans & perpetua voluntas (habitus nimirum seu virtus §. 164) jus suum cuique tribuendi*, ad justitiam personæ & expletricem simul spectet, siquidem *Suum* in sensu technico propriæ disciplinæ (§. 143) accepisse judicandus est. Ii vero, quibus justitia est *bonitas*, (id est promptitudo, quod alii bonum est, agendi) *per sapientiam administrata*, WOLF. *Th. N. I. §. 1067, DARIES. §. 229; seu bonitas in spiritu proportionalis*, BAUMGART. Metaph. §. 906, illi hanc virtutem in latiore significatione considerarunt.

Quisque
justus &
bonus
præsumen-
dus,

§. 169. Quemadmodum bona & recta non aliter est actio, quam si in singulis suis partibus consentit cum lege (§. 82), ita *virum bonum* esse illum tantum appellandum putamus, qui pietate, justitia, æquitate, honestate & decentia est imbutus; justum vero in sensu latissimo (§. 161), qui nullis adhuc foedatus est vitiis contrariis: quum autem hæc vitia primum actionibus nostris liberis adsciscantur, nemo a sola natura vitiosus, foedusque esse intelligitur, sed demum a ccedente quodam facto. Hinc quilibet homo etiam eo jure connato gaudet, ut justus amplissima significatione esse judicetur, donec ex turpibus factis de ipsius malitia & vitiositate constiterit.

Viri boni ideam præclare expressit CICERO: *Virum, inquit, bonum aliquem esse, innumeralibus officiis & laudibus continetur*; Off. III, 19. Et alibi: *Omnibus enim virtutibus instructos, & ornatos cum sapientes, tum viros bonos dicimus*; *Tusc. disp. V, §. X, cf. & de Amicit. C. V*, quocum consentit HORATIUS:

Vir bonus est quis?

Qui consulta patrum, qui leges juraque servat. I. Ep. XVI, v. 40.

Quoniam vero quisque jure connato gaudet, ut justus esse judicetur, donec appareat contrarium: ideo si actio externe justa sit, etiam pro justa interne est habenda. Itaque vul-

vulgatum illud adagium: *quilibet præsumitur bonus, donec probetur malus*: verum est in sensu negante vitia facta adquisita, non vero in sensu affirmante hominem omnibus virtutibus ornatum atque instructum.



CAPUT QUINTUM.

DE

VARIA ACTIONUM MORALITATE, IMPUTATIONE, AC CONSCIENTIA.

- | | |
|---|---|
| <p>170. Differunt actiones moralitate.</p> <p>171. Pro obligationis magnitudine.</p> <p>172. Ac libertatis.</p> <p>173. Adeoque arbitrii & rationis gradu.</p> <p>174. Quis dicatur actionis auctor?</p> <p>175. Quid imputatio?</p> <p>176. Haec constat ratiocinio.</p> <p>177. Tam quoad factum, quam quoad jus.</p> <p>178. Est vera vel falsa.</p> <p>179. Certa vel incerta.</p> <p>180. Imputationis subjectum, objectum, & fundamentum.</p> <p>181. Causa actionis solitaria, auxiliatrix, præcipua, subjecta.</p> <p>182. Que causa morales speciatim.</p> <p>183. Actio non imputatur, si careat spontaneitate.</p> | <p>184. Si non sit fortuita agenti.</p> <p>185. Vel in ejus intelligentiam non cadat.</p> <p>186. Ex gradu moralitatis accipitur imputations mensura.</p> <p>187. Actio facilis minus imputanda est, quam difficilis.</p> <p>188. Invita minus, quam ultronea.</p> <p>189. Contra causæ præcipuae magis, quam subjectæ.</p> <p>190. Quenam agendi momenta augeant imputationem?</p> <p>191. Culpa minus imputatur, quam dolus.</p> <p>192. Actio deliberata magis, quam non deliberata.</p> <p>193. Quando ex intentione & proposito imputatio sumat incrementum?</p> |
|---|---|

194. Et pro gradu diligentie aut negligentie varietur?
195. Tam pro modo atatis, temperaturae, & affectuum?
196. Cur actio composita magis estimetur, quam simplex?
197. Quid forum, & quotplex?
198. Existit forum conscientia.
199. Hoc antecedens est, vel consequens, theoreтика, vel practica, bona, vel mala.
200. Recta, vel errans, probabilis, vel improbabilis, vel dubia.
201. Quatenus teneamur sequi dictamen conscientiae.
202. Quid si fuerit errans?
203. Vel dubium?
204. Vel tantum probabile.
205. Cur id imprimis tenendum sit, quod verisimillimum?
206. Opinione minus probabili rejecta.
207. Quid objiciant adversarii?
208. Refelluntur argumenta a notione probabilis, favore libertatis, & defectu legis petita.
209. Tum & reliqua fallacia diluuntur.
210. Quae dormiens dicatur conscientia, quae exasperfacta.



§. 170.

Differunt
actiones
moralita-
tē.

QUOMODO actiones humanæ ratione subjecti , in quo versantur , a se invicem discrepent , explicatum est superiori capite : nunc de discrimine , quod eadem a quantitate bonitatis , vel malitiæ moralis accipiunt , consentaneum est docere. Etsi enim non defuerint Philosophi , quibus æqualia esse peccata & recte facta videbentur , paradoxam tamen illorum sententiam ex iis , quæ de obligatione , lege & libertate alibi tradita sunt , facile est refutare.

Rationem , ob quam Stoci peccata omnia esse paria arbitrarentur , exponit LAERTIUS L.

VII. seg. 120. *Quia uti verum vero magis tale non est , neque falsum falso , ita nec peccatum peccato , num qui magis minusve delinquit , pariter abest ab recto :* Et jam lineas transfiliit : *quod cum feceris , ut ait CICERO , culpa commissa sit , quam longe progrediare , cum semel transfieris , ad augendam culpam nihil pertineat.* Paradox. III , c. I. Quare & JCti in Stoicorum disciplina educati , eum , qui ex acervo frumenti modium sustulit , totius rei furtum facere , & illum , qui dolium apesruit , & inde parvum vini abstulit , totius furem videri , judicabant. L. 21 , Dig. de furt. Quibus porro succinuit HORATIUS I. Epist. I , v. 55.

C6

*De mille fabæ modiis quum surripis unum,
Damnum est, non facinus mihi pacto lenius isto;
Simili ratione arguebant Stoici actiones bo-
nas pares esse inter se, quia si bene facta
recte facta sint, & nihil recto rectius, certe
nec bono quidem melius inveniri possit; CI-
CER. Parad. III, 1.*

§. 171. Scilicet convenientia actionum liberarum cum lege illarum rectitudinem, repugnantia vero peccatum constituit (§. 82), sed legis robur ex obligationis quantitate, hæc vero ex momenti cum actione copulati pondere & viribus æstimatur (§. 77); fatis itaque liquet, nunc maiores, nunc minores leges a nobis posse custodiri, aut violari, & porro tam peccata, quam recte facta disparia aliquando esse oportere.

Quis igitur non miretur, inter præcepta Zenonis & illud recenseri: *Non minus delinquerre eum, qui gallum gallinaceum, cum opus non fuerit, quam, qui patrem suffocaverit:* CICERO pro Muræn. 29. Sane quando istud Paradoxum exposuit Tullius ex mente Stoicorum, illud tamen inter servi & patris necem interesse tradidit: *Quod in servo necando semel peccetur: in patris vita violanda multa peccentur; violetur is, qui procreavit; is, qui aluit; is, qui erudit; is, qui in sede ac domo, atque in republica collocavit: multitudine peccatorum præstet, eoque pœna majore dignus fit:* ex quo loco abunde colligitur, etiam Zenonis æmulos, obligationes & leges alias aliis maiores, &

Q

deli-

Pro obli-
gationis
magnu-
dine.

delicta delictis praviora vel invitos statuisse.
Merito igitur in illos insurgit HORATIUS :

*Nec vincet ratio hoc , tantumdem ut peccet
idemque ,*

Qui teneros caules alieni fregerit horti ,

Et qui nocturnus divum sacra legerit.

I. Satyr. III , v. 115 , seq.

Sed & laudata Ofilii & Trebatii doctrina ,
quod furtum partis pro furto totius habeatur , ab ULPIANO est explosa cit. L. 21 ,
Dig. de furt.

Ae liber-
tatis.

§. 172. Sed neque actionum bonitas ,
vel malitia moralis aliter intelligitur ,
quam si eadem ab agentis libertate (§ .
62) , veluti effectus a suo principio &
causa , profiscantur (§ .46) ; quum igitur
quantitas causae quantitatem effectus
necessario determinet , & libertas , quæ
arbitrio & ratione agentis constat (§ . 44) ,
jam diminui , jamque augeri pro re nata
possit (§ . 45 , § . 30) , manifesto apparet ,
varios quoque , & multiplices esse debere
libertatis effectus : dari porro moralitatis
quantitatem , atque hinc liberas actiones
bonas , vel malas , alias aliis honestiores
fieri , vel turpiores.

Id est , quod Romanæ leges passim inculca-
runt : *In maleficiis animum & voluntatem spe-
ctari , non exitum ,* L. 14. Dig. ad L. Corn.
de Sicar. Ponitur autem voluntas pro liber-
tate , quia quælibet actio libera volitione ,
aut nolitione contineatur (§ . 44) . Et ita
eva-

evanescunt Stoicorum argumenta. Nihil enim esse vero verius, nec falso quidquam magis falsum, inde venit, quia immutabiles sunt rerum essentiæ, nec idem objectum magis esse vel non esse, quam reipsa est, potest: contra causâ moralitatis est agentis libertas, quam crescere, vel decrescere, & porro habere quantitatem qualitatis, seu gradum, minime repugnat. Nec illud minus manifestum est, alios magis, alios minus a scopo suo aberrare, & jam unam, jamve plures lineas transilire; unde conficitur, etiam legum transgressiones alias aliis maiores, vel minores cogitari posse; quid! quod unam falsitatem duabus falsitatibus esse minorem nemo profecto negaverit. Igitur etiam bonitatem, vel malitiam moralem actionum incrementi, vel decrementi esse capacem non est dubitandum. Consentiunt illa loca Sacrarum Litterarum: *Pro mensura peccati erit & plagarum modus*, Deuter. XXV, 2: *Pejus operati sunt quam patres eorum*, Jer. VII, 29: *Propterea qui me tradidit tibi maius peccatum habet*, Joh. XIX, 11: ad quæ non attendisse videtur MASCOV. in notis ad *Puffend. J. N. & G. L.* i, c. 8, §. 1, dum peccatorum æqualitatem saltem theologicam exsculpere voluit.

§. 173. Itaque in quantitatem moralitatis inquisitorus, actionem liberam ad arbitrium & rationem agentis, quasi ad pondera, atque mensuram exigere debet, illamque eo meliorem, vel pejorem judicare, I. quo magis quis sponte sua egit; II. quo plures habuit in sua potestate

actionem determinandi modos; III. quo graviora denique agendi, vel non agendi momenta perspicere potuit (§. 44, *scib.*). Contra tanto magis honestati, vel turpitudini actionis decadere tenendum est, quanto minus id, quod factum est, vel *spontaneum*, vel fortuitum, seu *contingens*, vel rationi pervium, seu *intelligibile* fuisse reperitur.

Magnitudinem moralitatis SATURNINUS causa, loco, tempore, quantitate, qualitate, & eventu, L. 16, §. 2, D. de pœn.; HUG. GROTIUS vero causa, quæ impulit, causa, quæ retrahere debuit, & idoneitate personæ, de J. B. & P. II, C. XX, §. 29; PUFFENDORFIUS objecto, effectu, & intentione, de Off. H. & C. II, XIII, §. 16; BARBEYRACIUS ad Puf. de J. N. & G. I, VIII, §. 5, re objecta, agentis qualitate, & conditione, ipsa actionum natura, & actionis exitu, esse dimetiendam vere quidem, sed obscure nimis statuerunt: ast si hæ aliæque ad desumendam actionum moralium mensuram ab aliis excogitatæ regulæ cum dependentia actionis a libertate comparentur, plenam omnino accipient lucem: tres enim illæ notæ essentiales libertatis, nimirum spontaneitas, contingentia, & intelligentia, primo separatim, dein coniunctim consideratæ, cum quantitatem ipsius libertatis, tum moralitatis gradum indicabunt. Cf. DARIES. *Instit. J. Un.* §. 161, sq. & Obs. J. N. XLI. Unde etiam vulgus intelliget, cur parricidium ultro, & ab homine maturæ ætatis patratum longe magis, quam

quam necem extraneo homini a puero fustigationis metu illatam detestemur.

§. 174. Actio, vel prætermissio libera singularis, quæ scilicet persona, loco, tempore, ceterisque adjunctis circumscripta est (§. 64), factum strictiore significatione (§. 48) nuncupatur: caussa efficiens libera est *Auctor*; qui vero auctorem facti declarat, *imputare* dicitur. Itaque *imputatio* judicium est, quo ejus actionis, vel prætermissionis singularis auctor, seu caussa efficiens libera esse affirmatur.

Fingas Cajum tibi jugulationem Sempronii narrare, statim habes actionis genus: porro rem ordine, quo gesta est, recenseat, atque omnes depingat circumstantias vulgato illo versiculo contentas: *Quis, quid, ubi, quibus auxiliis, cur, quomodo, quando:* S. THOMAS, I. 2, Q. VII, art. 3, & jam noscet actionem singularem, siue, quam vocant, *facti speciem*. Cf. SCHIERSCHMID. El. J. N. §. 119; & DARIES. Obs. J. N. XLVI. Tunc vero apparebit, an & quis sit *Auctor facti*, CICERO Ver. V, 26; *Auctor necis*, L. 7, C. de his quib. ut ind.; *Auctor delinquenti*, L. 3, D. de nox.act.; & cuinam jugulationis attributum, seu prædicatum morale adscribatur, & actio imputetur. Nimirum *imputare* in re agraria jam erat vites, atque arbores non exscindere, PLIN. H. N. XIV, 12; jamque, ut quidam putant, surculum plantæ inserere, seu inoculare, HOCHSTETER ad Puf. Exerc.

II, §. 39, not. a. Postea adhibita est illa vox in Arithmeticā ; dicuntur enim *putari*, seu confici rationes, CICERO *ad Att. IV, 11*; aut data & accepta in illas imputari, seu inferri, L. 19, 21, 29, D. *ad L. Falc.*, & hinc idem vocabulum ad rationes de moribus ineundas fuit translatum. Siquidem etiam in his perpenditur, quid aliquis debeat, aut quid ipsi debeatur, L. 6, §. 7, *de Off. Præf.* L. 2, §. 8, D. *si quis caut. jud. fift*; L. 4, C. *de peric. tut.* Consentient loca PHÆDRI I. Fab. XXII, v. 8: *Noli, inquit, imputare vanum beneficium mibi*; & VEL. PATERCULI: *Si quis, ait, hoc rebellandi tempus, quo Athenæ oppugnatæ a Sulla sunt, imputat Atheniensibus, nimium veri, vetustatisque ignarus est,* L. II, C. 23. Illud vero ex dictis patet, nemini ut auctori esse tribuenda consecaria, quæ cum ipsius actione non sunt copulata, aut quorum nexus non potuit prævideri. Ideo non statim imputari potest caponi, qui vinum vendit, hospitis ebrietas; nec qui hominem suspectum domo abire jubet, homicidii auctor est, si hic per fenestram se præcipitem egerit. Cf. BARBEYRAC. ad Puf. *de Off. H. & C. I, I, §. 18, n. 2.*

Quid im-
putatio?

§. 175. Quum autem nulla existere actio moralis, aut factum possit, ad quod non aliquæ pertineant morales consecutiones (§. 64), præmia nimirum vel pœnae (§. 74), sive merita generatim dicta (§. 143, sch. III); consequens est, ut auctor facti, etiam caussa libera moralium consecutariorum, seu meritorum declarandus

dus sit (§. 17) . Quare distinctam dant imputationis notionem ii , qui illam dicunt : *Judicium , quo factum aliquod , & ejus consectaria seu merita libero alicujus arbitrio assignantur.*

Ita re ipsa imputationem definivit WOLFFIUS Phil. Praet. I , §. 527 ; cui præiverant PUF-FENDORFIUS de O. H. & C. L. I , C. I , §. 17 ; & THOMASIUS Fund. I , VII , §. 27 : *Imputare enim , ait hic , esse declarare caussam moralem , ad quam debeat applicari effectus moralis. Atque hinc moralem effectum , seu actionis consectarium ad libertatem alicujus relatum mereri agens dicitur. Ita PHÆDRUS III , Fab. XI , 6 , Id demum , ait , est homini turpe , quod meruit pati ; & OVIDIUS I. de Pont. El. I , 62 : Estque pati pœnas , quam meruisse minus. Unde alia fluit meriti significatio , ab illa , quæ jus imperfectum designari supra diximus (§. 155) , probe secernenda.*

§. 176. Quoniam vero ex connexione momentorum cum actionibus obligatio-
nes emergunt & leges (§. 71) , nemo non videt , eum , qui imputationem facit , primo examinare , & tribuere alicui factum , dein animum ad facti consecatoria , seu obligationem & legem reflectere , postea judicium , quo auctor sanctioni legis subjiciatur (§. 74) , elicere oportere . Atque idcirco imputationem alii in applicatione legis ad factum , alii in judicio dif-

Hæc con-
stat ratio-
cinio.

discursivo, seu ratiocinio de moralitate actionis singularis collocarunt.

Juvat doctrinam imputationis severo Junii Bruti exemplo illustrare. Is detecta a Vindicio filorum conjuratione de recipiendo Rege, litteras ad Tarquinium datas *primum ex utriusque sigillo, dein etiam e manu agnovit, postea filiis dicendi, si velint, dedit copiam; cumque neuter auderet negare, eos observatis legibus, quæ de maleficiorum suppliciis erant receptæ, securibus decollari sivit*; DIONYS. HAL. p. 283. Contra servo, conspiratorum *indici, pecunia ex ærario, libertas, & civitas data est*, LIVIUS II, 5. Itaque Brutus primo factum illud cognovit singulare: *Filios perduellionis reos esse*; porro ei occurrit legis idea: *Perduellis capitalis esto*; atque ex duabus hisce præmissis deduxit conclusionem: Ergo Filii pœnam capitalem promerentur; adeoque propositionem minorem sive factum ad propositionem majorem, nimirum legis sanctionem applicavit, & de actionis turpitudine non ex ejus intuitu, sed ex singularibus circumstantiis ratiocinando tulit iudicium. Quomodo autem Vindicio meritum, seu præmium detectæ proditionis assignatum fit, ex dictis jam patebit.

Tam quo-
ad factum,
quam quoad jus.
§. 177. Inter actus, ex quibus constat
imputatio, unus est, quo factum; alter,
quo facti merita auctori assignatur (§.
176): priorem actum imputationem fa-
cti, posteriorem imputationem juris nun-
cupant, atque inde colligunt, in quovis
ju-

judicio imputatorio tres cogitatione faltem discerni posse personas : unam , quæ imputet factum ; alteram , quæ imputet jus ; tertiam , cui & factum & jus imputetur ; quia tamen nemini jus imputari sine facto potest , non obscurum est , imputationem facti , & imputationem juris non esse imputationis formas , sed tamquam partes ad unam plenam integrumque imputationem pertinere.

Igitur in superiori exemplo Vindicius *fatum* , Brutus vero *jus adolescentibus Romanis* imputarunt : ille *actoris* , iste *judicis* , hi vero *reorum* personas sustinebant. Ast uti hæc personarum distinctione sèpe animo tantum , & mente fieri potest ; ita *actoris* & *rei vocabula* ad pœnæ potius , quam præmii imputationem pertinent : quoniam vero post imputationem facti , an legis editio illud conveniat , vel disconveniat , exquiritur , & demum succedit imputatio juris ; ideo definitio imputationis a KOELERO Ex. §. 381 ; & HEINECCIO El. J. N. I. §. 95 , aliisque passim tradita , quod sit *applicatio legis ad fatum* , iis non probatur , qui non tam legem , quam potius meritum lege statutum , seu legis sanctionem ad factum applicari arbitrantur ; WOLF. Ph. Pr. I , §. 598 , sch. ; DARIES. I. J. U. §. 225 , sch. Enim vero lex a sanctione separari nullo modo potest (§. 74) ; igitur , qui applicat legis sanctionem ad factum , legem quoque ad illud applicare necesse est. Sunt denique , qui duas , facti scilicet & juris , imputationes dari negant ,

gant, quod una imputatio utroque tam facti, quam juris judicio semper absolvatur, MULLER. Ph. Pr. Un. §. 299; ACHENWALL. Obs. J. N. Spec. II, §. 9. Ast non illam esse imputationis divisionem, sed tantum vocis ambiguæ minorem, aut majorem potestatem exponi, antea vidimus, SCHIERSCHMID. El. J. N. §. 63; DARIES. Obs. J. N. XLII, §. 21.

Est vera
vel falsa.

§. 178. Nititur itaque omnis imputatio judicio discursivo, seu ratiocinio (§. 176), quod cum verum esse possit, vel falsum (§. 29), consequens est, imputationem in *veram* seu *rectam*, & *falsam* seu errantem non inepte distribui. Quare vera erit rectaque imputatio, si nec in idea facti, nec in idea legis, nec in utriusque inter se copulatione ulla occurrat repugnantia. Contra fallaciam instituunt in imputando, qui vel facto, vel lege, vel facti ad legem applicatione aberrant.

Scilicet, ut falsus syllogismus vel in materia peccat, seu principiis, vel vero in forma, seu conclusione; ita & imputatio exceptione vel facti, vel juris, vel modi certum factum cum certo jure connectendi refutatur. Factum ergo quod attinet: *Exploranda est veritas multum prius, quam stulta prave judicet sententia*, PHÆDR. III, 10, 5. Præterquam quod enim *minima*, ut ajunt, *circumstantia mutet casum*, seu facti speciem:

Aliquando & illi peccant, quos minime putas.

Et, qui non peccant, impugnantur fraudibus:

Idem

Idem III, X, 52, sq. Nec defuerant unquam homines lupi, qui factis caussis innocentes opprimunt, Idem I, I, 15; veluti Tarquinius, qui Turnum objecto falso criminis insontem nisi dedit, LIVIUS I, 51. Dein clara & distincta tenenda est legis cognitio, corruit enim imputatio, si nulla hujusmodi lex fuerit, ut si jam sublata sit, cuius rei exemplo onus circumcisionis esse potest, Act. XV, 28. Postremo si verum factum sit, & vera etiam lex, videndum tamen ratione formæ, an actio singularis sub data lege, tam quoad prædicatum, genus facti, quam quoad subjectum, facti auctorem, contineatur. Perperam igitur Pharisei opus in necessitate suscepimus, quasi legi de sanctificando sabbatho esset adversum, in poenam imputabant, Matth. XII, 10, sqq. Verissime autem PHÆDRUS: *Hoc admonere simplices etiam potest, opinione alterius ne quid ponderent, ambitio namque dissidens mortalium aut gratia subscribit, aut odio suo*, III, X, 54, sqq.

§. 179. Prout dein facti & juris cognitio ex ratione sufficiente vel non sufficiente arcessitur, etiam imputatio certa alia est, alia autem incerta: quæ posterior, si ad veritatem accedat magis, quam recedat, verosimilis dicitur & probabilis, si autem ad falsitatem propendeat magis, quam ad veritatem, quamvis penitus convelli, & inter apertos errores referri non possit, tamen improbabilis, nec similis vero (§. 137, sch.) nuncupatur. Atque ex his consequitur, ut primo, quo plures vel

Certa vel
incerta.
pau-

pauciores veritatis occurrunt notæ , eo *probabilior* , vel *improbabilior* fiat imputatio ; dein ut tamdiu *dubia* hæc hærere debeat atque suspensa , quamdiu rationes auctorem facti & consectorum affirmandi , vel negandi sunt æquales (§. 26).

Certa igitur erat imputatio , qua Duumviri Horatium sororicidam morte dignum judicabant , quia tam de facto , quam de lege sufficienter constabat . Et hinc populus Rom . reum absolvisse dicitur *magis admiratione virtutis* , *quam jure causæ* , LIVIUS I , 26. Ast Miloni Clodiūm insidias collocaſſe probabiliter tantum confecit CICERO pro Milon . X , qui probabilem narrationem vocat , *si in ea videbuntur inesse ea* , *quæ solent apparere in veritate* , Invent . I ; *sive id falsum est* , *sive verum* , ibid . c . 29. Etsi enim non detur probabile in se , & omne quod verum est , in se certo verum sit , quia simul esse falsum non potest ; ſæpe tamen probabile datur propter imperfectionem intellectus nostri , quoties plura quidem , sed nondum ſufficientia indicia veritatis ſeſe offerunt , *sive ea interna* ſint , & *ex ipſius rei natura* , *sive externa* & *ex aliorum declaratione orta* : *quæ posteriora tamen sine prioribus nullum in scientiis pondus habent*. Itaque tenendæ ſunt illæ Dialectices regulæ . I. Non omne quod possibile est , ideo esse etiam probabile : ita tribus ſi lodus tesseris , decem & octo puncta cadere quidem statim poſſent , aſt id eventurum verisimile non eſt . II. Eamdem propositionem poſſe uni eſſe certam , vel probabiliorem , *quæ alteri in-*

certa est , aut improbabilis , uti illa olim fuerat : *existunt antipodes.* III. Neminem tamen contrarium ejus , quod certo scit , posse probabile judicare. IV. Et denique animum libræ naturam habere , quæ perinde maneat in æquilibrio , sive æqualia in utraque lance , sive nulla prorsus pondera imponantur (§. 32 , sch.) ; DARIES. Obs. J. N. LVII.

§. 180. Nuñc quid imputationis subjectum sit , quidve objectum , & quodnam illa habeat fundamentum , haud difficulter perspicitur. Primo enim imputatio iis tantum fieri potest , qui agendi libertate sunt instructi (§. 174) ; dein in omnibus versatur actionibus , quæ aliquam habent moralitatem (§. 175) ; & demum a quadam semper pendet obligatione & lege , quibus actio imputanda comprehendatur (§. 176) ; quare , quæ a nonnullis statuitur , imputatio physica a recepto loquendi usu penitus abhorret.

Imputa-
tionis sub-
jectum ,
objectum ,
& funda-
mentum.

Quemadmodum , qui nummos accipit , illos non in dantis , sed ejus , cuius voluntate accepit , rationes refert ; ita non motus actionis physicus , sed moralis , & qui pendet a libertate , imputari dicitur. Hinc *initium belli* , ut observat TACITUS , Ottoni *nemo imputabat* , quod *a suis penne effet coetus* , Hist. II , 31. Nec quisquam bovi cornupetæ illatum sibi nocumentum duxerit imputandum , sed domino , in cuius potestate fuerat bovem custodire , Exod. XXI , 28 , 29.

29. Solent quidem saepius aliorum facta veluti parentum liberis jam prodefesse , jam nocere ; ast fortunæ ille est , aut infortunii effectus (§. 147) , non (ut ait HEINECCIUS El. I. N. I , §. 105) imputationis : si enim bona vel mala meriti generi non subsunt , ea ut præmia , vel ut pœnas tribuere , adeoque & imputare repugnat (§. 175, & §. 74. sch.). Ceterum ratio, ob quam actio capax est imputationis , recte quidem vel ab illius dependentia a libertate , PUFFENDORF. de O. H. & C. I , I , §. 17 , vel , quod idem est , ab ejus moralitate arcessitur , DARIES. I , J. U. §. 217 ; attamen ipsi imputationi locus aliter esse non potest , quam si factum ad obligacionem aliquam & legem referatur (§. 176) , ACHENWALL. Obs. 7. N. Sp. II , §. 9, sch. ; quorsum spectant verba Apostoli : *Ubi enim non est lex , nec prævaricatio* , Rom. IV, 15. Sed nec ulla est actio singularis , seu factum liberum eo sensu indifferens , ut nec moraliter bonum dici possit , nec malum (§. 64).

**Causa
actionis
solitaria
auxiliatrix
principia
subjecta.**

§. 181. Quæ hactenus de actione auctori imputanda generatim diximus , ea ad quamlibet causam liberam efficien- tem , seu ad omne auctoris genus applicanda sunt. Est autem hoc duplex , quidam enim sua tantum vi agunt , & dicuntur causæ actionis unicæ , seu solitariæ ; quidam autem alteri agenti vires suas accommodant , & sunt causæ auxiliatrices , seu sociæ. Quum vero quæ sociæ sunt causæ , non eadem semper se- ex-

exserant efficacia , novæ etiam illarum
nascuntur formæ ; quæ enim pari vi ope-
rantur *æquales* , secus *inæquales* ; dein
quæ plus ad factum conferunt , *præcipue* ,
quæ minus , *administræ* ; tum quæ ita actio-
nem antecedit , ut nulla alia interjecta sit ,
proxima , ceteræ *remotæ* ; denique , quæ
effectum per se producunt , *immediate* ,
quæ per alium effectui tribuunt existen-
tiam , *mediatae* nominantur.

Mortis Remo illatæ caussa unica fuit Romu-
lus , LIVIUS l. 7 , qui dein ipse a Patribus
socia & æquali opera de medio fuit sublatus .
Idem I , 16. Lucretia proxime & immedia-
te se ipsam interemit , ast remote & media-
te a Sext. Collatino ad id fuit impulsa . Idem
I , 58. Porro Tarquinii expellendi præci-
puus & mediatus auctor exstitit Brutus , sed
reliquos adhibuit cives , ut caussas imme-
diatas , & administras , DYONISIUS HAL.
IV , p. 276 , sq. Differt autem caussa pro-
xima ab immediata , quod proxima ad re-
motam necessario referatur , immediata vero
etiam sine mediata intelligi possit . Cf. GU-
NER. *Comment.* ad DARIES. §. 178. Ceterum
per se patet , operationes rerum , veluti
motus animalium , aut agendi instrumenta ,
uti fustes , gladios , venena , caussas tantum
esse physicæ , ac instrumentales , adeoque huc
non pertinere .

§. 182. Ad caussas mediatas seu mo-
rales in specie dictas ii porro accensem-
tur ,

Quæ cauf-
sie morales
speciatim.

tur, a quorum libertate actionem ab altero patrari, vel non patrari quodammodo pendebat, quod quidem quatuor contingere modis potest. I. Si nimis quis actionis *ideam* sermone, exemplo, aut consilio (§. 75) alteri producat. II. Si illius *voluntatem* imperio (§. 141), precibus, minis, palpatione ad agendum permoveat, sollicitet, instiget, exhortetur; aut saltem agere volentem, idem se velle declarando, seu adjecto consensu consummet. III. Si actionis suscipiendæ, vel occultandæ locum, tempus, modum, aliave idonea suppeditet *remedia* (§. 80). Si demum IV. actionem molienti non inferat, cum posset, vel verbis vel factis *impedimentum* (§. 81). Hos enim cunctos influisse in actionem, ejusque esse participes, atque confortes manifestum est (§. 17).

Pleraque hæ morales caussæ notis illis memorialibus versiculis comprehensæ sunt:

Jussio, consilium, consensus, palpo, recursus,

Participans, mutus, non obftans, non manifestans:

D. THOMAS 2, 2, q. 62, art. 7; quantum sex priores actionis sunt caussæ positivæ, tres reliquæ vero privativæ (§. 48), & ideo etiam Romanæ leges facti consecratio iis assignarunt. Nam I. ut ait Jēsus Paulus: *Is damnum dat, qui jubet dare, L.*

169, de R. I., si modo jus imperandi habuit, L. 37, pr. D. ad L. Aq. II. Etiam alios suadendo juvisse sceleris est instar, L. 10, D. de poen. : hinc qui malumhortatus est, vel malum monstravit, tenetur, L. 1, §. 1, D. de serv. cor.; dummodo vincibilis subsit intellectus vel voluntatis defectus (§. 82); quo sensu recte dixit CICERO: *Quid debet, qui consilium dat, praestare preter fidem?* ad Attic. XVI, 7. III. Ita quoque, Si servus sciente domino noxam commisit, suo nomine tenetur, L. 2, D. de nox. act., & creditum filio volente patre huic attribuitur, L. 2, C. ad Sæt. Maced.; scientiam tamen spectare debemus, quæ habet voluntatem, L. 1, §. 2, D. si fam. furt., L. fin. §. fin. D. de naut. caup. IV. Nec oportet laudando (palpando) augeri malitiam, L. 1, §. 4, D. de serv. corr. V. Receptatores vero in pari caussa sunt habendi, L. 1, D. de recept.; Recipere autem est refugium abscondendi caussa praestare, L. 1, §. 2, D. de serv. corr. VI. Nec minus qui occasionem (seu remedia) præstat, damnum fecisse videtur, L. 30, §. p., D. ad L. Aq.; & particeps furti est, qui furtum non fecit, si vires alterius suis viribus sufficientes reddit, & ejus ope furtum factum est, §. 11, Inst. de obl. quæ ex del. VII. Eodem modo mutus, id est, qui prohibere potuit (& debuit), tenetur, si non fecerit, L. 45, D. ad L. Aq. VIII. Quemadmodum non obstans, seu qui non facit, quod facere debet, videtur facere adversus ea, quia non facit, L. 121, D. de Reg. Jur. IX. Denique & consciis conjurationis, aut criminis læsæ maiestatis idem imputatur crimen, si

non manifestant , L. 5 , §. 6 , & 7 , ad L. Jul. maj. Ast *vitio caret* , qui seit , sed (vel per se , vel per alium) *probibere non potest* , L. 50 , D. de R. J. , L. 4 , D. de nox. aet. Etsi vero qui in actionem jam patratam consentit , id est , *ratihabet* , eam laudat , non manifestat , aut recipit patratorem , suo non careat merito ; attamen is facti jam præteriti auctor ideo dici nequit (§. 147) , adeoque secuta ratihabitio precedenti consensui non semper æquivalet. Cf. GROT. de J. B. & P. II, C. XVII, §. 6 , sqq.; DARIES. Obs. J. N. XLV.

Actio non imputatur, si careat spontaneitate.

§. 183. Quum objectum , seu materia , in qua versatur imputatio , sint tantum actiones morales , seu liberæ (§. 180) , morales autem dici nequeant , nisi sint spontaneæ , contingentes , & ab homine rationis compote suscepæ (§. 173) ; consequens est , ut mutationes , quæ sine spontaneitate , contingentia , & intelligentia in nobis existunt , imputationem non admittant , & hinc , ut ex defectu SPONTANEITATIS , nec I facta unice ab altero producta , nec II nudas perpeſſiones , nec III actiones , ut quidam vocant (§. 48 sch.) , simpliciter coactas , nec IV casus fortuitos , seu eventus ex fortuna , hoc est , ex improviso , aut saltem inevitabili causarum nexu emergentes , nobis in præmium , aut in poenam imputari oporteat.

Injustæ igitur erant leges quorumdam populum, ut propinqui eorum, qui Regi infidiati erant, cum ipsis necarentur, CURTIUS VI, C. ult. Contra non modo legibus Moysis cautum est : *Non occidentur patres pro filiis, nec filii pro patribus, sed unusquisque pro peccato suo morietur,* Deuter. XXIV, 16, IV. Reg. XIV, 6; sed etiam Romani Imperatores rescripserunt : *Peccata suos teneant auctores, nec ulterius progrediatur metus, quam reperiatur delictum,* L. 22, Cod. de pœn. Quæ vero quis ex alieno tantum peccato sentit mala, non imputationi, sed infortunio esse adscribenda jam supra obseruavimus (§. 180, sch.). Cf. GROT. de I. B. & P. II, XXI, §. 9. II. Sed nec infanti eviratio, nec feminæ vis major ei illata jure exprobratur, siquidem corpus tantum violatum est, animus insons, LIVIUS I, 58. Idem de fœda noxiaque dicendum perceptione, si modo attentio, quæ jam pendet a libertate (§. 42), evitetur. III. Nec impia esset manus, quæ vi apprehensa thus ad aram idolorum succenderet, nec si *impulsi procedimus iectu, & viribus alterius magnis, magnoque coactu alicui noceamus, nobis id objectari poterit; nam tum materiam totius corporis omnem, perspicuum est, nobis invitire, rapique,* LUCRET. II, 272; ut non maiore tunc utamur spontaneitate, quam gladius, aut fustis. IV. Denique incendia e cœlo orta, ruinæ, naufragia, & quæ sunt hujusmodi, nemini sunt objicienda : *Quis adeo iniquus, ait TACITUS, ut sceleri affignet, quod venti & fluctus deliquerunt?* Anal. XIV, 3. Atque ex hoc principio tutoribus &

*curatoribus fortuitos casus, adversus quos ca-
veri non potuit, imputari non oportere, saepe
rescriptum esse, ait PHILIPPUS L. 4, C. de
per. tut. & cur. Aliter vero ignarum vulgus
sæpiissime judicavit, veluti Burgundiones,
qui imputabant Regi suo, si segetum copiam
terra negaverat, AMM. MARC. XXVIII,
5; quorsum speetat illud Ovidii:*

*Scilicet in superos etiam fortuna luen-
da est:*

*Nec veniam læso numine casus habet.
Trist. II, 107.*

*Si non sit
fortuita
agenti.*

§. 184. Et quia actiones vel simpliciter necessariæ, vel simpliciter impossibiles, carent CONTINGENTIA (§. 37), aperte colligitur, neminem eorum declarari auctorem posse, quæ vel in ipso fiunt necessitate intestina, vel facere is prætermittit, quoties nulla reperitur agendi occasio (§. 80), aut imbecillitas naturalis, quam scilicet superare non est in nostra potestate possum, obsistit: si enim vires suas quis libere detriverit, sibique ademerit potentiam agendi, quin ejusmodi prætermissiones ad illius referantur libertatem (§. 46 sch., & §. 17), & porro ei imputentur (§. 174), non est dubitandum.

Ex his patet veritas regulæ Juris Canonici:
*Imputari non potest ei, per quem non stat, si
non faciat, quod per eum erat faciendum;* C.
41, §§, de R. Jur. Quis igitur nimiam proceritatem, dotium naturalium defecatum,

cæcitatem , surditiem alicui vitio dabit ; & quis non indignabitur Lacedæmoniis , qui eum , qui magnis commotis tempestatibus hostias ad sacrificium non præbuerat , capitis arcecerunt , CICER. Invent. II , 31. Secus foret , si actio præcedens libera minus recta improvism eventum produxerit , & infirmitas fuerit adquisita , quam probe distinguit ULPIANUS : Neque iterum permittendum , inquit , si quid sit , quod ei imputetur , cau- sari tempestatem , vel vim fluminis ; L. 2 , §. 8 , Dig. si quis caut. in jud. fist,

§. 185. Denique ex defectu INTELLIGENTIÆ I. actiones , quas quis in statu morali imperfecto , veluti furore , infan- tia , dementia (§. 55) patravit , respuunt imputationem (§. 183). II. Quod ipsum de illis mutationibus dicendum est , quæ vel ex insuperabili juris , aut facti igno- rantia (73) , vel III. ex summa ebrietate involuntaria , vel IV. ex dormientis phan- tasmate seu sommo , seclusa ratiocinandi facultate , obveniunt : ubi vero veritatem magis perspicere , & a noxio potu sibi ca- vere , aut imagines in dormiendo repro- ductas non copulare a libero agentis pen- debat arbitrio , adeo jam moralis actio- num caussa , cui morales etiam effectus assignandi sunt (§. 17).

Vel in ejus
intelligen-
tiām nos
cadat.

I. Etsi actiones infantum & furiosorum sint arbitrariæ , tamen non magis sunt liberæ , quam actiones quadrupedis , L. 5 , §. 2 , D.

ad

ad L. Aq. Quare *infans vel furiosus*, si *hominem occiderint*, *lege Cornelia non tenentur*; *cum alterum innocentia consilii tuetur*, *alterum fati infelicitas excusat*; L. 12, D. ad L. Corn. de sic. II. Facti ignorantia saepe est insuperabilis, adeoque & legis positivæ (§. 121), & tunc nec obligationi (§. 72), nec imputationi (§. 180) locus esse potest. Igitur mortem non fuerant promeriti nava-gantes, qui, ad portum extraneum delati, vitulum Dianaë immolaverant ignari legis id prohibentis sub poena ultimi supplicii, CICERO Invent. II, 31. Sunt etiam cognitio-nes, quas capere unus obligatur, non au-tem alter, & quarum porro ignoratio illi, & non huic imputari debet. III. Est quidem omnis fere ebrietas *insania voluntaria*, ut ait SENECA Epist. 83; facta igitur illicita in hu-jusmodi ebrietate patrata ad agentis liberta-tem referuntur, cuius fuerat in potestate po-tui moderari: ast si voluntaria sit ebrietas, & tanta, ut tollat rationis usum, actiones, quæ illam consequuntur, nec in se liberæ sunt, nec in sua caussa, & ideo imputatio-nis incapaces. IV. Et quia nihil tam incon-dite cogitari potest, quod non possimus som-niare, & imagines saepe veniunt non voca-tæ, CICERO Divinat. C. VI, & N. D. I, 38, patet nec somnia qua talia imputari posse. Enimvero si quis vigilans ea provocet liberis cogitationibus, vel dormiens oppri-mat infantem, quem antea in lectum acce-perat, non minus poena dignus est, quam qui equos regere indoctus habenas sumit, & prosternit viatorem, L. 27, §. 9, D. ad L. Aq. Adposite ad hanc rem ULPIANUS: *Sicuti*

medico, inquit, *imputari eventus mortalitatis non debet, ita quod per imperitiam commisit, imputari ei debet*, L. 6, §. 7, D. de off. Præf. Et generaliter vincibilis est intelligentiae defectus: *Se immiscere rei ad se non pertinenti: L. 36, D. de R. J.*

§. 136. Visa hactenus imputationis materia sequitur, ut etiam de ejusdem quantitate (§. 77) differamus: causa nimurum & fundamentum, ob quod imputari facta possunt, est eorum moralitas (§. 180), quæ ipsa in proventu actionum a libertate collocatur (§. 62): quia vero ex quantitate causæ quantitatem effectus oportet dimetiri (§. 172), palam est, mensuram imputationis in magnitudine & gradu moralitatis (§. 173), adeoque libertatis contineri; unde consequitur, ut eo magis minusve quis sit actionis auctor, & hinc eo majore vel minore præmio, aut poena dignus judicandus, quo ampliore vel angustiore arbitrio & ratione in agendo est potitus.

Ex gradu
moralitatis accipi-
tur impu-
tationis
mensura.

Hæ igitur sunt *estimationes*, quas in factis coercendis adhiberi oportere docet PAPINIANUS L. 41, D. de pœn. Quæ enim alter fieret imputatio, justitiæ vel remuneratoriæ, vel ultrici (§. 166), sive, ut alii loqui malunt, æquitati repugnaret objectivæ, quæ in proportione inter actionum consecutaria & earum libertatem collocatur. Cf. DARIAS. I, J. U. §. 227, sq. Inde apte colle-

legit GUNDLINGIUS J. N. C. IV, §. 34, quam absurdum sit contemnere mensuræ moralis doctrinam : et si enim in hoc reæ sentiant, actionem illi imputari, qui ejus sit auctor, turpiter tamen cœcutiant, quum nihil amplius discendum hac parte statuant. Semper enim quæratur, quæ voluntas & quanta? In hos itaque cuditur illud HORATII I. Sat. III, 78, sq.

cur non

Ponderibus, modulisque suis ratio utitur?
ac res,

Ut quæque est, ita suppliciis delicta coerzet.

Etsi autem DEMOSTHENES in poena non ita nude spectandam æqualitatem scripsiterit, ut in *ponderibus & mensuris*, is tantum loquitur de æqualitate physica; addit enim: *sed expendendum esse propositum ac votum ejus, qui deliquit;* Epist. III. pro Lycurg. pag. 114, b. Illud vero omnino advertendum est, sermonem hic fieri de mensura poenæ, quam quis meretur, non autem poenæ, quam ab eo exigere oportet; hujus enim mensura ex fine poenarum defumenda est, ut bonitati per sapientiam administratæ satisfiat (§. 168, sch. 2). Quare acute, uti solet, HUG. GROTIUS duo in poenis esse sestända animadvertisit, *id ob quod, scilicet meritum, & cuius ergo, id est, poenæ scopum,* II, XX, §. 28. & §. 30, n. 4. Hujus enim caussa aliquando remittitur poena, & legis gratia fit (§. 87, sch.). Cf. DARIES. Obs. J. N. XL, §. 6, sq. Quo sensu APOSTOLUS beatum vocat eum, *cui Deus non imputaverit peccata,* Rom. IV, 4.

§. 187.

§. 187. Arbitrium vi quadam efficien-
te interna sese exferere , supra est osten-
sum (§. 49) : quum autem hæc interna
vis eo major esse debeat , quo plura in-
vestiganda sunt agendi remedia , aut tol-
lenda impedimenta (§. 186) ; consequens
est , ut actiones faciles , & ad quas com-
moda atque idonea se præbet occasio ,
minus imputandæ sint , quam difficiles ,
quæque non antea patrantur , quam occa-
sione circumspecta . Et quia extrinseci
eventus ac circumstantiæ , quæ nos ad
aliquid faciendum vel non faciendum hor-
tantur , partem occasionis constituunt
(§. 80) ; illud etiam conficitur , eo minus
imputari factum vel non factum , quo
plures existiterant hujusmodi extrinsecæ
stimulantes causæ ; & contra tanto magis
utriusque imputationem augeri , quo for-
tiora præsto fuerant momenta quæ im-
pellebant auctorem , ut age et potius
contrarium .

actio fa-
ciliis mi-
nus im-
putanda
cit , quam
difficilis.

I. Igitur si cetera omnia sint paræ , actio
æqua illi minus imputatur , qui rebus abun-
dat externis , quam qui premitur eestate ,
quod ipsum docuit Divina Veritas cum
enim divites jactarent multa in gaudiplaci-
um templi , venisset autem vidua una pauper ,
& mitteret duo minuta , dixit Jesus di-
scipulis : Quoniam vidua lacet pauper plus
omnibus misit : Marc. XII , 43. II. Con-
tra actionis iniquæ majorem luere debet
pœ-

pœnam opulentus , quam indigus ; alteri enim parata erat alios perficiendi occasio , alteri non erat : *Non enim* , ut ait D. CHRI-
SOSTOMUS , *omnis legis transgressio eamdem pœnam meretur* , sed graviorem , quæ facile corrigi poterat : *X* , de statuis . Quem in modum quoque scripsit TERTULLIANUS , diffi-
cillum facile esse veniam , & quanto potestas vitandi fuit , tanto contumaciæ criminis onera-
ri , Lib. II , ad uxor. c. 1 , & 3. Idcirco inopinata furandi opportunitas aliquam meretur excusationem , qua digni utique non sunt , qui majori conatu & impetu in res alienas involant . Denique ob eamdem causam luxuria sum omni ætati turpis , tum senectuti fædissima dicitur , CICER. Off. I , 34.

Invita mi-
nus , quam
ultronea.

§. 188. Ex eodem principio colligi-
mus , cur actiones ultroneæ , lubentes (§.
47) , ex voluptate (§. 25) , atque extra
statum collisionis susceptæ magis impu-
tentur , quam actiones invitæ sive secun-
dum quid coactæ , & quæ vel ex ægritu-
dine vel obveniente collisionis statu (§.
88 , sch. 3) perpetrantur ; nec minus ,
cur , qui injuste agit , majori obnoxius sit
imputationi , quam qui agit inique . Præ-
terquam quod enim facilis sit non no-
cere quam prodesse aliis (§. 81 , sch. 4) ,
lædans etiam jus cogendi tribuit læso (§.
153) , adeoque majora superat impedimen-
ta , quam alter , a quo officia imper-
fetta vi non possunt extorqueri (§. 155) .

Si quis mortis , doloris , egestatis , aut decoris vitandi causa a lege desciscat , pœna quidem digus est , ast non tanta , ac si eamdem legem violasset nullis hisce externis momentis impulsus : quorsum spectat illud OVIDII de adulterio a Lucretia ob necem ignominiosam imminentem admissum :

Dat veniam factō genitor conjuxque coacto.

Fast. II , 819.

Ita peccat quidem inferior , qui jussu & mente superioris eum , quem certo scit innocentem , jugulat ; magis tamen peccaturus , si hunc sponte tantum sua trucidaret : qua in re merito notarunt viri docti Puffendorfium , quod facinus gravi potentioris hominis metu extortum non magis imputari nobis posse putet , quam gladio , aut securi ; de off. H. & C. I , C. 1 , §. 24. Sane voluntas cogi physique non potest (§. 42) , libera igitur est hujusmodi actio (§. 43) , adeoque & moralis & imputationi subjecta (§. 180). Rectius philosophatus est JUVENALIS :

*Summum crede nefas animum præferre pudori ,
Et propter vitam vivendi perdere couſas.*

Sat. VIII. v. 83.

III. Porro summum fuit Catilinæ scelus , qui infana agitatus voluptate necavit filiam , ut vacuam domum faceret scelestis nuptiis , SALLUST. *Catil.* XV ; ast excusatius videbatur factum Smyrneæ feminæ , quæ ex ægritudine virum & filium interemit , cum ab his optimæ indolis juvenem , quem ex priore viro enixa fuerat , occisum reperisset ; GELL. N. A. XII , 8. IV. Gravis etiam fiet imputatio illi , qui hominem extraneum perduellionis reum occultaret ; ast minus arguetur

tur filius, si saluti patriæ anteponens salutem patris hujus reticeat proditionem, & in collisione falsam exceptionem instituat, minori enim is gaudebat contingentia, cui aut patriam perdere, aut prodere patrem erat necesse. CIGERO off. III, 23. V. Denique fatius est pauperi eleemosinam denegare, quam rem alienam detinere, & propterea Phocion potentibus se congiarium respondit: *Hosce poscite divites, me vero puderet, vobis si largirer, huic (scilicet creditori) non solverem;* PLUTARCH. *Phoc.* p. 745. Non ergo verum est, quod ait DARIESIUS l. J. Un. §. 166, cor. 1, actiones interne inhonestas moralitatis gradu actiones externe inhonestas superare, nisi potius verba errore typi sint transposita, contrarium enim in suo discursu germanico probavit l. c.

Contra
caussæ
præcipuæ
magis
quam sub-
jectæ.

§. 189. Quoniam vero caussa remota se ipsam ad agendum determinat, caussa autem proxima ab altera ad agendum excitat (§. 181), in promptu est, illius actionem rigidius, quam hujus, esse expendendam: unde etiam intelligitur, caussam præcipuam majori subesse imputationi, quam caussam subjectam (§. cit.); & hinc ei, qui aliquid jubet fieri, vel requisitus consentit, ut fiat, graviores assignandas esse consecutiones, quam illic, qui jubentis & volentis negotium unice expedient, silent, adsentantur (§. 182).

Generatim quicumque alterius agendi conatum excitat, magis ad actionem concurrit, quam qui appetitum tantum nutrit, aut ei non renitur; in illum ergo majorem, quam in hunc cadere imputationem necesse est (§. 186). Ideo observavit JCtus, *aliud esse auctorem fieri servo delinquenti, aliud pati delinquare;* L. 3, D. de nox act. Hanc secutus est proportionem Lævinus Agrigento recepto, *qui capita reorum erant, virgis cæsos securi percussit, ceteros prædamque vendidit,* LIVIUS XXV, C. 40; sed etiam jam major, jamque minor esse potest excitationis aut auxilii gradus, quo respexit JUVENALIS scribens:

*Omne animi vitium tanto conspectius in se
Crimen habet, quanto, qui peccat, major
habetur.* Sat. VIII, v. 140.

Vulgata autem juris Romani regula, *eius nullam esse culpam, cui parere necesse est*, L. 167, & L. 169, de R. J., vera tantum est, si necessitas sit physica, aut si propter collisionem lex fortior debiliori præferatur (§. 88). Ceterum quod diximus, caussæ remotæ actionem magis imputari, quam proximæ, ita capendum est, si cetera omnia sint paria; fieri enim potest, ut propter adjunctorum varietatem major deprehendatur moralitas in causa subjecta: veluti si quis acerbo agitatus dolore, minusque sibi conscientius suadeat homicidium, alter vero illud animo sedato lubenter, & cum voluptate exequatur. Sed nec causa remota confundi debet cum eo, a quo inscio, nec consentiente facti sumitur occasio, veluti si femina amasio daret repulsam, & hic præ mœrore se suspenderet (§. 174, sch.). Cf. CICERO de Fat. XV.

Quænam
agendi
momenta
augeant
imputa-
tionem.

§. 190. Quomodo imputationis quantitas ex sponteitatis & contingentiae seu arbitrii gradu cognoscatur, satis dictum est: sequitur, ut merita ac demerita etiam rationis vi & magnitudine deinceps ponderemus. Pendet autem ratio ab attentionis, reflexionis, & intelligentiae facultatibus (§. 28), atque ejus robur idearum distinctarum numero, claritate, & facilitate æstimatur (§. 29); ex quo consequitur, ut quo magis quis cogitationem in factum defixit, quo plures ejus partes vidit, quo distinctius totam ejus essentiam perlustravit, quo ampliora denique ac fortiora agendi, vel non agendi momenta ex ipsa actionis idea perspexit, eo majus etiam præmium vel pœna ipsi debeatur. Sane uti pro momentorum copia multiplicatur obligatio (§. 77), ita obligationis incremento moralitas intenditur (§. 171); quin igitur etiam imputatio iisdem progressionibus augeatur, frustra esset dubitare (§. 168).

Igitur I. actio interne honesta vel æqua magis imputatur, quam decora, aut tantum externe justa; hæc enim non nisi caussæ exterioris impulsu, illa vero etiam ex motivis ab actionis idea haustis perpetratur (§. 163). II. Porro quia agendi momenta ex consideratione divinarum perfectionum desumpta omnium sunt maxima (§. 59, §. 88), peripicum est, actiones pias bonitate & merito, contra impias malitia & demerito, ceteras

ras omnes superare (§. 64 , sch.) , quorum
pertinet Christi effatum : *Væ vobis Scribæ &
Pharisei hypocritæ : quia comeditis domus vi-
duarum. Orationes longas orantes , propter hoc
amplius accipietis judicium.* Matth. XIII ,
14. Et illud : *Qui devorant domus viduarum
sub obtentu prolixæ orationis , hi accipiunt pro-
lixius judicium.* Marc. XII , 40. Immo nec
latuit Ethnici scriptores : *Totius injustitiae
nullam capitaliorem esse , quam eorum , qui
tum cum maxime fallunt , id tamen agunt , ut
viri boni esse videantur.* CICERO Off. I , 13.
III. Sed quia pietas & ceteræ virtutes
omnes , vel caussis nituntur ratione tantum
cognitis , vel simul ex momentis a divina re-
velatione acceptis exercentur , consequens
est , ut virtus Christiana summum boni ac
meriti gradum attingat , & ut propter eam-
dem caussam Christi afflæ longe rigidius ,
quam pagano , aut infideli imputanda sint
vitia contraria. Immo & inter Christianos
alea , ebrietas , injustitia , fraudesque longe
majorem in clero , vel monacho , quam in
laico & milite præferunt turpitudinem :
*atrocious , inquit SALVIANUS , sub sancti no-
minis prærogativa peccamus : ubi sublimior
prærogativa , major est culpa ;* Lib. IV , de
Gubern. Dei , p. 118.

§. 191. Nulla actio moralis est minus Culpa mi-
recta , nisi superabili intellectus aut vo-
luntatis vitio laboret (§. 82) , quod ge-
nerali culpæ , aut *Reatus* denominatione
continetur. Speciatim vero reatus , qui
versatur in intellectu , cuius nimirum
agens

agens in agendo sibi non est conscius, *culpa* est stricte dicta; qui autem versatur in voluntate, adeoque ab agente cognoscitur, dolus simpliciter aut *dolus malus* nuncupatur; atque ex his appareat actiones culposas, quæ scilicet ex errore, aut ignorantia superabili patruntur (§. 73), minus esse in agentem conferendas, quam dolosas, quæ ab homine sciente & volente contra legem sunt susceptæ (§. 81, §. 190).

I. Culpam generatim accepit CICERO scribens: *malum (morale) nullum esse nisi culpam,*
III. Tuscul. 16; & OVIDIUS:

Peccasse fatebar,
Et potuisse datis simili succumbere culpæ
Me quoque muneribus;

Metam. VII. v. 748, sq.

Quare & Jēti Romani nomine culpæ sæpius & dolum sunt complexi. Cf. L. 10, D. com-mod. II. Speciatim vero isti *dolo malo* Praetoris tabulam ab eo corrumphi tradiderunt, qui sciens & volens, non *qui per imperitiam vel rusticitatem id fecerit*, L. 7, §. 4, D. de ju-risd. Etsi alias imperitiam culpæ adnumerarent, L. 132, de R. J. Ideo in certis negotiis dolum malum duntaxat, in aliis *dolum & culpam præstari* voluerunt, L. 23, D. de R. J. Hinc *si putator ex arbore, cum ramum dejiceret*, (nulla facta attentione, adeoque culpose tantum) *transeuntem occiderit*, minus coercendus est, quam si dolo fecerit, L. 7, D. ad L. Corn. de Sic.; quorsum etiam pertinet PHÆDRI fabula, quæ *veniam tam dari do-*

uet,

cet, qui *casu* (id est culpa) *peccat*, quam
qui *confilio* est *nocens*, L. V; Fab. 3. Atque
ex his colligitur, culpam in reatu intelle-
ctus, dolum vero in reatu voluntatis recte
collocari, qui non modo actionibus injustis,
sed etiam in honestis, impiisque inesse po-
test, et si Romanæ leges dolum ad actiones
injustas aliquando restringere sunt visa, L.
I, §. I, D. de *dol. mal.*: hunc autem *dolum*
malum vocabant, quia veteribus dissensus
actionis internæ ab externa, finis liciti causa
positus, dolus erat bonus, cit. L. I, §. 3.
III. Ceterum, cum diversæ sint intellectus
facultates, plura etiam sunt culpæ genera;
vincibilis enim defectus attentionis *incogi-*
tantia, reflexionis *inconsiderantia*, rationis
improvidentia, judicii *imprudentia* nuncu-
pantur, nullus vero harum facultatum usus
præcipitantiam, & absentia omnis solicitudi-
nis de actionis bonitate *incuriam* progignunt.
Cf. WOLF. Ph. Pr. A. I, §. 760, sqq.

§. 192. Qui rationes secum subducit, *actio de-*
an vel quomodo agere, vel non agere *liberata-*
oporteat, *deliberare* dicitur; qui vero in- *magis,*
stituta deliberatione hoc vel illud factum, *quam non*
aut non factum *præoptat*, *is decernit*: *delibera-*
factus voluntatis, quo *decreti executio* de-
terminatur, proæresis seu *propositum* au-
dit; utrique autem tam decreto, quam
proposito cohæret *intentio*, sive volitio fi-
nis; itaque luculentum est, actionem deli-
beratam magis esse imputandam, quam
non deliberatam, ex deliberatis vero il-

S lam,

lam , cui liberius decretum , propositum , atque intentio accesserint (§. 190).

Ex his ratio reddi potest , cur homicidium deliberatum , aut singulare certamen statuto loco & tempore susceptum gravius imputetur , quain homicidium non deliberatum , aut pugna inopinato exorta ; & cur Romanæ leges marito adulterum & patri filiam domi sive deprehensos occidere permetterent in continenti , non autem post moram ; L. 23 , D. ad L. Jul. de ad. Sed etiam deliberatio varios habet gradus , prout ad actionem determinandam , vel ad exequendam , vel ad utrumque simul adhibetur , atque ad hunc modum etiam imputatio augescit. Praeclare CICERO in omni , inquit , *injustitia permultum interest , utrum perturbatione aliqua animi , quæ plerumque brevis est , & ad tempus : an consulto & cogitato fiat injuria ; leviora enim sunt , quæ ex repentino aliquo motu accidunt , quam ea , quæ meditata , & præparata inferuntur* ; Off. l. 8.

Quando ex intentione & propensiō-
to imputatio su-
mat in-
cremen-
tum.

§. 193. Plures autem faciunt intentionis formas ; quæ enim finem spectat , propter quem solum causa efficiens ageret , *primariam* , secus *secundariam* nominant. Porro intentionem *directam* vocant , qua id intenditur , propter quod agens agit ; *indirectam* vero , qua quidem agens per se non vult , quod ex actione ipsius sequitur , quod tamen perinde ac id , quod vult , ex eadem sequi potest : denique ab intentione factum illicitum præcedente *dolum ex pro-*

proposito, ab ea autem, quæ hujusmodi factum consequitur & approbat, *dolum ex re* ducunt, atque ex his conficiunt, ut intentio primaria, directa, & dolus ex proposito, quia majori contingentia eliciuntur ac intelligentia, graviorem quoque æstimationem recipient, quam ceteræ formæ contrariæ.

I. Si numeret Catus Sempronio mille aureos, & primo intendat hujus necessitatibus subvenire, simul tamen cogitet, se ita in eo, quod ambit, munere Sempronium propitium esse habiturum, incidet quidem in ambitus reatum, ast non ita gravem, ac si eam pecuniam nonnisi animo corrumpendi amicum numerasset. II. Intentio indirecta, cum non sit volitio finis, nomen intentionis quidem non meretur; attamen id certum est, conjectaria, quæ præter intentionem agentis fluunt ex actione libera, jam gravius, jam remissius imputari, prout facile aut difficulter ea prævideri poterant, semper tamen minus, quam si agenti fuissent satis perspecta. Quare si quis vulnerandi animo gladium strinxerit, & aliquem occidat, pro homicida damnatur; ast si clavi percussit in rixa, quamvis ferro percusserit, tamen non occidendi animo, lenienda est pœna ejus, qui in rixa causa magis, quam voluntate homicidium admisit; L. I, §. 3, D. ad L. Corn. de Sic. : Ita & qui poculum dant amatorium, et si dolo non faciant, tamen si mulier aut homo (id est foetus) perierit, summo supplicio afficiuntur; L. 38, §. 5, D. de poen. Ast femina, quæ non male ani-

animo medicamentum ad conceptionem dedit, ex quo ea, quæ acceperat, deceffit, tantum relegari jussa; L. 3, §. 2, D. ad L. Corn. de Sicar. III. Qui falsam solvit monetam sciens & volens, dolum committit ex proposito, ast si genuinam esse putet, ab omni dolo interea est immunis: ubi vero spurios fuisse numeros intelligit, nec eos commutare vult, incidit in dolum ex re, L. 36, D. de oblig. ; qui etiam dolus est ex proposito, sed tantum consequenter, & ideo minorem malitiam ar- guit.

Et pro
gradu di-
ligentiae
aut negli-
gentiae
varietur.

§. 194. *Uſus remediorum & facultatum nostrarum ad finem bonum obtinendum idoneus diligentia nominatur: cui oppo- nitur cum negligentia sive omissio diligentiæ, quam quis obligatur adhibere, tum uſus remediorum, & facultatum nostrarum legi contrarius, seu earumdem ab- uſus: quoniam plurima concipi possunt re- media ad finem sufficientia, nemo nega- verit, innumeros quoque dari posse diligentiæ & negligentiae gradus, & propter ea harum imputationem summopere va- riari oportere. Ceterum negligentia prout vel in intellectu deprehenditur, vel in vo- luntate, ad actiones vel culposas vel dolofas pertinet, & hinc jam minore, jam majore poena digna est (§. 191).*

I. Si ad notiones communes reflectamus, ob quas advocate, medico, militi, studiofo, agricolæ diligentia, vel negligentia tri-

bui-

buitur , veritas datarum definitionum patebit. Est autem diligentia alia *absoluta* , quæ non ad certam personam , sed ad finem obtinendum unice refertur ; *alia hypothetica* , quæ ex viribus personæ agentis tantum æstimatur. Ita servi in Evangelio , quorum unius quinque , alteri duo talenta tradiderat dominus , *unicuique secundum virtutem suam* , Matth. XXV, 15, quum singuli totidem superlucrati sint , eamdem impenderunt diligentiam hypotheticam , seu in concreto , et si hæc absolute , seu in abstracto discreparet.

II. Diligentiae hypotheticæ autem innumeros esse gradus , vel librarii exemplum docebit. Is legum Romanarum Codicem describet diligentissime , si characteres omnes affabre efformet , nullum omittat vocabulum , nullam litterulam , & ea utatur celeritate , quo majorem ipse non potuisse adhibere.

Contra tot deerunt diligentiae gradus , quot vel litteræ vel vocabula omissa sunt , aut minus celeriter , atque attente scripta.

III. Attamen Romanæ leges diligentiam in tres tantum gradus , scilicet *maximam* , *mediam* , & *minimam* distribuunt , summam autem negligentiam pro dolo habent , si non tam de poena ordinaria alicui infligenda , quam potius de suo alteri præstanto agatur ; L. 21 , D. *Depos.* , & L. 226 , de *V. S.* IV. Quoniam vero ex negligentia omnis oritur culpa , hanc etiam latam , levem , & levissimam faciunt. *Lata culpa* , ait ULPIANUS , est nimia negligentia , id est , non intelligere , quod omnes intelligunt , L. 213 , de *V. S.* ; *levissima* vero dicitur , si quis non sciat , quod saltem curiosissimi non ignorant , L. pen. §. 2 , D.

de

de J. & F. Ign. Igitur culpa *levis* seu media est, quæ inter latam & levissimam interjecta est; cit. L. pen. §. 2. V. Defectum rectitudinis actionis, ob exceptionem in casu collisionis officiorum minus recte factam, culpam medium dixit WOLFIUS Ph. Pr. I, §. 784, eamque a dolo & culpa in specie separavit; alii vocarunt culpam propositi, vel versutiæ, DARIES. I. Jur. Un. §. 181, veluti si quis misericordia ductus servum alienum compeditum solverit, ut fugeret; L. 7, §. 7, D. de dol. mal. Evidem hujusmodi factum semper minus esse imputandum, quam si non ex misericordia paretur, jam supra est ostensum (§. 188); quum tamen falsa exceptio a lege vel *dolose* a sciente, vel *culpose* ab ignorantे instituatur, haud opus est, aliam culpam medium procedere.

Tum pro modo ætatis, temperaturæ, & affectuum.

§. 195. Quemadmodum infantia, dementia & furor arcent usum rationis (§. 55), & ab omni imputatione liberant (§. 185), ita ætas nondum satis matura, aut crassior educatio mentis valde perfstringunt oculos; sanguinis autem temperatio atque affectus deliberandi facultatem extenuant (§. 51, sq.): quare etsi facta in tali statu patrata non careant moralitate (§. 52, §. 62), ea tamen tanta non est, quanta foret, si illi idem agerent, quibus nulla hujusmodi impedimenta obsistunt. Falsum itaque is faceret judicium, qui hujusmodi actiones physice quidem æquales,

les , sed moraliter discrepantes æqua lance suspenderet.

I. Quamprimum quis ratione uti potest , infantia quidem major est (§. 54) , sed ad maturitatem non pervenit , nisi perfecta ratione , quod propter rerum fortuitarum concursionem ex solo annorum numero nequit supputari : ut i tamen infantia , seu defectus usus rationis anno septimo , ita judicii imbecillitas anno decimo quarto communiter circumscribitur ; cuius rei naturalis illa est cauſa , quod circa hanc ætatem *pubertas* seu generandi facultas ſæpiſſime adveniat , inde autem firma ac vegeta corporis structura , a qua & animi vires pendent , eſſe colligatur. Quare non Romanis modo , *Pr. Inst. quib. mod. tut.* , sed etiam aliis populis annus pubertatis XIV. placuerat ; PHILO. de opif. mund. ; quia , ut ait PLUTARCHUS , *circa ſecondum ſeptennarium* , cum vis procreandi adest , tum intelligentia boni & mali , de placit. Phil. V, 24 ; quod ipsum Hippocratis & aliorum testimoniiſ confirmat MERILLIUS Obs. Jur. Lib. I , c. 22 , & VII , c. 29. Evidem Romanæ leges minorenitatem usque ad annum XXV. protraxerunt. Id autem ad leges positivas magis & negotia , quæ nonniſi experientia diſcuntur , pertinuit , L. 37 , §. 1 , D. de minor. , L. 198 , de R.J. ; quam ad leges naturales , in quibus ætatis suffragio minores non juvantur , L. 1 , Cod. fi ad deliq. Quid quod nec annorum numerus ad pubertatem lege positiva requiſitus in considerationem venit , si modo adſit *habitus corporis* & vigor , ut ſufficiens *rei intellectus*

capi possit, L. 14, D. de Sen. Sil. II. Ad variam sanguinis mixturam vix ac ne vix quidem respicere solent leges positivæ, ast leges naturales hæc omnia refecant minutissime: *Multa*, enim, *in corpore existunt, quæ acuant mentem, multa, quæ obtundant;* CICERO Disp. Tusc. I, 33. Prout scilicet sanguis vel calidus est, & copiosus, vel multum bilis flavæ habet admixtum, vel atra bili laberat, vel denique pituita abundat, alii memoria, alii judicio, alii ingenio, alii nulla ex his facultatibus valere dicuntur, & hinc ad bona opinata vel corporis, vel animi, vel rerum externalium inclinari, vel denique tam ad vitia, quam ad virtutes esse tardiores. Quocirca ANDRONICO RHODIO recte videbatur, *factis turpibus excusationis aliquid adferre natura, & delictum efficere tolerabilius.* Paraphr. in Eth. Nic. VII, C. 10. III. Quantum vero affectus imminuat libertatem, agnovit ANTONINUS Pius in hæc verba rescribens: *Ei, qui uxorem suam in adulterio deprehensam recidisse se non negat, ultimum supplicium remitti potest, cum sit difficillimum justum dolorem temperare;* L. 38, §. 8, D. ad L. Jul. de adult.

*Cur actio
composita
magis
aestimetur,
quam sim-*

§. 196. Actio, quæ in plures alias *composita* vidi potest, *composita*; quæ non potest, *simplex* appellatur: constat itaque actio libera composita ex pluribus liberis simplificibus, quarum singulæ ab arbitrio pendent & ratione, ut porro, si omnes in unam quasi jungantur, arbitrii & rationis quantitatem crescere necesse fit. Quoniam

ve-

vero ex magnitudine libertatis quantitas moralitatis, & imputationis æstimatur, non obscurum est, actionem compositam magis laudandam esse, vel culpandam, quam actionem simplicem; inter plures compositas vero illam ceteris merito præpondere, in quam major numerus simplicium coalescit.

Inde fit, ut furtum *simplex* minus imputetur, quam *qualificatum*, quod scilicet effractio, ascensus per scalam, aut vis major comitatur: porro ut homicidium patratum atrocius quam attentatum judicetur, non quasi nudus eventus malitiæ possit esse mensura, sed quia facilius est crimen attentare, quam perficere, minorque libertatis gradus in eo deprehenditur, qui tantum actionem determinat, quam qui illam quoque exequitur (§. 192). Quare recta fuit PHILONIS JUDÆI philosophia, homicidas existimari oportere non eos solum, qui vitam adiungunt, sed & eos, qui omnia faciunt pallam, aut clam, ut quemquam interimant; L. II. de leg. spec. p. 790. Ast etiam JCti probe agnoverunt, *Legem non minus eum, qui occidendi hominis causa cum telo fuerit, quam eum, qui occiderit, punire*; L. 16, §. 8, D. de pœn. (Vid. & §. 193, sch. II, & §. 172, sch.) Et ita plane corruit erronea THOMASII opinio putantis, quantitatem libertatis non esse meriti mensuram: *Quod, ut ait, habitualiter vitiosus, et si secundum derrinam communem tamquam servus vitii dicatur minimam libertatem habere, non tamen mi-*

mitius puniatur; Fund. I., VII., 58. Enim vero quamvis actio simplex ex mala consuetudine suscepta minus libera sit, quam si ea consuetudo absfuerit (§. 52), attamen etiam habitus moraliter mali per plures actiones liberas contrahuntur, & ideo actibus sunt pejores: *Quo enim plura sunt, in quæ incidi mus delicta*, ut scribit DIODORUS sic. in frag. L. XXI, Ecl. 15, *boc majorem pœnam commeremur*. Cf. GROTIUS de J. B. & P. II, XX, §. 30, n. 3.

Quid fo-
rum, &
quotuplex.

§. 197. Forum morale potestatem actiones imputandi designat, quæ, si de Deo enuncietur, forum *divinum*, si de homine, forum *humanum* constituit; forum *divinum* etiam forum *poli*, seu *internum*, forum *humanum* vero forum *soli*, seu *externum* nuncupatur. Scilicet summa Dei sapientia uti omnes actiones nostras, ita & interna animi cogitata distinctissime intelligit, & dimetitur: ast fallax saepe est hominum judicium, neque occultos animi recessus pertingit; unde censetur, ut in foro divino innumera imputentur facta, quæ omnem hominum cognitionem aestimationemque effugiunt.

Hac fori notione usus est ULPIANUS in L. 7, de Jud. *Si quis, inquit, posteaquam in jus vocatus est, miles, vel alterius fori esse cœperit, in ea causa jus revocandi forum non habebit, quasi præventus*; quo sensu exceptionem fori dare is dicitur, qui potestatem factum vel

vel jus imputandi alicui competere negat ; L. fin. Ccd. de Ex. & Præsc. Et ita in foro humano *cogitationis pœnam nemo patitur*, L. 18, D. de pœn. ; cuius ratio reddenda est in foro divino (§. 64, & §. 132), quod enim, ut scribit SENECA, *non vetat lex*, scilicet humana, *hoc vetat fieri pudor*, seu lex naturalis, in Troad. v. 333. Ideo *non omne quod licet* in foro externo, *honestum esse* in foro interno JCti Romani observarunt ; L. 144, de R. J. Ex his autem perspicuum est, omnimodam plenamque agendi permissionem existere, si actio nulli prorsus legi adversetur (§. 85). At plena minorem esse permissionem, si aliquid licere dicitur, non quod salva pietate, ac honestate fieri potest, sed quod ab humana pœna est immune. Cf. GROT. J. B. & P. prol. §. 41, I. 1, §. 17, III, 4, §. 2, n. 2. Atque hoc nos dicit ad illam juris divisionem, qua jus in *internum*, & *externum* distribuitur, quum enim facultas agendi, quod legi non repugnat, jus appetetur (§. 84); quidquid facere in foro interno licebit, ad id quoque jus competit internum; quod vero non nisi inter homines fieri potest impune, id solum jure fiet externo, de quo OVIDIUS : *Injustum rigido jus dicitur ense*; Trist. V, El X, v. 13; & JCtus PAULUS: *Prætor quoque jus reddere dicitur: etiam cum inique decernit*, L. 11, Dig. de Just. & Jur. Vid. I. Regum, VIII, 11.

§. 198. Sæpe forum internum fori conscientiæ seu rationis venit nomine, quod quam vim habeat, operæ pretium est Existit fo-
rum con-
scientiæ.

est explanare ; nempe tam facultas , qua quisque est instructus (§. 103) , de propriarum actionum honestate , vel turpitudine ratiocinandi , quam potissimum ipsa hujusmodi ratiocinatio , *conscientia moralis* dicitur ; quum vero rerum nexum perspiciendi vis nobis tributa sit a Supremo Numine , & ideo vox rationis pro voce Dei habeatur (§. 103 , sch.) ; mirum non est , forum internum divinumque , & forum conscientiae , seu rationis promiscue usurpari ; ex quibus impia refellitur illorum opinio , qui inanem putant esse conscientiae ideam , eamque insulso vulgi judicio assignant.

Hancce *conscientiae* vocabulo significationem tribui ægre quidem tulit PUFFENDORFIUS *J. N. & G. I* , *C. 3* , §. 4 ; ast eadem a sensu veterum non adeo abhorret , quippe qui non modo rei alicujus notitiam pluribus communem , CICERO *Catil. I* , *C. 1* , sed etiam bene vel male a se factorum judicium ea voce designabant. Ut enim SALLUSTIUS *conscientiam scelererum* , *Catil. V* , PHÆDRUS *laudis conscientiam* , *II. Epil. v. 11* , memorarunt ; ita præclare CICERO pronunciavit : *Nulla re se tam letari solere* , quam *conscientia officiorum* , *Epist. V* , 7: *Virtutis & vitiorum grave ipsius conscientiae pondus esse* , *qua sublata jaceant omnia* , *Nat. D. III. 5*: *Nullum theatrum conscientia majus dari* , *Tusc. Disp. II* , 26: *Hominis porro sapientis esse , maxime estimari conscientiam mentis suæ* , *quam a diis im-*

immortalibus accepimus, quæ a nobis divelli non potest; quæ si optimorum consiliorum testis in omni vita nobis erit, sine ullo metu, & summa cum honestate vivemus; pro Cluent.

C. 53. Totam vero conscientiæ notionem chymeris accensere ausus est TOLANDUS in *Tito Livio a supers. vind.*; ast ita se ipsum ex homine transformavit in belluam, sibique ademit rationem; neque enim conscientia ens est imaginarium, & ab anima diversum, uti aliquando imperitum vulgus fingere observat WOLFIUS *Ph. Pr. I*, §. 487, sed est ipsa hominis ratio, quatenus de bonitate & malitia propriæ actionis moralis, sive officiorum fert judicium, aut saltem illud ferre potest; negata igitur conscientiæ facultate homini quoque rationem abjudicari necesse est.

§. 199. Tot autem existunt partitiones conscientiæ, quod sunt judicii & actionum; quæ enim de actionibus suscipiens instituitur rationatio, conscientia *antecedens*; que de actionibus peractis, conscientia *subsequens* adpellatur: deinde conscientia *antecedens* duas habet subjectas formas, quarum altera *theoretica* est seu contemplativa, si in bonitate vel malitia actionis simpliciter versetur; altera *præctica* seu *præceptiva*, si actionem perpetrandam esse vel omittendam simul pronuntiet. Denique ex factis legi consentaneis conscientia *subsequens bona* atque tranquilla, ex factis vero legi dissentaneis *mala* mordensque emergit (§. 94, sch.).

Ii , qui virtuti student , in actionis suscipienda moralitatem inquirunt (§. 80 , §. 164) , & ita conscientia utuntur antecedente ; contra homines vitiosos affectus abripit & consuetudo : eos igitur eventus , qui stultorum est magister (§. 105 , sch.) , primum docet ; & subsequens vexat conscientia , quæ ideo ab antecedente toties solet dissentire. Porro an malum inferre læsionem intentanti liceat , id in scholis perpendit conscientia contemplativa ; ubi vero modicam injuriam gravior ulcisci cupienti ,

*Stat contra ratio , & secretam garrit in aurem ,
Ne liceat facere id , quod quis vitiabit agendo ,*

PERSIUS Sat. V , v. 96 ,

conscientia practica se se exserit. CICERO-
NEM bona solabatur conscientia Catilina ex-
pulso , Orat. Catil. III , §. 12 ; hujus vero
animus , necato filio , impurus diis , hominibus-
que infestus , neque vigiliis , neque quietibus sed-
ari poterat ; SALLUST. Catil. XV. Verisime
igitur CICERO : *Magna , inquit , vis est
conscientiae , & magna in utramque partem ,
ut neque timeant , qui nihil commiserunt , &
pœnam semper ante oculos versari putent , qui
peccarunt ; CICERO pro Mil. 23 , quod
ipsum egregie expressit OVIDIUS :*

*Conscia mens ut cuique sua est , ita concipit
intra*

*Pectora pro facto spemque metumque suo .
Fast. I , 485 .*

Quoniam vero cor gaudio exsultat , & dolore angitur , hinc est , quod & Scriptores sacri conscientiam in corde collocarint ; I. Reg. XXIV , 6 ; II. Reg. XXIV , 10 ; Joan. I. Epist. III , 20 , 21 .

§. 200. Porro quod supra observatum est, ratiocinationem in imputando rectam esse vel errantem, certam, vel incertam, probabilem, vel dubiam (§. 178, sq.) , id quoque ad conscientiam trahi, atque inde declarari omne potest. Nam etiam legis factique proprii idea jam *vera* est, jam *falsa*; dein aut *evidens* aut *opinabilis*, atque haec postrema nunc ad veritatem propendet magis, nunc ad falsitatem (§. 178, sq.). Ex his autem satis patere arbitror, non omnes conscientiae partes subesse imputationi, sed illas solum, quae actiones jam suscepitas consequuntur; quamdiu enim homo actionem suscipiendam perlustrat, nondum sibi aliquid imputare intelligitur, sed demum ubi factum jam perpetratum, ejusque consecutiones libero suomet ipsius arbitrio attribuit (§. 175).

I. Recta conscientia divelli a ratione non potest; ideo *libera* quoque appellatur (§. 44); ast conscientia errans plerumque affectibus obnoxia est, & hinc minus libera, seu *subjecta* audit (§. 141), quo sensu Stoici solum sapientem liberum, & omnem stultum servum esse tradiderunt; CICERO Par. V, II. Ut autem conscientia vel in lege errat, vel in facto, vel in conclusione (§. 178, sch.) ; ita legem quod attinet, aut eam non vult agnoscere, aut, quae plane non est, fingit: prior conscientia *laxa*; posterior *angusta*, seu *scrupulosa* a scrupulo, seu brevi la-

*Recta, vel
errans,
probabi-
lis, vel
improba-
bilis, vel
dubia.*

Catena
procuratio
nem
ad
magis

Iapillo pedibus molesto nuncupatur ; SERVIUS ad Æn. VI , 238. Gignuntur itaque scrupuli ab ignorantia , veluti si quis ex verbis Christi : *Nolite jurare* ; Matth. V , 33 , omne jusjurandum vetari arbitretur ; eos igitur ope demonstrationis oportet evellere. Vid. WOLF. Ph. Pr. I , §. 421. III. Conscientiam alii formam faciunt imputationis ; KOELER. Exerc. §. 382 ; DARIES. I. J. U. §. 249 : alii ab imputatione ita differre putant , ut conscientia ad actiones proprias , imputatio ad alienas pertineat ; HEINEC. El. J. N. I , §. 97 ; BURLAMAQ. II, IX, §. 1. Enim vero nec conscientiæ antecedenti notio imputationis tribui (§. 175) , nec eadem conscientiæ subsequenti denegari potest : sæpiissime enim propria homines sibi imputant facta , & ut eleganter scribit JUVENALIS :

*Prima hæc est ultio , quod se
Judice nemo nocens absolvitur , improba
quamvis*

Gratia fallaci prætoris vicerit urna.

Sat. XIII , v. 2 , sq. IV. Legum custodiæ perfectio (§. 89) , hinc gaudium (§. 129) , & felicitas (§. 133) . ast earum transgressioni imperfæctio , tristitia , & infelicitas (§. cit.) cohærent : itaque bona conscientia præmiis , mala poenitentia non immerito accensentur (§. 84 , §. 199) . Sane suum quemque scelus agitat , amentiaque afficit : suæ malæ cogitationes conscientiæque animi terrerent. Hæ sunt impiis assiduae domesticæque furiæ ; CICERO pro Rosc. Amer. XXIV.

§. 201. Quæ recta est conscientia , comparat actiones cum vera lege , atque adeo